

萬有文庫

第二集七百七種

王雲五主編

亭林詩文集

(上)

顧炎武撰

商務印書館發行



亭林詩文集

(上)

顧炎武撰

國學基本叢書

亭林詩文集目錄

詩集

卷之一

大行哀詩

京口卽事二首

金陵雜詩五首

秋山二首

十二月十九日奉先妣藁葬

海上四首

賦得老鶴萬里心

大漢行

感事六首

京闕篇

千里

表哀詩

延平使至

不去三首

贈顧推官咸正

義士行

秦皇行

墟里

塞下曲二首

海上行

哭楊主事廷樞

推官二子被難二首

淄川行

哭顧推官

哭陳太僕子龍

十月二十日奉先妣葬於先曾祖兵部侍郎公墓之左

墓後結廬三楹作

精衛

吳興行贈歸高士祚明

賦得越鳥巢南枝

賦得江介多悲風

擬唐人五言八韻六首

常熟縣耿侯橘水利書

偶來

浯溪碑歌

寄薛開封案

將遠行作

京口二首

石射棚山

春半

懷人

賦得秋鷹

八尺

桃花溪歌贈陳處士梅

瞿公子玄鎔將往桂林不得達而歸贈之以詩

卷之二

金壇縣南五里顧龍山上有高皇帝御題詞一闕

重至京口

榜人曲二首

流轉

秀州

恭謁孝陵

拜先曾王考木主於朝天宮後祠中

贈萬舉人壽祺

淮東

贈人二首

同族兄存愉拜黃門公墓

贈路舍人澤溥

清江浦

丈夫

王家營

傳聞二首

路舍人家見東武四先歷

再謁孝陵

恭謁高皇帝御容於靈谷寺

贈朱監紀四輔

監紀示遊粵詩

贈鄔處士繼思

昔有二首

贈楊明府永言

送歸高士之淮上

贈劉教諭永錫

贈郝將軍太極

孝陵圖

十廟

金山

僑居神烈山下

古隱士二首

真州

太平

蠓磯

江上二首

久畱燕子磯院中有感而作

范文正公祠

錢生肅潤之父出示所輯方書

元且陵下作二首

常熟歸生晟陳生芳績書來以詩答之

贈路光祿太平

訓王生仍

永夜

訓陳生芳績

贈路舍人

贈錢行人邦寅

松江別張處士愨王處士煒暨諸友人

贈潘節士檉章

閏五月十日恭謁孝陵

王處士自松江來拜陵畢遂往蕪湖

桃葉歌

黃侍中祠

王徵君潢具舟城西同楚二沙門小坐柵洪橋下

攝山

賈倉部必選說易

旅中

訓王處士九日見懷之作

送張山人應鼎還江陰

和陳生芳績追痛之作二首

卷之三

元日

萊州

安平君祠

不其山

勞山歌

張饒州允掄山中彈琴

淮北大雨

濟南二首

賦得秋柳

訓徐處士元善

登岱

謁夫子廟

七十二弟子

謁周公祠

謁孟子廟

賦得桔槔

張隱君元明園中仙隱祠二首

濟南

自笑

訓歸戴王潘四子韭溪草堂聯句見懷

濰縣二首

衡王府

督亢

京師作

薊州

玉田道中

永平

謁夷齊廟

寄弟紆及友人江南三首

山海關

望夫石

昌黎

三屯營

恭謁天壽山十三陵

王太監墓

劉諫議祠

居庸關二首

重登靈巖

秋雨

與江南諸子別

天津

舊滄洲

再謁天壽山陵

送王文學麗正歸新安

答徐甥乾學

白下

重謁孝陵

贈林處士古度

贈黃職方師正

杭州二首

禹陵

宋六陵

顏神山中見橘

三月十九日有事於櫓宮

古北口

五十初度時在昌平

北嶽廟

井陘

一鴈

堯廟

卷之四

元旦

霍山

書女媧廟

晉王府

贈傅處士山

又酬傅處士次韻二首

贈陸貢士來復

詠史

李克用墓

五臺山

訓李處士因篤

雨中送申公子涵光

訓史庶常可程

汾州祭吳潘二節士

寄潘節士之弟耒

王官谷

蒲州西門外鐵牛

潼關

華山

驪山行

長安

乾陵

將去關中別中尉存杠於慈恩寺塔下

后土祠

龍門

自大同至西口四首

孟秋朔旦有事于櫓宮

贈孫徵君奇逢

訓程工部先貞

寄劉處士大來

朱處士彝尊過余於太原東郊贈之

屈山人大均自關中至

重過代州贈李子德在陳君上年署中

出鴈門關屈趙二生相送至此有賦

應州二首

重至大同

得伯常中尉書却寄并示朱烈王太和二門人

淮上別王生略

贈蕭文學企昭

曲周拜路文貞公祠

德州過程工部

過蘇祿國王墓

赴東六首

子德李子聞余在難特走燕中告急諸友人復馳至濟南省視于其行也作詩贈之

樓桑廟

三月十二日有事于櫺宮同李處士因篤

贈李貢士嘉時年八十

邯鄲

邢州

自大名至保定子德已先一月西行賦寄

亡友潘節士之弟耒遠來受學兼有投詩答之二首

述古

德州講易畢奉柬諸君

輓殷公子岳

寄張文學昭時淮上有築堤之役

雙鴈

夏日二首

秋風行

靜樂

太原寄王高士錫闡

孟縣北有藏山云是程嬰公孫杵臼藏趙孤處

讀李處士顯襄城紀事有贈

寄楊高士瑀

齊祭器行

題李先生矩亭

瓠

士門旅宿

燕中贈錢編修秉鐙

先妣忌日

哭程工部

有歎二首

哭歸高士

卷之五

廣昌道中二首

寄問傅處士土堂山中

與胡處士庭訪北齊碑

詠史二首

路光祿書來敍江東同好一時徂謝感歎成篇

過矩亭拜李先生墓下

潘生次耕南歸寄示

子房

劉禾長白山下

歲暮二首

兄子洪善北來言及近年吳中有開淞江之役書此示之

閏五月十日二首

過張貢士爾岐

送程工部葬

路舍人客居太湖東山三十年寄此代東

孫徵君葬於夏峰僑寓太原不獲執紼適吳中有傳示同社名氏者感觸之意遂見乎辭

漢三君詩三首

楚僧元瑛談湖南三十年來事作四絕句

賦得簷下雀

薊門送李子德歸關中

李生符自南中歸樵李三年矣追維壯遊兼示舊作

二月十日有事于櫓宮

贈獻陵司香貫太監宗

陵下人言上年冬祭時有聲自寶城出至祿恩殿食頃止人皆異之

過郭林宗墓

介休

介之推祠

霍北道中懷關西諸君

河上作

雨中至華下宿王山史家

過李子德四首

卓帽

采芝

寄李生雲霑

春雨

寄二三處士被薦者

井中心史歌

夏日

梓潼篇贈李中孚

和王山史燕中對菊詩

關中雜詩五首

過朝邑王處士建常

寄子嚴

寄次耕

次耕書來言時貴有求觀余所著書者答示 雲臺觀尋希夷先生遺跡

硤石驛東有西鷓路至臨汝築垣封閉有題 雒陽

三月十九日行次嵩山會善寺

少林寺

嵩山

測景臺

卓太傅祠

梁園

海上

五嶽

贈張力臣

子德自燕中西歸省我于汾州天寧寺

寄次耕三首

歲暮西還時李生雲需方讀鹽鐵論

送康文學乃心歸郟陽

友人來坐中口占二絕

送李生南歸寄戴笠王錫闡二高士

訓族子湄

朱處士鶴齡寄尙書埤傳

哭李侍御灌溪先生模

華下有懷顧推官

華陰古蹟二首

悼亡五首

冬至寓汾州陽城里中尉敏浮家祭畢而飲有作二首

寄題貞孝墓後四柿

贈衛處士蒿

誄李子德二十四韻

贈毛錦銜

文集

卷之一

北嶽辨

革除辨

原姓

郡縣論九篇

錢糧論二篇

生員論三篇

卷之二

音學五書序

音學五書後序

初刻日知錄自序

左傳杜解補正序

營平二州史事序

金石文字記序

鈔書自序

西安府儒學碑目序

儀禮鄭注句讀序

廣宋遺民錄序

朱子斗詩序

程正夫詩序

萊州任氏族譜序

呂氏千字文序

勞山圖志序

卷之三

與友人論學書

與友人論易書二首

與友人論父在爲母齊衰期書

與友人論服制書

與友人論門人書

與友人辭祝書

病起與薊門當事書

與李湘北書

與湯荆峴書

與葉訥菴書

與史館諸君書

與公肅甥書

又

答原一公肅兩甥書

與彥和甥書

與施愚山書

答汪茗文書

答俞右吉書

與戴楓仲書

與李星來書

答李紫瀾書

答曾庭聞書

復陳藹公書

卷之四

答李子德書

又

又

與潘次耕書

答次耕書

與次耕書

又

與李中孚書

又

與王山史書

答王山史書

復張又南書

與王仲復書

與李霖瞻書

與三姪書

與周籀書書

與王虹友書

與人書二十五首

卷之五

聖慈天慶宮記

裴村記

齊四王冢記

五臺山記

拽梯郎君祠記

復菴記

貞烈堂記

楊氏祠堂記

華陰王氏宗祠記

書孔廟兩廡位次考後

書廣韻後

讀宋史陳遘

汝州知州錢君行狀

吳同初行狀

書吳潘二子事

歙王君墓誌銘

山陽王君墓誌銘

富平李君墓誌銘

謁欖宮文四首

華陰縣朱子祠堂上梁文

卷之六補遺

軍制論 以下四論
乙酉歲作

形勢論

田功論

錢法論

子胥鞭平王之尸辨

天下郡國利病書序

肇域志序

下學指南序

吳才老韻補正序

書故總督兵部尙書孫公清屯疏後

廣師

與盧某書

答友人論學書

與友人辭往教書

規友人納妾書

與楊雪臣

與潘次耕

與毛錦銜

答徐甥公肅書

與戴耘野

答毛錦銜

亭林詩集卷之一

大行哀詩已下闕
逢潛灘

神器無中墜。英明乃嗣興。紫蜺迎劍滅。丹日御輪升。景命殷王及。靈符代邸膺。天威寅降鑿。祖武肅不承。采望昭王儉。盤杆象帝兢。澤能回夏暵。心似涉春冰。世值頽風運。人多比德朋。求官逢碩鼠。馭將失饑鷹。細柳年年急。萑苻歲歲增。關門亡鐵牡。路寢泄金滕。霧起昭陽鏡。風搖甲觀燈。已占伊水竭。真遘杞天崩。道否窮仁聖。時危恨股肱。哀同望帝化。神想白雲乘。祕□歸新野。羣心望有□。小臣王室淚。無路哭橋陵。

太元經。紫蜺。番雲。朋。園日。墨子。堯舜禹湯文武之事。書於竹帛。鑲之金石。琢之盤盂。後漢書。崔駰傳。作杆。漢書五行志。木。沴。金。成。帝元延元年正月。長安章城門。門牡自亡。函谷關。次門牡亦自亡。師古曰。牡。所以下閉者也。以鐵爲之。庚信。哀江南賦。序。哀安之每念。王室自然流涕。

感事

日角膺符早。天枝主鬯臨。安危宗社計。擁立大臣心。舊國仍三亳。多方有二斟。漢災當百六。人未息謳

吟。

縞素稱先帝。春秋大復讎。告天傳玉冊。哭廟見諸侯。詔令屯雷動。恩波解澤流。須知□軍出。一□定□州。

上宰承王命。專征指大江。出關收漢卒。分陝寄周邦。日氣生元甲。雲祥下赤幢。登壇推大將。國士定無雙。

尚錄文侯命。深虞雒邑東。千秋懸國恥。一旦表軍功。蹋鞠追名將。乘軒比上公。君王多倚託。先與賦彤弓。

蘇子瞻書傳曰。予讀文侯之命篇。知東周之不復興也。宗國傾覆。禍敗極矣。平王宜若衛文公。越勾踐。然今其書乃旋旋焉。與平康之世無異。春秋傳曰。厲王之禍。諸侯釋位。以間王政。宣王有志而後。效官。讀文侯之命。知平王之無志也。史記票騎傳。其在塞外。卒乏糧。或不能自振。而票騎尙穿域蹋鞠。春秋傳。衛甯武子來聘。公與之宴。爲賦。淇露及彤弓。不辭。又不答賦。

清蹕郊宮寂。春遊苑籞荒。陵邊屯牧馬。闕下駐賢王。紫塞連元菟。黃河界白羊。輿圖猶在眼。涕淚已霑裳。

史記劉敬傳。白羊樓煩王去長安近者七百里。輕騎一日一夕可以至。

自昔南朝地。常稱北府雄。六軍多壘日。萬國鼓鞞中。聽律音非吉。焚旗火乍紅。恐聞劉展亂。父老泣江

東。六月壬午。督師標下兵。與浙江兵。鬪於鎮江西門外。焚民居數百家。

周禮。大師執同律以聽軍聲。而詔吉凶。左傳。僖十五年。火焚其旗。通鑑。唐肅宗紀。安史之亂。兵不及江淮。及劉展反。田神功討平之。其民始罹荼毒矣。

京口卽事已下旂蒙作麗

白羽出揚州。黃旗下石頭。六雙歸鴈落。千里射蛟浮。河上三軍合。一戰收。祖生多意氣。擊楫正中流。

大將臨江日。原望捷時。兩河通詔旨。三輔急王師。轉戰收銅馬。還兵飲。從軍無限樂。早賦仲宣詩。

宋史李綱傳。請於河北置招撫司。河東置經制司。擇有材略者爲之。使宣諭天子恩德。所以不忍棄兩河於敵國之意。後漢書光武紀。擊銅馬於鄆。悉將降人。分配諸將。衆遂數十萬。

京闕篇

王氣開江甸。山河拱舊京。德過灑水卜。運屬阪泉征。赤縣疏封闕。黃圖映日明。秩猶分漢尹。烝尙薦周牲。闕道紆金輅。郊宮佇翠旌。山陵東掖近。府寺後湖清。國運方多難。天心會一更。神州疑逐鹿。率土駭

犇鯨號略旗初仆。函關鼓不鳴。遂令纏大角。無復埽欃槍。合殿焚丹戶。金城落畫甍。銜哀遺梓棊。泣血貫宗祊。傾否時須聖。扶屯理必亨。望雲看五采。候緯得先贏。渡水收萍實。占龜兆大橫。舊邦回帝省。耆俊式王楨。歷是周正月。田踰夏一成。雅應歌吉日。民喜復盤庚。毓德生維嶽。分猷降昴精。朝稱元老壯。國有丈人貞。密切營三輔。恢張頓八紘。塘周淮口柵。山繞石頭城。未蕩封豨梗。仍遺穴鼠爭。師從甘野誓。人雜渭濱耕。四冢懸蚩戮。千刀待莽烹。柳青依玉勒。花發韻金鉦。黃石傳三略。條侯總七營。虎頭雙劍白。猿臂一弓駢。會見妖氛淨。旋聞隄塞平。載囊歸武烈。伊馘築文聲。禮洽封山玉。音諧降鳳笙。配天歸舊物。復國紀鴻名。曉集僊庭鷺。春遷大谷鶯。尊師先太學。納誨必延英。側席推干鼎。回車載釣璜。在陰來鶴和。刻石起魚鏗。念昔掄科日。三陪薦士行。帝鄉秋恂悅。天闕歲崢嶸。賦客餘枚叟。文才後賈生。飲泉隨渴鹿。攀徑落危旄。再見東都禮。尤深上國情。百僚方勸進。父老盡來迎。宿衛皆勳舊。干振竝禁兵。乾坤恩澤大。雷雨氣機盈。草綠西州晚。雲彤北闕晴。法宮瞻斗柄。別館望金莖。玉帛塗山會。車書雒邑程。海槎天上隔。陽卉日邊榮。對策年猶少。尊王志獨誠。小臣搖彩筆。幾欲擬張衡。

史記天官書大角者天王帝廷杜子美詩大角纏兵氣顏延之皇太子釋奠詩時屯必亨運蒙則正唐書隋大業十三年六月鎮星贏而旅於參參唐星也李淳風曰鎮星主福未當居而居所宿

國吉。書文侯之命。罔或者壽。俊在厥服。史記殷本紀。帝盤庚之時。殷已都河北。盤庚渡河南。復居成湯之故居。建康志。柵塘在秦淮上。通古運。濱實錄注。吳時夾淮立柵。號柵塘。梁天監九年。新作緣淮塘。北岸起石頭。迄東冶。南岸起後渚。籬門。迄三橋。作兩重柵。皆施行馬。皇覽曰。蚩尤冢在東平郡壽張縣關城中。高七丈。民常十月祀之。有赤氣出入。如匹絳帛。民名爲蚩尤旗。肩髀冢在山陽郡鉅野縣。重聚大小。與鬪。冢等。傳言黃帝與蚩尤戰於涿鹿之野。殺之。身體異處。故別葬之。徐陵在齊。與楊僕射書。四冢礫蚩尤。千刀刺王莽。梁元帝藩籬未靜。述懷詩。金鉞韻。洛宮。劉敬叔異苑曰。晉武帝時。吳郡臨平岸崩。出一石鼓。打之無聲。以問張華。華曰。可取蜀中桐材。刻作魚形。扣之。則鳴。於是如言。聲聞數十里。班固東都賦。發鯨魚。鏗華鐘。鮑照舞鶴賦。歲崢嶸而愁暮。

金陵雜詩

江月懸孤影。還窺李白樓。詩人長不作。千載尙風流。塢壁三山古。池臺六代幽。長安佳麗日。夢繞帝王州。

春雨收山半。江天出翠層。重聞百五日。遙祭十三陵。祝版書孫子。祠官走令丞。西京遺廟在。灑掃及冬烝。

天居宜壯麗。考室自宣王。地卽周灋右。規因漢未央。水衡存物力。司隸識朝章。父老多垂涕。還思祖德長。

正殿虛椒寢。蒼生望母儀。國風思窈窕。小雅夢熊羆。中使頻傳勅。臺臣早進規。願聞姜后戒。仍及會朝

時。

漢書杜欽傳。佩玉宴鳴。則雖歎之。知好色之伐性短年。天下將蒙化。陵夷而成俗也。故詠淑女。幾以配上。列女傳。周宣姜后。賢而有德。宣王嘗早臥而晏起。后夫人不出於房。姜后既出。乃脫簪珥。待罪於永巷。使其傅母。通言於王。王復姜后。而勤於政事。早朝晏退。繼文武之迹。興周室之業。詩。會且歸矣。無庶予子。惜。

記得尙書巷。先兵部侍郎府君官舍所在。于今六十年。功名存駕部。先公疏船甲事。得請為南京。俎豆託朝天。有祠

宮。天樹向烏衣直。門臨白水偏。侍郎遺石在。過此一悽然。

古樂府。青溪小姑曲。開門白水側。近橋梁。唐書。薛元超為中書舍人。宏文館學士。兼修國史。中書省有一盤石。元超祖父道衡為內史。侍郎嘗據而草制。元超每見此石。未嘗不泫然流涕。

千里

千里吳封大。三州震澤通。戈矛連海外。文檄動江東。王子新開邸。將軍舊總戎。登壇多愴慨。誰復似臧洪。

後漢書臧洪傳。陳留太守張邈與諸牧守大會酸棗。設壇場將盟。既而更相辭讓。莫敢先登。咸共推洪。洪乃攝衣升壇。操血而盟。辭氣愴慨。聞其言者無不激揚。

秋山

秋山復秋山。秋雨連山般。昨日戰江口。今日戰山邊。已聞石甄潰。復見左拒殘。旌旗埋地中。梯衝舞城

端一朝長平敗。伏尸徧岡巒。北去三百舸。舸舸好紅顏。吳口擁臺駝。鳴笳入燕關。昔時鄢郢人。猶在城南間。

漢書李陵傳於是盡斬旌旗及珍寶埋地中晉書慕容超載記使送吳口千人戰國策雍門司馬謂齊王曰鄢郢之大夫不欲爲秦而在城南下者以百數

秋山復秋水。秋花紅未已。烈風吹山岡。燐火來城市。天狗下巫門。白虹屬軍壘。可憐壯哉縣。一旦生荆杞。歸元賢大夫。斷脰良家子。楚人固焚麋。庶幾歆舊祀。句踐棲山中。國人能致死。歎息思古人。存亡自今始。

左傳定五年吳師居麋子期將焚之。子西曰父兄親暴骨焉不能收。又焚之。不可子期曰國亡矣死者若有知也。可以歆舊祀。豈憚焚之。焚之而後戰。

表哀詩

晉孫綽作表哀詩其序曰余以薄祜夙遭閔凶天覆既淪俯憑坤厚豈悟一朝復見孤棄不勝哀號作詩一首敢冒諒闇之譏以申罔極之痛

黽勉三遷久。間關百戰深。生慚毛義檄。死痛子輿衾。荻字書猶記。斑衣舞尙尋。淒其天步蹙。在苒歲華侵。密葉凋秋氣。貞柯落夜陰。國書公父訓。女史大家箴。未已還閔望。仍留恤緯心。霜催臨穴旆。風送隔鄰砧。白鶴非新表。青烏卽舊林。欲求防墓處。戈甲滿江潏。

列女傳王孫賈母言女莫出而不還則吾倚闥而望女今事王王出走女不知其處女尙何歸

十二月十九日奉先妣藁葬

婁縣百里內牧騎過如織土人每夜行冬深月初黑扶柩已南來幸至先人域合葬亦其時倉卒未可得停車就道右予也聞日食魂魄依祖考卽此幽宮側三年卜天道墓櫬茂以直黽勉臣子心有懷亦焉極悲風下高原父老爲哀惻其旁可萬家此意無人識

禮記曾子問孔子曰昔者吾從老聃助葬於巷黨及塋日有食之老聃曰丘止柩就道右止哭以聽變旣明反而后行

延平使至已下柔兆闡茂

春風一夕動三山使者持旌出漢關萬里干戈傳□札十行書字識□顏身留絕塞援枹伍夢在行朝
執戟班一聽□□同感激收□遙待□□還

海上

日入空山海氣侵秋光千里自登臨十年天地干戈老四海蒼生痛哭深水湧神山來白鳥雲浮仙闕見黃金此中何處無人世祇恐難酬烈士心

滿地關河一望哀。徹天烽火照胥臺。名王白馬江東去。故國降旛海上來。秦望雲空陽鳥散。冶山天遠朔風迴。樓船見說軍容盛。左次猶虛授鉞才。

隋書五行志。梁大同中童謠曰。青絲白馬壽陽來。其後侯景破丹陽。乘白馬。以青絲爲羈勒。

南營乍浦北南沙。終古提封屬漢家。萬里風煙通日本。一軍旗鼓向天涯。去夏誠國公劉孔昭自福山樓船已奉

征蠻勅。博望空乘汎海查。愁絕王師看不到。寒濤東起日西斜。

長看白日下蕪城。又見孤雲海上生。感慨河山追失計。艱難戎馬發深情。埋輪拗鏃周千畝。蔓草枯楊漢二京。今日大梁非舊國。夷門愁殺老侯嬴。

楚辭九歌。埋兩輪兮繫四馬。尉繚子。拗矢折矛。

不去

不去圍城擁短轅。棲棲猶自向平原。此心未忍輕三晉。願見辛垣盡一言。落日江津送伍員。秋風壠上別徐君。偶來圯下逢黃石。便到山中臥白雲。欲投海島問田橫。卻恨三齊路不平。記作安平門下客。當時曾見火牛兵。

賦得老鶴萬里心用心字

何來千歲鶴。忽下九臯音。一自來凡境。推顏已至今。臨風時獨舞。警露亦長吟。乍識人民異。還悲歲月侵。早寒江上笛。秋急戍樓砧。木落依空沼。雲多失舊林。三株天外冷。甲子世間深。尙想蓬萊曉。終思弱水陰。神州迷再舉。碧落杳千尋。多少乘軒者。知同一寸心。

埤雅：鶴性警。至八月白露降。流於草木上。點滴有聲。因卽高鳴相警。移徙所宿處。慮有變害也。楚辭：惜警黃鶴之一舉兮。知山川之紆曲。再舉兮。知天地之圓方。

贈顧推官咸正已下疆圍大淵獻

上郡天北門。一垣接羌氏。當年關中陷。九野橫虹霓。日光不到地。哭帝蒼山蹊。君持蘇生節。冒死決蒺藜。揮刀斬賊徒。一炬看燃臍。東虞勢薄天。少梁色悲悽。遂從黃冠歸。間關策青驪。豈知臬卿血。已化哀鵲啼。弟錢塘知縣咸建未敢痛家讎。所念除鱷鯢。有懷託桑榆。焉得巖下棲。便蹴劉司空。夜舞愁荒雞。春水濕樓船。湖上聞鉦聲。勾吳古下國。難與秦風齊。卻望殺潼間。山高別馬嘶。□□哀忠臣。臨軒降紫泥。高景旣分符。汾陰亦執珪。如君俊拔才。久宜侍金闈。會須□□原。指顧安黔黎。

顏延之和謝監靈運詩：謁帝蒼山蹊。漢光武賜馮異詔曰：可謂失之東隅。收之桑榆。漢書：周苛死滎陽。乃拜其弟昌爲御史大夫。後以功封汾陰侯。苛子成。以父死事。封高景侯。

大漢行

大漢傳世十二葉。祚移王莽。絲居攝。黎元愁苦盜賊生。次第諸劉興宛葉。一時併起實倉皇。國計人心多未協。新市將軍憚伯升。遂令三輔重焚劫。指揮百二歸蕭王。一統山河成帝業。吁嗟帝王不可圖。長安天子今東都。隗王白帝何爲乎。扶風馬生眞丈夫。

漢書賈誼傳高皇帝與諸公併起師古曰併音步鼎反。

義士行

飲此一杯酒。浩然思古人。自來三晉多義士。程嬰公孫杵臼無其倫。下宮之難何倉卒。賓客衣冠非舊日。袴中孤兒未可知。十五年後當何時。有如不幸先朝露。此恨悠悠誰與訴。一心立趙事竟成。存亡死生非所顧。嗚呼趙朔之客眞奇特。人主之尊或不能得。獨有人兮長歎空山側。

秦皇行

秦肉六國啖神州。六國之士皆秦讐。劍一發。亡荆軻。筑再舉。誅漸離。博浪沙中中副車。倉海神人無奈何。自言王者定不死。豈知天意亡秦卻在此。隕石化。山鬼言。天意茫茫安可論。扶蘇未出監上郡。始皇

不死讎人刃。

揚子法言始皇方斧將相方刀六國方木將相方肉漢書張良傳東見倉海君晉灼曰海神也

墟里

昔有周大夫。愀然過墟里。時序已三遷。沈憂念方始。乃知臣子心。無可別離此。自經板蕩餘。一再見桃李。春秋相代嬗。激疾不可止。慨焉歲月去。人事亦轉徙。古制存練祥。變衰固其理。送終有時既。長恨無窮已。豈有西向身。未味王哀旨。眷言託風人。言盡愁不弭。

楊惲報孫會宗書君父至尊親也送其終也。有時而既。

塞下曲

趙信城邊雪化塵。紇干山下雀呼春。卽今三月鶯花滿。長作江南夢裏人。

史記衛將軍驃騎傳遂至真顏山趙信城。五代史寇彥卿傳紇干山頭凍死雀。何不飛去生處樂。梁邱遲與陳伯之書暮春三月江南草長雜花生樹羣鷺亂飛。

一從都尉生降去。夜夜魂隨塞鴈蘆。陛下寬仁多不殺。可能生入玉門無。

史記柴將軍遺韓王信書曰陛下寬仁諸侯雖有畔亡而復歸輒復故位號不誅也。

海上行

大海天之東。其處有黃金之宮。上界帝子居其中。欲往從之。水波雷駭。幾望見之。以風爲解。徐福至彼。止王不來。至今海上人。時見城郭高崔嵬。鼉鼉噴沫。聲如宮商。日月經之。以爲光。或言有巨魚。身如十洲長。幾化爲龍。不可當。一旦失水愁徬徨。北冥之鯢。有耶無耶。又言海中之棗。大如瓜。棗不實。空開花。但見鯨魚出沒。鑿齒磨牙。昔時童男女。一去不回家。東浮大海難復難。不如歸去持魚竿。

史記大宛傳贊。日月所相避隱。爲光明也。晏子春秋。景公問晏子曰。東海之中有棗。華而不實。

哭楊主事

吳下多經儒。楊君實宗匠。方其對策時。已負人倫望。未得侍承明。西京俄淪喪。五馬遂南來。汪黃位丞相。幾同陳東獄。幸遇明主放。牧馬飲江南。龍起芒碭。首獻大橫占。竝奏北邊狀。是日顏迴。喜氣浮綵仗。筆授二官。天墨春俱盎。擢兵部主事兼監察御史魚麗笠澤兵。烏合松陵將。滅跡遂躬耕。猶爲義聲唱。松江再蹉跌。搜伏窮千嶂。竟人南冠囚。一死神慨忼。往秋夜中論。指事竝吁悵。我慕凌御史。凌倉卒當絕吭。齊蠟與楚龔。相期各風尚。君今果不食。天日情已諒。隕首蘆墟村。噴血胥門浪。唯有大節存。

亦足酬□賦。灑涕見羊曇。君甥。停毫默悽愴。他日大鳥來。同會華陰葬。

推官二子執後欲爲之經營而未得也。而二子死矣。

生來一諾比黃金。那肯風塵負此心。不是白登詩未解。非才端自媿盧諶。

晉書劉琨作詩贈別駕盧諶引鴻門白登之事。用以喻意。諶素無奇略。以常詞酬和。殊乖琨心。

蒼黃一夜出城門。白刃如霜日色昏。欲告家中賣黃犢。松江江上去招魂。

古樂府平陵東。歸告我家賣黃犢。

淄川行

張伯松巧爲奏。大纛高牙擁前後。罷將印歸里中。東國有兵鼓逢逢。鼓逢逢。旗獵獵。淄川城下圍三匝。圍三匝。開城門。取汝一頭謝元元。

漢書王莽傳。張竦爲劉嘉作奏。請滅安衆侯崇。莽封嘉爲師禮侯。嘉子七人。皆賜爵。關內侯。又封竦爲淑德侯。長安爲之語曰。欲求封。過張伯松。力戰鬪。不如巧爲奏。

哭顧推官

推官吾父行。世遠亡譜系。及乎上郡還。始結同盟契。崎嶇鞭弭間。周旋僅一歲。痛自□□淪。王綱亦陵

替人懷分士心。欲論縱橫勢。與君共三人。其一歸高士。祚明。獨□南陽□。誓麾白羽扇。一掃天日翳。君才本恢

宏。闊略人事細。一□入人手。幾墮□□睨。乃有□將隙。因掉三寸說。主□非其人。□□復不濟。君來就

茅屋。問我駕所稅。幸有江上舟。請鼓鈴下柵。別去近一句。君行尚留滯。二子各英姿。文才比蘭桂。身危

更藏亡。并命一朝斃。巢卵理必連。事乃在眉眚。一身更前卻。欲聽華亭唳。我時亦出亡。聞此輒投袂。扁

舟來勸君。行矣不再計。驚弦鳥不飛。困網魚難逝。旦日追吏來。君遂見囚繫。檻車赴白門。忠孝辭色厲。

竟作戎首論。卒踐捐生誓。倉皇石頭骨。未從九原瘞。父子兄弟間。五人死相繼。嗚呼三吳中。巍然一門

第。尚有五歲孫。伏匿蒼山際。門人莫將燹。行客揮哀涕。羣情佇收□。恩卹延後世。歸喪琅邪冢。詔策中

牢祭。後死媿子源。徘徊哭江裔。他日修史書。猶能著凡例。

通鑑庾冰奔會稽。至浙江。蘇峻購之甚急。吳鈴下卒引冰入船。以籬簾覆之。吟嘯鼓柁。泝流而去。後漢書李固傳。門生王成將燹乘江東下。伏隆傳。詔隆中弟咸收隆喪。太中大夫護送喪事。詔告

琅邪作冢。

哭陳太僕

陳君量賈才。文采華王國。早讀兵家流。千古在胸臆。初仕越州理。一矢下山賊。南渡侍省垣。上疏亦切

直告歸松江上。歛見牧馬逼。拜□至□□。願請三吳□。□使護諸□。加以太僕職。遂與章邯書。資其□
□力。幾事一□□。□覆天地黑。嗚呼君盛年。海內半相識。魏齊亡命時。信陵有難色。事急始見求。棲身
各荆棘。君來別浦南。我去荒山北。柴門日夜扃。有婦當機織。未知客何人。倉卒具糲食。一宿遂登舟。徘徊
徊玉山側。有翼不高飛。終爲罟羅得。恥爲南冠囚。竟從彭咸則。尙媿虞卿心。負此一悽惻。復多季布柔。
晦迹能自匿。君出亡時。僞僕從。三酌酒作哀辭。悲來氣哽塞。

史記季布傳。諸公皆多季布能摧剛爲柔。

十月二十日奉先妣葬於先曾祖兵部侍郎公墓之左

先考葬祖墓左四十年。其左有池。形家或言兆有水。是歲將合葬我母。三族皆爲炎武難之。炎武念先妣之治命。不可以不合葬。而四十年之藏。又不可以遷。萬一有水。又不可以徑情而遂葬。遲回者久之。及啓壙。竟無水。訖事。無風雨。昔重光大荒落之歲。葬先王父。旣祖奠。火作於門。里人救之。遂熄。念吾先人積德累仁。固不當有水火之菑。陰陽之咎。而不孝一人。所遇之不幸。如此。天之不遂棄之。而曲全之。又如此。是可以忘先人之志哉。

王季之墓見水齧宣尼封防遭甚雨。我今何幸獨不然。或者蒼天照愁苦。昔我先臣葬於此。神宗皇帝賜之墓一區。六十年間事反覆。到今陵谷青模糊。止存松楸八百樹。夜夜宿鳥還相呼。行人指點侍郎冢。戊卒不敢來樵蘇。乃知□朝恩寵大。易世猶與凡人殊。天道回旋改寒燠。公侯子孫久必復。歲月日時共五行。先公葬亦以歲丁亥月辛亥日丁亥時辛亥。前岡後舍分昭穆。皇天下監臣子心。環三百里無相侵。先皇弓劍橋山岑。山多虎豹江水深。欲去復止長哀吟。

國語。越王命環會稽三百里。以爲范蠡地。曰。後世子孫有敢侵蠡之地者。使無終沒於越國。皇天后土。四鄉地主正之。

墓後結廬三楹作

偉元居城陽。簡之在丹徒。古人廬墓有至意。獨我未得心煩紆。東西南北亦人子。豈知天路還崎嶇。奮矛躍馬一到此。營地半畝先人隅。築室三楹戶南向。前對日月開規模。舊栽松樹無觸鹿。惟有老柏銜悲枯。憶昔曾蒙至尊詔。共姜名字懸三吳。至今東平冢上木。枝枝西靡朝皇都。爾來天地春意絕。不見□父重嗚呼。一身去□無所泊。類此鴻鴈三秋徂。陰風怒號白日孤。吁嗟此室千年俱。

晉書。殷仲堪爲桓玄所害。子簡之葬於丹徒。遂居墓側。後率私僮客。隨義軍躡桓元。元死。簡之食其肉。魏書。傅永嘗登北邙山。奮稍躍馬。回旋瞻望。有終焉之志。遂買左右地數頃。遺勅子叔偉曰。此

吾之永宅也。晉書許孜於墓所列植松柏，亘五六里。時有鹿犯其松，孜悲歎曰：「鹿獨不念我乎？」明日忽見鹿爲猛獸所殺。舊唐書褚無量傳：「憂廬於墓側，其所植松柏有鹿犯之，無量泣而誓曰：『山中衆草不少，何忍犯吾先塋樹哉？』因通夕守護，俄有羣鹿馴狎，不復侵害。」晉書王裒常至墓所，攀柏悲號，涕淚著樹，樹爲之枯。

精衛

萬事有不平，爾何空自苦。長將一寸身，銜木到終古。我願平東海，身沈心不改。大海無平期，我心無絕時。嗚呼！君不見西山銜木衆鳥多，鵲來燕去自成窠。

吳興行贈歸高士祥明

北風十二月，遊子向吳興。榜人問何之，不言但沾膺。三年干戈暗鄉國，有兄不得歸瑩域。高堂有母兒一人，負米百里傷哉貧。此來海虞兩月日，裁得白金可半鎰。歸來入門不暇餐，直走山下求兄棺。湖中雪滿七十峰，江山對君凝愁容。冬盡月向晦，慈親倚門待。果見兄骨歸，心悲又以喜。如君節行真古人，一門內外唯孤身。出營甘旨入奉母，崎嶇州里良苦辛。君向余太息，此事不足言。遙望天□山，猶在浮雲間。長歎未及往，塵沙沒□□。州已□□，菽水難爲計。豈無季孫粟，義不當人惠。世無漢高帝，餓殺韓王孫。寧受少年侮，不感漂母恩。時人未識男兒面，如君安得長貧賤。讀書萬卷佐帝王，□□一紙定

四方拜□□□□還歸奉高堂窮冬積陰天地閉知君唯有袁安雪

世說王悅之少厲清操爲吏部郎時鄰省有會同者遺之餅一甌辭不受曰所費誠復小小然少來不欲當人之惠

賦得越鳥巢南枝用枝字已下著雍困敦

微物生南國深情繫一枝寒風羣拉沓落日羽差池繞樹飛初急尋柯宿轉遲懸冰驚趾滑集霰怯巢危路入關河夜思縈嶺嶠時山川知夙性天地識恩私向日心常在隨陽願未虧寄言幽谷友勿負上林期

賦得江介多悲風用風字

素節乘雲夢清秋下渚宮哀音生地籟激楚入天風落鴈過山急寒蟬抱樹空傷心千里目愁絕百年中郢路元依北江關久向東有人宗國淚何地灑孤忠

華陽國志巴楚相攻伐故置江關陽關後漢書岑彭傳公孫述遣將乘枋箄下江關

擬唐人五言八韻

申包胥乞師

辰尾垂天譎。亡人甚寇兵。舟師通大別。獵火照方城。九縣長蛇據。三關鑿齒橫。君王親草莽。微命託宗枋。彳亍終南近。間關繞雷平。張廬非聘客。躡屩一書生。雀立庭柯暝。猿啼夜柝驚。秦車今已出。誓死必存荆。

漢書王莽傳。繞雷之固。南當荆楚。服虔曰。繞雷。隘險之道。師古曰。謂之繞雷者。言三面阨塞。其道屈曲。谿谷之水回繞而雷也。其處卽今之商州界。七盤十二繞是也。儀禮聘禮及竟。張廬。戰國策。七日而薄秦王之朝。雀立不轉。晝吟宵哭。

高漸離擊筑

神州移水德。故鼎去山東。斷霓夫人劍。殘煙郭隗宮。身留烈士後。跡混市兒中。改服心彌苦。知音耳自通。沈淪餘技藝。忱慨本英雄。壯節悲遲晚。羈魂迫固窮。一吟遼海怨。再奏薊丘風。不復荆卿和。哀哉六國空。

班定遠投筆

少小平陵縣。蕭然一布衣。讀書傳父業。握管上皇畿。太乙藜初降。蘭臺露未晞。生涯憑筆札。甘旨爲慈闈。忽見天弧動。聊將電鋏揮。于闐迎轡勒。疏勒候旌旂。凍磧軍營轉。秋山捷奏飛。封侯來萬里。老見錦

衣歸。

本傳嘗爲官儲書行詣相者曰祭酒
布衣諸生耳而當封侯萬里之外。

諸葛丞相渡瀘

火山橫日幕。銅澗亘天微。亂樹雲南國。交繩熨外橋。枕戈穿偪仄。帶甲上岵巒。地汁生淫霧。流煙入斗杓。七擒依算略。一戰定蠻苗。信洽炎荒永。恩宣益部遙。深思危大業。隆眷切先朝。更有親賢表。宮廷告百僚。

漢書佞幸傳註師古曰東北謂之塞西南謂之微五經通義陰亂則爲霧從地汁也楚辭大招霧雨霑霑白皓膠只。

祖豫州聞雞

萬國秋聲靜。三河夜色寒。星臨沙樹白。月下戍樓殘。擊柝行初轉。提戈夢未安。沈幾通物表。高響入雲端。豈足占時運。要須振羽翰。風塵懷撫劍。天地一征鞍。失旦何年補。先鳴意獨難。函關猶未出。千里路漫漫。

吳志周瑜傳使失旦之雞復得一鳴左傳襄二十一年州綽曰臣不敏平陰之役先二子鳴。

陶彭澤歸里

結駟非吾願。躬耕力尙堪。咄嗟聊綰綬。去矣便投簪。望積廬山雪。行深渡口嵐。芟松初作徑。蔭柳乍成菴。甕盎連朝濁。壺觴永日酣。秋籬尋菊蕊。春箔理桑蠶。舊德陳先祖。遺書付五男。因多文義友。相與卜村南。

常熟縣耿侯橘水利書

神廟之中年。天下方全盛。其時多賢侯。精心在農政。耿侯天才高。尤辨水土性。縣北枕大江。東下滄溟勁。水利久不修。累歲煩雩禱。疏鑿賴侯勤。指顧川原定。百室滿倉箱。子女時昏聘。洋洋河渠議。欲垂來者聽。三季饒凶荒。庶徵頻隔井。誰能念遺黎。百里嗟懸磬。況多鋒鏑驚。早夜常奔迸。上帝哀惻罄。天行當反正。必有康食年。河雒待明聖。自非經界明。民業安得靜。願作勸農官。巡行比陳靖。畎澮徧中原。粒食詒百姓。

後漢書陳忠傳。天心未得。隔井屢臻。註。隔井。謂水旱不節也。尙書曰。一極備凶。一極無凶。升音必性。反。耶。顯傳。歲無隔井。大平可待。史記蔡澤傳。決裂阡陌。以靜生民之業。而一其志。宋史食貨志。至道二年。太常博士直史館陳靖。上言農田事。以靖爲京西勸農使。按行陳許蔡穎襄鄆唐汝等州。勸民墾田。

偶來

偶來湖上已三秋。便可棲遲老一邱。赤米白鹽猶自足。青山綠野故無求。柴車向夕逢元亮。款段乘春遇少遊。鳥獸同羣終不忍。轍環非是爲身謀。

南齊書周顒傳。衛將軍王儉謂顒曰。卿山中何所食。顒曰。赤米白鹽。綠葵紫蓼。

浯溪碑歌

萬歷元年。先曾祖官廣西按察副使。道浯溪。得唐元次山中興頌石本以歸。爲顏魯公筆。字大徑六七寸。歷世三四。此碑獨傳之不肖。歲旃蒙作噩。命工裝潢爲冊。工人不知碑自左方起。而以年月先之。遂倒鑿不可讀。方謀重裝。而兵亂工死。不復問者三年。碑固在舊識楊生所。一旦爲余重裝以來。則文從字順。煥然一新。有感於先公之舊物不在他人。而特屬之嗣人之稍知大義者。又經兵火而不失。且待時而乃成。夫物固有不偶然者也。爲之作歌。

昔在唐天寶。祿山反范陽。天子狩蜀都。賊兵入西京。肅宗起靈武。國勢重恢張。二載收長安。鑾輿迎上皇。小臣有元結。作詩頌大唐。欲令一代典。風烈追宣光。真卿作大字。筆法名天下。磨厓勒斯文。神理遺

來者。書過泗亭碑。文匹淮夷雅。留此繫人心。枝撐正中夏。先公循良吏。海內推名德。驅馬復悠悠。分符指南極。遐眺道州祠。流覽浯溪側。如見古忠臣。精靈感行色。匪煩兼兩載。不用金玉裝。攜此一紙書。存之貯青箱。以示後世人。高山與景行。天運有平陂。名蹟更存亡。寶弓得堤下。大貝歸西房。舊物猶生憐。何況土與疆。卻念蒸湘間。牧騎已如林。西南天地窄。零桂山水深。峒嶼大禹迹。萬木生秋陰。一峯號回鴈。朔氣焉得侵。恐此浯厓文。苔蘚不可尋。藏之篋笥中。寶之過南金。此物何足貴。貴在臣子心。援筆爲長歌。以續中唐音。

後漢書吳祐傳。此書若成。則載之兼兩。穀梁傳定九年。得寶玉大弓。惡得之。得之堤下。

寄薛開封。窳君與楊主事同隱鄆尉山。併被獲。或曰僧也。免之。遂歸常州。

別君二載餘。無從問君處。蒼蒼大澤雲。漠漠西山路。神物定不辱。精英夜飛去。只有延陵心。尙挂姑蘇樹。他日過吳門。爲招烈士魂。燕丹賓客盡。獨有漸離存。

張協七命。或馳名傾秦。或夜飛去吳。李善註引越絕書。闔廬無道。湛盧之劍。去之入楚。

將遠行作

去秋闕東溟。今冬浮五湖。長歎天地間。人區日榛蕪。出門多蛇虎。局促守一隅。夢想在中原。河山不崎嶇。朝馳灑澗宅。夕宿殺函都。神明運四極。反以形骸拘。收身蓬艾中。所之若窮途。杖策當獨行。未敢憚羈孤。願登廣阿城。一覽輿地圖。回首八駿遙。悵然臨交衢。

莊子。夫三子者。猶存乎蓬艾之間。後漢書。鄧禹傳。從至廣阿。光武舍城樓上。披輿地圖。指示禹曰。天下郡國如是。今始乃得其一。

京口

異時京口國東門。地接留都左輔尊。囊括蘇松儲陸海。襟提閩浙壯屏藩。漕穿水道秦隋跡。壘壓江干晉宋屯。一上金山覽形勝。南方亦是小中原。

東吳北翟戰爭還。天府神州百二關。末代棄江因靖鹵。靖鹵。伯鄭鴻達。當年開土是中山。雲浮鶴鶴春空遠。水擁蛟龍夜月閒。相對新亭無限淚。幾時重得破愁顏。

石射棚山已下屠維 赤奮若

寒日欲墮石射棚。環湖歷歷來漁燈。山下斬王宋時墓。屹然穹碑鎮山路。太白天弧見角芒。金山京口又沙場。爾來牧騎方深入。口在明州正待王。

吳郡志靈巖山在城西三十里一名石射棚山

春半

春半雨不絕。北風吹荒山。江南花不開。白日愁生寒。登高望千里。苦霧何漫漫。□州七月圍。糧盡力亦殫。營頭墮軍中。旗纛沈江干。漢道昔中微。白水應圖記。晚世得先主。亦作三分事。干戈方日尋。天時自當至。一身客荊州。毫不以措意。流離志不挫。終然□□器。一朝得孔明。可以託後嗣。撫掌長太息。且作南山歌。開篋出□書。日夜窮揣摩。中原有大勢。攻戰不在多。願爲諸□言。不省其奈何。

後漢書天文志晝有雲氣如壞山墮軍上軍人皆厭所謂營頭之星也占曰營頭之所墮其下覆軍流血三十里三國志註引漢晉春秋曰曹公自柳城還表謂備曰不用君言故爲失此大會備曰

今天下分裂日尋干戈事會之來豈有終極乎若能應之於後者則此亦未足爲恨也史記留侯世家良爲他人言皆不省

懷人

秋風下南國。江上來飛鳶。江頭估客幾千輩。其中別有東吳船。吳兒解作吳中曲。扣舷一唱悲歌續。乍迴別鶴下重雲。一叫哀猿墜深木。曲中山水不分明。似是衡山與洞庭。日出長風送舟去。祇留江樹青冥冥。湘山削立天之角。五嶺盤紆同一握。嶽崑七十有二峰。紫蓋獨不朝衡嶽。萬里江天木葉稀。行人

相見各沾衣。寄言此日南征鴈。一到春來早北歸。

杜子美望南嶽詩。紫蓋獨不朝。爭長蝶相望。蔡□胡
笳十八拍。鴈南征兮欲寄邊聲。鴈北歸兮爲得漢音。

賦得秋鷹

青骹初下赤霄空。千里江山一擊中。忽見晴臯鋪白草。頓令涼野動秋風。當時遂得荆文寵。佐運終成
尙父功。試向平蕪看獵火。六雙還在上林東。

陳思王孟冬篇。獵
以青骹。掩以修竿。

八尺

八尺孤帆一葉舟。相將風水到今秋。曾來白帝尋先主。復走江東問仲謀。海上魚龍應有恨。山中草木
自生愁。憑君莫話興亡事。舊日長年已白頭。

桃花溪歌贈陳處士梅

陶君有五柳。更想桃花源。山迴路轉不知處。到今高士留空言。太邱之後多君子。門前正對桃花水。嘉
蔬名木本先疇。海志山經成外史。曾作諸生三十年。老來自種溪前田。四百甲子顏猶少。有與疑年但

一笑。有時提壺過比鄰。笑談爛漫皆天真。酒酣卻說神光始。感慨洵瀾不可止。老人尙記爲兒時。煙火
萬里連江畿。斗米三十穀如土。春花秋月同遊嬉。定陵龍馭歸蒼昊。國事人情亦草草。桑田滄海幾回
更。只今尙有遺民老。語罷長謠更浮白。七十年來似疇昔。與君同是避秦人。不醉春光良可惜。春非我
春。秋非我秋。惟有桃花年年開。溪水年年流。爲君酌酒長無愁。

左傳襄二十九年。絳縣人或年長矣。無子而往與於食。有與疑年。史記封禪書。老人爲兒時。從其
大父。識其處。詩。勞人草草。毛傳。草草。勞心也。郊祀歌。日出入篇。故春非我春。夏非我夏。秋非我
我冬。非我冬。

瞿公子元銷將往桂林不得達而歸贈之以詩

不成南去又東還。行盡吳山與越山。萬里一身天地外。五年方寸虎豺間。匡門浪拍行人舸。桂嶺雲遮
驛使關。我望長安猶不見。愁君何處訪慈顏。

亭林詩集卷之二

金壇縣南五里顧龍山上有高皇帝御題詞一闕已下上章攝提格

突兀孤亭上碧空。高皇於此下江東。卽今御筆畱題處。想見神州一望中。黃屋非心天下計。詞有他日偷閒花鳥

娛情山水相關之句。青山如舊帝王宮。丹陽父老多遺恨。尙與兒童誦大風。

重至京口

雲陽至京口水似巴川縈。逶迤見北山。乃是潤州城。城北江南舊軍壘。當年戍卒曾屯此。西上青天是帝京。天邊淚作長江水。江水遶城回。山雲傍驛開。遙看白羽扇。知是顧生來。

榜人曲

儂家住在江洲。兩槳如飛自繇。金兵一到北岸。踏車金山三周。

宋史虞允文傳。臨江按試。命戰士踏車船。中流上下三周金山。回轉如飛。

眞州城子自堅。京口長江無恙。艤舟夜近江南。恐有南朝丞相。

文信國指南錄敵船滿江百姓無一舟可問與人爲謀皆以無船長嘆而止余元慶遇其故舊爲敵管船遂密叩之許以承宣使銀千兩其人曰吾爲宋朝救得一丞相回建大功業何以錢爲但求批帖爲他日趨承之證因授以批帖仍強委之白金義人哉使吾無此一遭遇已矣

流轉

流轉吳會間。何地爲吾土。登高望九州。極目皆榛莽。寒潮盪落日。雜遝魚鰕舞。饑鳥晚未棲。弦月陰猶吐。晨上北固樓。慨然涕如雨。稍稍去鬢毛。改容作商賈。却念五年來。守此良辛苦。畏途窮水陸。仇讐在門戶。故鄉不可宿。飄然去其宇。往往歷關梁。又不避城府。丈夫志四方。一節亦奚取。毋爲小人資。委肉投餓虎。浩然思中原。誓言向江浒。功名會有時。杖策追□□。

秀州

秀州城下水。日夜生春雲。雲含秀州塔。鳥下吳江濱。我願乘此鳥。一見倉海君。異人不可遇。力士難再得。海內不乏賢。何以酬六國。將從馬伏波。田牧邊郡北。復念少遊言。憑高一悽惻。

恭謁孝陵已下重光單闕

閭位窮元季。眞符啓聖人。九州殊夏裔。萬古肇君臣。武德三王後。文思二帝鄰。卜年乘王氣。定鼎屬休辰。江水縈丹闕。鍾山擁紫宸。衣冠天象遠。法駕月遊新。正寢朝羣后。空城走百神。九嶷超嶠竄。原廟逼嶙峋。寶祚方中缺。炎精且下淪。郊垞來獵火。苑籞動車塵。繫馬神宮樹。樵蘇御道薪。巋然唯殿宇。一望獨荆榛。流落先朝士。間關絕域身。干戈逾六載。雨露接三春。患難形容改。艱危膽氣眞。天顏杳靄接。地勢鬱紆親。尙想初陵制。仍詢徙邑民。因山皆土石。用器不金銀。時有倡開煤之說紫氣浮天宇。蒼龍捧日輪。願言從□□。修謁待西巡。

漢書王莽傳贊。餘分閭位。班固東都賦。建武之年。天地革命。四海之內。更造夫婦。靡有父子。君臣初建。人倫實始。史記孝文紀。治霸陵。皆以瓦器。不得以金銀銅錫爲飾。太祖實錄。遺命喪葬儀物。一以儉素。不用金玉。後漢書鄧禹傳。南至長安。率諸將齋戒。擇吉日修禮謁祠高廟。因循行園陵。爲置吏士奉守焉。

拜先曾王考木主於朝天宮後祠中

晉室丹楊尹。猶看古柳存。先公嘗爲天府尹山河今□域。瞻拜獨曾孫。雨靜鍾山閉。雲深建業昏。自憐檻樓客。

拭淚到都門。

南史劉歊傳。歊六世祖煥。晉時爲丹楊尹。袁粲曾於後堂請歊。指聽事前古柳樹。謂歊曰。人言此是劉尹時樹。每想高風。今復見卿。清德可謂不衰矣。歊與張融王思遠書。自謂貧困。監縷衣裳容髮。

有足
駭者

贈萬舉人壽祺

徐州人

白龍化爲魚。一入豫且網。愕眙不敢殺。縱之遂長往。萬子當代才。深情特高爽。時危見繫維。忠義性無枉。翻然一辭去。割髮變容像。卜築清江西。賦詩有遐想。楚州南北中。日夜馳輪鞅。何人調北方。處士才無兩。回首見彭城。古是霸王壤。更有雲氣無。山川但塊莽。一來登金陵。九州大如掌。還車息淮東。浩歌閉書幌。尙念吳市卒。空中弔魍魎。南方不可託。吾亦久飄蕩。崎嶇千里間。曠然得心賞。會待淮水平。清秋發吳榜。

西都賦。猶愕眙而不能階。眙。眙。吏反。驚貌。唐書。權。阜。爲。驛亭保。以調北方。漢書。梅福傳。變名姓。爲吳市門卒。

淮東

淮東三連城。其北舊侯府。昔時王室壞。南京立新主。河上賊帥來。東南費撐拄。詔封四將軍。分割河淮土。侯時擁兵居。千里暨安堵。促觴進筓瑟。堂上坎坎鼓。美人拜帳中。請作便旋舞。爲歡尙未畢。羽檄來旁午。揚舲出廟灣。欲去天威怒。舉族竟生降。一旦爲俘虜。傳車詣幽燕。猶佩通侯組。長安九門中。出入

黃金塢。故侯多嫌猜。黃金爲禍胎。白日不爾待。長夜來相催。徬徨闕門前。一時下霆雷。法吏逢上意。羅織及嬰孩。具獄阿房宮。腰斬咸陽市。踟躕念黃犬。太息諱諸子。父子一相哭。同日歸蒿里。有金高北邙。不得救身死。地下逢黃侯。舉手相挪揄。我爲□朝將。爾作燕山俘。俱推凶門轂。各剖河山符。嗟公何不。死。死在淮東郭。一死畱芳名。一死骨已枯。寄語後世人。觀此兩丈夫。

贈人

楊朱見路岐。泫然涕沾臆。路旁多行人。一南一以北。南北遂分手。去去焉所極。南指越裳山。北適氍裘國。同在天地間。合并安可得。此去道路長。哀哉各努力。步上太行山。盤石鬱相抱。行人共太息。此是摧輶道。前路無康莊。回車苦不早。聞君將有適。念此令人老。山下有丈夫。窮年折芝草。不出巖谷間。長得顏色好。

同族兄存愉拜黃門公墓

已下元
默執徐

公姓顧氏。諱野王。字希馮。以梁臨賀王記室參軍。起兵討侯景。入陳。官至黃門侍郎。墓在今蘇州府吳縣橫山東五里。越來溪上。盧襄石湖志曰。墓上有一巨石橫臥。可二丈許。石上古松一

枝似蓋湖上。望見之。卽知爲野王墳。今樹與石無恙。天啓中。有勢家欲奪其地而葬。竊已穿矣。族兄存愉。發憤訟於官。得止。其勢家所築周垣及樹木。皆歸顧氏。

古墓橫山下。遺文郡志中。才名留史傳。譜系出先公。歲月千年邈。郊垆百戰空。立松標舊竈。偃石護幽宮。地自豪家奪。碑因貴客龔。賢兄能發憤。陳迹遂昭融。念昔遭離亂。於今事略同。登車悲出走。雪涕問臨戎。述記名山業。提戈國士風。荒祠亡血食。汗簡續孤忠。山勢仍吳鎮。溪流與越通。眷言懷往烈。感慨意無窮。

贈路舍人澤溥

秋鴈違朔風。來集三江裔。未得遂安棲。徘徊望雲際。嗚呼先大夫。早識□□氣。謁□□□宮。柄用恩禮備。汀江失警□。一死魂猶視。君從粵中來。千里方鼎沸。絕跡遠浮名。林臯託孤詣。東山峙太湖。昔日軍所次。奉母居其中。以待天下□。相逢金閫西。坐語一長喟。復敍國變初。山東竝賊吏。長淮限南北。支撐賴文帥。擒魁獻行朝。逆黨皆戰悸。江外甫晏然。卒墮權臣忌。鑠金口未白。牧馬彎弓至。□□呼恩官。干戈對王使。□書曰。□有守。困恩官路振飛。感激千載逢。一下君臣淚。嶺表多炎風。孤棺託蕭寺。怒聲瀧水急。遺策空山

關君才賈董流矧乃忠孝嗣國步方艱危簡在卿昆季經營天造始建立須大器敢不竭微誠用卒□
□志明夷猶未融善保艱貞利

左傳昭五年明夷之謙
明而未融其當且乎

清江浦

此地接邳徐平江故蹟餘開天成祖代轉漕北京初插下三春盡湖存數尺瀦淮安城西有五插每歲
糧船以春月上夏初
閉插以防黃水灌入裏河俟秋水退九月開插舳舻通國命倉廩峙軍儲陵谷天行變山川物態疎黃
回空插內所瀦皆高郵寶應諸湖南來之水
流侵內地清口失新渠米麥江淮貴金錢帑藏虛蒼生稀土著赤地少耰鋤廟食思封券河防重璽書
路旁看父老指點問舟車

丈夫

丈夫志四方有事先懸弧焉能釣三江終年守菰蒲如何駟隙間流光日已徂矯首望太行努力驅鹽
車風吹河北鴈颯沓雲中呼豈無懷土心所羨千里途

王家營

荒坵據淮津。彌望徧秋草。行人日夜馳。此是長安道。雞鳴客車出。四野星光早。征馬乏青芻。山川色枯稿。燕中舊日都。風景猶自好。衣殘苕上繒。米爛東吳稻。公卿不難致。所患無金寶。還顧旅舍中。空囊故相惱。回頭問行人。路十如何老。

通鑑路巖佐崔鉉於淮南爲支使。鉉知其必貴。嘗曰。路十終須作彼一官。既而入爲監察御史。不出長安城十年。至宰相。其自監察入翰林日。鉉猶在淮南。聞之曰。路十今已入翰林。如何得老。後皆如言。鉉。

傳聞

傳聞□極馬。新已下湘東。五嶺遮天霧。三苗落木風。間關□□日。瘴癘百蠻中。不有三王禮。誰收一戰功。
廿載河橋賊。於今伏斧礮。□威方一震。兵勢已遙臨。張楚三軍令。尊周四海心。書生籌往略。不覺淚痕深。

路舍人家見東武四先□

已下昭陽大荒落。

夏后昔中微。國絕四十載。但有少康生。卽是天心在。歷數歸君王。百揆領冢宰。路公文貞識古今。危難

心不怠。屬車乍□□。盡戎壘。粵西已踰年。其歲直丁亥。侵尋各自擁。迫蹙限厓海。門絕島中大。澤一空壘。新□尚未頒。國疑更誰待。遂命疇人流。三辰候光彩。印用文淵閣。丹泥勝珠璣。龍馭杳安之。台星隕衡鼎。猶看正□□。江山改。在昔順水軍。光武戰幾殆。子顏獨奮然。終竟齊元凱。叔世乏純臣。公卿雜鄙猥。持此一册書。千秋戒僚采。

莊子秋水篇計四海之在天地間也。不似壘空之在大澤乎。左思吳都賦珠璣闌干。後漢書光武紀。光武北擊尤來。大槍五幡於順水北。乘勝輕進。反爲所敗。軍中不見光武。或云已沒。諸將不知所爲。吳漢曰。卿曹努力。王兄子在南陽。何憂無主。衆恐懼。數日乃定。吳漢傳。吳漢字子顏。

再謁孝陵

再陟神垵下。還經□□□。精靈終浩蕩。王氣自崔嵬。突兀明樓峙。呀庠御殿開。雲浮苑起。碧巘到宮迴。鼎叶周家卜。符占漢代災。蒼松長化石。黑土乍成灰。城闕春生草。江山夜起雷。興王龍虎地。命世鄂申才。瞻拜魂猶惕。低徊思轉哀。上陵餘舊曲。何日許追陪。

柳子厚遊朝陽巖詩。反字臨呀庠。唐人小說。馬湘至永康縣。東天寶觀有大枯松。湘曰。此松後三十餘年。卽化爲石。自後松果化爲石。

恭謁高皇帝御容於靈谷寺

肅步投禪寺。焚香展御容。人間垂法象。天宇出真龍。隆準符高帝。虬鬚軼太宗。掃除開八表。盪滌翦羣
兇。大化乘陶冶。元功賴發蹤。本文書胙德。臣辟記勳庸。遺像荒山守。塵函古刹供。神靈千載後。運會百
年重。痛迫西周威。愁深朔漠烽。萬方多蹙蹙。薄海日喁喁。臣籍東吳產。皇恩累葉封。天顏仍左顧。國難
一趨從。飄泊心情苦。來瞻拜跪恭。異時司隸在。可許下臣逢。

贈朱監紀四輔人寶應

十載江南事已非。與君辛苦各生歸。愁看京口三軍潰。痛說揚州七日圍。碧血未消今戰壘。白頭相見
舊征衣。東京朱祐年猶少。莫向尊前歎式微。

監紀示游粵詩

知君前自廣州來。瀧水孤雲萬壑哀。兩路□□皆不下。□□守嶺竟空回。同時金李多驍將。遺事江山
只戰臺。獨有臨風憔悴客。新詩吟罷更徘徊。

贈鄔處士繼思

市中間韓康。藥肆在何許。牀頭本草書。門外長桑侶。每吟詩一篇。冷然在雲天。筇穿北固雪。艇迷京口

煙。六代江山好。愁來恣搜討。蘭蓀本獨芳。薑桂從今老。去去復棲棲。河東王伯齊。年年尋杜甫。一過浣花溪。

後漢書第五倫傳。客河東。變名姓。自稱王伯齊。載鹽往來太原。上黨所過。輒爲糞除。而去陌上號爲道士。親友故舊莫知其處。

昔有

昔有楚項羽。宰割封侯王。徙帝都上游。殺之於南方。大權旣分裂。海內爭雄彊。何況咫尺間。嬴秦尙未亡。時會互反覆。壯盛豈有常。感事再三歎。令我一徬徨。

魏政昔濁亂。兵甲與爾朱。唐臣多險浮。全忠肆誅屠。貪夫分自當。不用重哀吁。河陰與白馬。千載同一途。奈此國命何。大勢常與俱。天意未可窺。或爲真人驅。

楊明府永言雲南人昔在崑山□□□爲僧於華亭及吳帥舉事去而之蘭谿今復來吳下感舊

有贈

絕跡雲間日。分飛海上秋。超然危亂外。不與少年儔。閱歲空山久。尋禪古寺幽。干戈纏粵徼。妻子隔寧州。乍解桐江纜。仍回谷水舟。刀寒餘斗色。血碧帶江流。舊卒蒼頭散。新交白眼休。同年張翰在。張行人

賓客顧榮留。海日初浮嶼。吳霜早覆洲。與君遵晦意。不負一□謀。

送歸高士之淮上

送君孤棹上長淮。千里談經意不乖。卜宅已安王考兆。攜書還就故人齋。簷前映雪吟偏苦。窗下聽雞舞亦佳。此日邗原能斷酒。不煩良友數縈懷。

三國志邗原傳注原舊能飲酒自遊學八九年酒不向口及臨別師友以原不飲酒會米肉送原原曰本能飲酒但以荒思廢業故斷之耳今當遠別因見貶餞可一飲燕於是共坐飲酒終日不醉

贈劉教諭永錫大名

棲遲十載五湖湄。久識元城劉器之。百口凋零餘僕從。一身辛苦別妻兒。心悲漳水春犁日。目斷長洲夕鴈時。獨我周旋同宿昔。看君臥起節頻持。

郝將軍太極滇人也。天啓中守甯益。余於敍功疏識其姓名。今爲醫客於吳之上津橋。言及舊事。感而有贈。

會提一旅制黔中。水蘭諸酋指顧空。入楚廉頗猶未老。過秦扁鵲更能工。風高劒氣蛤川外。水沸茶聲鶴澗東。橋畔相逢不相識。漫將方技試英雄。

隋書史萬歲傳。
入自蜻蛉川。

孝陵圖 有序。

重光單閼二月己巳來謁孝陵。值大雨。稽首門外而去。又二載。昭陽大荒落。二月辛丑。再謁。十月戊子。又謁。乃得趨入殿門。徘徊瞻視。鞠躬而登殿上。中官奉帝后神牌二。其後蓋小屋數楹。皆黃瓦。非昔制矣。升甬道。恭視明樓寶城。出門。周覽故齋宮祠署遺址。牧騎充斥。不便攜筆硯。同行者故陵衛百戶束帶玉。稍爲指示。退而作圖。念山陵一代典故。以革除之事。實錄會典。竝無紀述。當先朝時。又爲禁地。非陵官不得入焉。其官於陵者。非中貴則武弁。又不能通諸國制。以故其傳鮮矣。今旣不盡知。知亦不能盡圖。而其錄於圖者。且不盡有。恐天下之人。同此心而不獲至者多也。故寫而傳之。

鍾山白草枯。冬月蒸宿霧。十里無立樞。崗阜但回互。寶城獨青青。日色上霜露。殿門達明樓。周遭尙完固。其外有穹碑。巍然當御路。文自成祖爲。千年繫明祚。侍衛八石人。祇肅候靈輅。下列石獸六。森然象鹵簿。自馬至獅子。兩兩相比附。中間特峯嶽。有二擎天柱。排立榛莽中。凡此皆尙具。又有神烈山。世宗

所封樹臥碑自崇禎。禁約煩聖諭。石大故不毀。文字猶可句。至於土木工。俱已亡其素。東陵在殿左。先時懿文祔。云有殿二層。去門可百步。正殿門有五。天子升自阼。門內廡三十。左右以次布。門外設兩廚。右殿上所駐。祠署并宮監。羊房暨酒庫。以至各廡宇。竝及諸宅務。東西二紅門。四十五巡鋪。一一費搜尋。涉目仍迷瞶。山後更蕭條。兵牧所屯聚。洞然見銘石。崩出常王墓。何代無厄菑。神聖莫能度。幸茲寢園存。皇天永呵護。奄人宿其中。無乃致褻汙。陵衛多官軍。殘毀法不捕。伐木復撤亭。上觸天地怒。雷震樵夫死。梁壓陵賊仆。乃信高廟靈。却立生長怖。若夫本衛官。衣食久遺蠹。及今盡流冗。存兩千百戶。下國有蟻臣。一年再奔赴。低徊持寸管。能作西京賦。尙慮耳目褊。流傳有錯誤。相逢虞子大。獨記陵木數。未得對東巡。空山論掌故。

後漢書光武紀流冗道路。盧全月蝕詩。地上蟻蝨臣。全告訴帝天皇。後漢書虞延傳。光武東巡路過小黃。高帝母昭靈后園陵在焉。時延爲部督郵。詔呼引見。問園陵之事。延進止從容。占拜可觀。其陵樹株。皆諳其數。俎豆犧牲。頗曉其禮。帝善之。史記司馬相如傳。宜命掌故。悉奏其義。而覽焉。漢書音義曰。掌故。大師官屬。主故事者。

十廟雞鳴山下。有帝王功臣十廟。後人但謂之十廟。

我來雞籠下。十廟何蒼涼。周垣半傾覆。棟宇皆頽荒。樹木已無有。寂寞餘山岡。功臣及卞劉。竝作瓦礫。

場衛國有遺主。尙寓五顯堂。武惠僅一間。廟貌猶未亡。蔣廟頗完具。欹側惟兩廊。帝王殿已撤。主在門中央。或聞道路言。欲改祀三皇。真武竝祠山。香火仍相當。其南特煥然。漢末武安王。云是督府修。中絕以堵墻。陪京板蕩餘。百司已更張。神人悉異名。不改都城隍。朔望及雩祈。頓首誠恐惶。神奉太祖勅。得以威遐荒。畱此金字題。昭示同三光。追惟定鼎初。遣祀明綸將。二百七十年。吉蠲存太常。三靈俄□□。一代淪彝章。圓丘□□□。百神焉得康。騎士處□廟。陵闕來牛羊。何當挽天河。滌去諸□□。無文秩新邑。人鬼咸迪嘗。復見十廟中。冠佩齊趨踰。此詩神聽之。終古其毋忘。

漢書王莽傳。莽感高廟神靈。遣虎賁武士入高廟。拔劍四面提擊。斧壞戶牖。桃湯赭鞭。鞭灑屋壁。令輕車校尉居其中。又令北軍中壘居高寢。書洛誥。成秩無文。漢書郊祀歌。登成甫田。百鬼迪嘗。

金山已下闕
逢敦牂

東風吹江水。一夕向西流。金山忽動搖。塔鈴語不休。水軍一十萬。虎嘯臨□州。巨艦作大營。飛鷁爲前茅。黃旗亘長江。戰鼓出中洲。舉火赫山旁。鳴角東龍湫。故侯□□□。手運丈八矛。登高矚山陵。賦詩令人愁。沈吟□□餘。□□旌旆浮。忽聞□□來。先聲動□幽。闔廬用□□。鄢郢不足收。祖生奮擊楫。肯效南冠囚。願言告同□□□。莫淹畱。

晉書佛圖澄傳段末波攻石勒衆甚盛勒懼問澄澄曰昨日寺鈴鳴云明旦食時當禽段末波劉曜攻雒陽勒將救之以訪澄澄曰相輪鈴音云秀支替戾岡僕谷劬禿當此言軍出捉得曜也

僑居神烈山下

典得山南半畝居。偶因行藥到郊墟。依稀玉座浮雲裏。落莫金莖淡日初。塔葬屬支城外土。營屯塞馬殿中廬。猶餘伯玉當年事。每過陵宮一下車。

列女傳衛靈公與夫人夜坐聞車聲憐憐至闕而止過闕復有聲公問夫人曰知此爲誰夫人曰此蘧伯玉也其人不以闇昧廢禮是以知之公使人視之果伯玉也

古隱士

幼安遭漢季。一身客遼東。世亂多傾危。築室深山中。自非學者流。名字罕得通。研心易六爻。不用希潛龍。根矩好清評。行止乃未同。

嘗聞龐德公。自守甘窮餓。且率妻子耕。不知州牧過。關中催汜攻。河上袁呂破。默默似無聞。但理芸鋤課。獨識諸葛君。一言定王佐。

真州

擊楫來江外。揚帆上舊京。鼓聲般地起。獵火照山明。楚尹頻奔命。宛渠尙守城。真州非赤壁。風便一障

太平

天門采石尙嶙峋。一代興亡此地親。雲擁白龍來戍壘。日隨青蓋落江津。常王戈甲先登陣。花將鬚眉罵賊身。猶是南京股肱郡。憑高懷往獨傷神。

吳志孫皓傳注引千寶晉紀庚子歲青蓋當入雒陽。太祖實錄上渡江抵采石磯常遇春舍舟奮戈先登衆皆披靡遂拔采石。陳友諒陷太平守將樞密院判花雲大罵而死。

蠓磯

下接金山上小孤。一磯中立鎮蕪湖。千年形勢分南極。萬里梯航達帝都。嶺色遠浮黃□蘂。江風寒拂白頭烏。高皇事業山河在。畱得奎章墨未枯。廟中有高皇帝御製詩金字牌一扇。

三國典略侯景篡位令飾朱雀門其日有白頭烏萬許集於門樓童謠曰白頭烏拂朱雀還與吳。

江上

清霜覆蘆花。秋向江岸白。青山矗江天。飛鳥去無跡。行行獨愁思。今爲遠行客。晨樵水上峰。夜釣磯邊石。酌水復烹魚。可以供日夕。且此恣盤桓。安能守阡陌。

江風吹回波。垂釣魚不上。歲旱耕山田。抱甕禾不長。閒來走磯下。輕舟駕兩槳。何處是新洲。日入秋砧響。聞有□□人。欣然願偕往。恐復非英流。空結千齡想。

南史宋武帝嘗□□新洲

久畱燕子磯院中有感而作

寄食清江院。從秋又涉冬。水侵慈姥竹。風落孝陵松。野宿從晨釣。山居傍夕烽。相逢徐孺子。多謝郭林宗。

輿地志慈姥山。積石臨江岸。壁峻絕。出竹。堪爲簫管。宋梅聖俞有慈姥山石崖上竹鞭記。後漢書徐穉傳。謂茅容曰。爲我謝郭林宗。大樹將顛。非一繩所維。何爲悽悽不遑寧處。

范文正公祠

先朝亦復愁元昊。臣子何人似范公。已見干戈纏海內。尙畱冠佩託江東。含霜晚穗遺田裏。噪日寒禽古廟中。吾欲與公籌大事。到今憂樂恐無窮。

錢生肅潤之父出示所輯方書

和扁日以遙。治術多替亂。方書浩無涯。其言比河漢。彭鏗有後賢。物理恣探玩。恥爲俗人學。特發仁者

歎五勞與七傷。大抵同所患。循方以治之。於事亦得半。條列三十餘。有目皆可看。略知病所起。可以方
理斷。哀哉末世醫。誤人已無算。頗似郭舍人。射覆徒夸誕。信口道熱寒。師心作湯散。未達敢嘗之。不死
乃如綫。豈如讀古方。猶得依畔岸。在漢有孝父。仁心周里閭。下詔問淳于。一篇著醫案。如君靜者流。嗣
子況才彥。何時遇英明。大化同參贊。

元旦陵下作

已下旃
蒙協洽

十載逢元日。朝陵有一臣。山川通御氣。節物到王春。闕下樵蘇盡。江東戰伐新。相看園殿切。鵠立幾縈
神。是日稱三始。何時見國初。風雲終日有。兵火十年餘。甲子軒庭□。春秋孔壁書。幸來京兆里。得近帝
王居。

史記天官書。正旦。欲
終日有雲。有風。有日。

常熟歸生晟陳生芳續書來以詩答之

十載江村二子偕。相逢每詠步兵懷。猶看老驥心偏壯。豈惜飛龍羽乍乖。海上戈船連滬瀆。石頭烽火
照秦淮。先朝舊事君休問。鼓角淒其滿御街。

金陵志。烽火樓在石頭城西。南最高處。吳時舉烽火於此。

贈路光祿太平

已下數首。皆余蒙難之作。先是有僕陸恩。服事余家三世矣。見門祚日微。叛而投里豪。余持之急。乃欲陷余重案。余聞。亟擒之。數其罪。沈諸水。其壻復投豪。訟之郡。行千金求殺余。余既待訊。法當囚繫。乃不之獄。曹而執諸豪奴之家。同人不平。爲代愬之。兵備使者移獄松江府。以殺奴論。豪計不行。而余有戒心。乃浩然有山東之行矣。

弱冠追三古。中年賦二京。一門更喪亂。七尺尙崢嶸。江海存微息。山陵鑒本誠。落莧裁十畝。覆草只三楹。變故興奴隸。莽蜂出里閭。彌天成夏網。畫地類秦阮。獄卒逢田甲。刑官屬甯成。文深從鍛鍊。事急費經營。節俠多燕趙。交親卽弟兄。周旋如一日。忼慨見平生。疾苦頻存問。阽危得拄撐。不侵貞士諾。逾篤故人情。木向猿聲老。江隨虎跡清。更承身世畫。不覺涕霑纓。

呂氏春秋。湯見祝網者。置四面。其祝曰。從天墜者。從地出者。從四方來者。皆罹吾網。湯曰。嘻。盡之矣。非桀其孰爲此。晉傅元詩。夏桀爲無道。密網施山阿。

酬王生仍

故國羈人怨誹深。感君來往數相尋。都將文字銷餘日。難把幽憂損壯心。演易已成殷牖蹟。援琴猶學楚囚音。顰顏白髮非前似。只有新詩尙苦吟。

梁庾肩吾詩。
殷牖交雖曠。

永夜

永夜刀鳴動箭中。起看征鴈各西東。山憐虎阜從波涌。路識閩門與帝通。待客荆卿愁日晚。艤舟漁父畏天風。當時多少金蘭友。此際心期未許同。

晉王珣虎邱山銘。虎邱山先名海涌山。孫權記注曰。吳西郭門曰閩門。夫差作以天門通閩。故名之。

酬陳生芳績

百里相思路阻紆。每承遺札訊何如。絕交已廣朱生論。發憤終成太史書。笠澤水清連底日。虞山葉落到根初。從今世事無煩問。但掩衡門學種蔬。

贈路舍人

自分寒灰卽溺餘。非君那得更吹噓。窮交義重千金許。疾吏情深一上書。大麓陽飈回宿草。岷江春水

下枯魚。丁寧未忍津頭別。此去防身計莫疎。

漢書路溫舒傳疾吏之風悲痛之辭

贈錢行人邦寅丹徒人

李白真狂客。江淹本恨人。生涯從吏議。直道託羣倫。之子才名重。相知管鮑親。起風還鷁羽。決海動龍鱗。孤憤心尤烈。窮愁氣未申。彫年黃浦雪。殘臘玉山春。貫日精誠久。回天事業新。南徐游歷地。儻有和歌辰。

江淹恨賦。僕本恨人。鮑照舞鶴賦。急景彫年。

松江別張處士愨王處士煒暨諸友人已下柔兆涪灘

十載違鄉縣。三年旅舊都。風期嘗磊落。節行特崎嶇。坐識人倫傑。行知國器殊。論兵卑起翦。畫計小陰符。世事陵夷極。生涯閱歷枯。人情來輔藉。鬼語得挪揄。郭解多從客。田儻自縛奴。事危先與手。法定必行誅。義洩神人憤。歡騰里閭呼。匣餘剗兇劍。囊解射狼弧。卦值明夷晦。時逢聽訟孚。邑豪方齟齬。獄吏實求須。裳帛經時裂。南冠累月拘。橐餗誰問遣。衣食但支吾。薄俗吳趨最。危巘蜀道俱。每煩疑載鬼。動

是泣岐塗。畜是樊中雉。巢鄰幕上烏。霜因鄒衍下。日爲魯陽驅。抱直來東土。含愁到海隅。春生三泖壯。雪盡九峰紆。異郡情猶徹。同人道不孤。未窮憐舌在。垂死覺心蘇。大義摧牙角。深懷寔尾胡。奸雄頻斂手。國士一張鬚。知己憐三疊。名流重八廚。欲將方寸報。惟有漢東珠。

史記田儼傳田儼詳爲縛其奴從少年之廷。宋書薛安都傳小子無宜適卿往與手甚快通鑑字文化及揚言曰何用持此物出亟還與手胡三省注與手魏齊間人率有是言言與之毒手而殺之也。左傳昭公元年叔孫召使者裂裳帛而與之曰帶其褊矣。

贈潘節士檀章

北□一崩淪。國史遂中絕。二十有四年。記注亦殘缺。中更□與賊。出入互轆轤。亡城與破軍。紛錯難具說。三案多是非。反覆同一轍。始終爲門戶。竟與國俱滅。我欲問計吏。朝會非王都。我欲登蘭臺。祕書入東虞。文武道未亡。臣子不敢評。竄身雲夢中。幸與國典俱。有志述三朝。并及海宇圖。一書未及成。觸此憂患途。同方有潘子。自小耽文史。犖然持巨筆。直遡明興始。謂惟司馬遷。作書有條理。自餘數十家。充棟徒爲爾。上下三百年。粲然得綱紀。索居患無朋。何意來金陵。家在鍾山旁。雲端接觚稜。親見高帝時。日月東方升。山川發秀麗。人物流名稱。到今□氣存。疑有龍虎興。把酒爲君道。千秋事難討。一代多文

章相隨沒幽草。城無絃誦生。柱殉藏書老。同文化支字。劫火燒豐鎬。自非尼父生。六經亦焉保。夏亡傳禹貢。周衰垂六官。後王有所憑。蒼生蒙治安。皇祖昔賓天。天地千年寒。聞知有小臣。復見文物完。此人待聘珍。此書藏名山。顧我雖逢掖。猶然抱遺冊。定哀三世間。所歷如旦夕。頗聞董生語。曾對西都客。期君共編摩。不墜文獻迹。便當挈殘書。過爾溪上宅。

戰國策吳與楚戰于柏舉三戰入郢君王身出大夫悉屬百姓離散蒙穀結鬪於宮唐之上舍鬪奔郢遂入大宮負雞次之典以浮於江逃於雲夢之中昭王反郢五官失法百姓昏亂蒙穀獻典五官得法而百姓大治蒙穀之功與存國相若

閏五月十日恭詣孝陵

忌日仍逢閏。星躔近一周。空山傳御幄。蕪路想行騶。寢殿神衣出。祠官玉舄收。蒸嘗憑絕隴。靴鞞託荒陬。溥海哀思結。遺臣涕淚稠。禮應求草野。心可對元幽。寥落存王事。依稀奉月游。尙餘歌頌在。長此侑春秋。

國語道弗不可行也。漢書孝平紀元始元年二月乙未義陵寢神衣在柙中丙申旦衣在外牀上。寢令以急變聞用太牢祠。王莽傳地皇元年七月杜陵便殿乘輿虎文衣廢藏在室匣中者出自樹立外堂上良久乃委地。更卒見者以聞莽惡之。

王處士自松江來拜陵畢遂往蕪湖

宵來騎白馬。躡電向鍾山。忽遇窮途伴。相將一哭還。君來猶五月。不逐秦淮節。攜手宿荒郊。行吟對宮闕。此去到蕪湖。山光似舊無。若經巡幸地。爲我少踟蹰。

桃葉歌

桃葉歌。歌宛轉。舊日秦淮水清淺。此曲之興自早晚。青溪橋邊日欲斜。白土岡下驅虞車。越州女子顏如花。中官采取來天家。可憐馬上彈琵琶。三月桃花四月葉。已報北兵屯六合。宮車塞上行。塞馬江東獵。桃葉復桃根。殘英委白門。相逢冶城下。猶有六朝魂。

隋書五行志。陳時江南盛歌王獻之桃葉詞。云桃葉復桃葉。渡江不用楫。但渡無所苦。我自迎接汝。及隋晉王廣伐陳。置營桃葉山下。及韓擒虎渡江。大將任蠻奴至新林。以爲北軍此其應也。隋書藝術傳。樂人王令言妙達音律。大業末。煬帝將幸江都。令言之子嘗從於戶外。彈胡琵琶。作翻調安公子曲。令言時臥室中聞之。大驚。蹶然而起曰。變變。急呼其子曰。此曲興自早晚。

黃侍中祠

在南京三山門外柵洪橋。

侍中名觀。洪武二十四年殿試第一。建文末。奉詔募兵安慶。聞南京不守。自沈於江。其妻翁氏及二女。爲官所簿錄。將給配象奴。亦赴水死。後人卽其葬地爲侍中立祠。

侍中祠下水奔渾。有客悲歌叩郭門。古木夜交貞女冢。光風春返大夫魂。先朝侍從多忠節。當代科名一狀元。莫道河山今便改。國於天地鎮長存。

左傳昭公元年。秦后子曰。國於天地。有與立焉。

王徵君潢具舟城西同楚二沙門小坐柵洪橋下

大江從西來。東抵長干岡。至今號柵洪。對城橫石梁。

此橋蓋古時立柵處。本當名柵江。後訛爲洪耳。猶射江之爲射洪也。落日照金陵。火

旻生秋涼。都城久塵坌。出郊且相羊。客有五六人。鼓枻歌滄浪。盤中設瓜果。几案羅酒漿。上坐老沙門。

舊日名省郎。

熊君開元

曾折帝廷檻。幾死丹陛旁。天子自明聖。畢竟誅安昌。南走侍密勿。一身再奔亡。復有

一少者。沈毅尤非常。

釋名形殘

不肯道姓名。世莫知行藏。其餘數君子。鬚眉各軒昂。爲我操南音。未言神已

傷。流賊自中州。楚實當其吭。出入十五郡。南國無安疆。血成江漢流。骨與瀟廬望。赫怒我先帝。親遣元

臣行。北落開和門。三台動光芒。一旦實大命。藩后殘荆襄。遂令三楚間。哀哉久戰場。寧南佩侯印。忽焉

竟披猖。

寧南侯左良王

稱兵據上流。以國資東陽。豈無材略士。忍死奔遐荒。落鴈衡北回。窮鳥樹南翔。可憐洞

庭水。遺烈存中湘。

何騰蛟追封中湘王

連營十三鎮。恣肆無朝綱。夜半相誅屠。三宮離武岡。黔中亦楚地。君長皆

印章。國家有驅除。往往用土狼。積雨閉塵泥。毒流漲昆明。蠻陬地斗絕。極目天茫茫。頃者西方兵。連歲爭辰陽。心悼□屋遠。眼倦烽火忙。楚雖三戶存。其人故倔彊。崎嶇二君子。志意不□□。郢公抗忠貞。左徒吐潔芳。舉頭是青天。不見二矚光。何意多同心。合沓來諸方。僕本吳趨士。雅志陵秋霜。適來新亭宴。得共賓主觴。戮力事神州。斯言固難忘。我寧爲楚囚。流涕空霑裳。

宋史天文志。北落師門一星。在羽林軍南。北者。宿在北方。落者。天軍之藩落也。師門。猶軍門。

攝山

徵君舊宅此山中。山館孱顏往蹟空。藥徑春添千嶂雨。松厓夜起六朝風。忘情魚鳥天機合。適意川巖物象同。一入離門人世別。幾人能不拜蕭公。

漢書司馬相如傳。放散畔驪。以孱顏顏師古曰。孱顏。不齊也。宮苑記。舊京南北兩岸。籬門五十。六所。蓋京邑之郊門也。江左初立。並用籬爲之。故曰籬門。南齊書王儉傳。宋世外六門。設竹籬。建元初。有發白虎。樽者言白門三重門。竹籬穿不完。上感其言。改立柵牆。

賈倉部必選說易

昔年清望動公車。此日蒼英有幾家。古注已聞傳孟喜。遺文仍許授侯芭。竹牀排硯頻添墨。石屋支鐙

旋煮茶。更說都城防寇事。至今流涕買長沙。

漢書儒林傳。蜀人趙賓好小數書。後爲易持論。巧慧。易家不能難。云受孟喜喜爲名之。

旅中

久客仍流轉。愁人獨遠征。釜遭行路奪。席與舍兒爭。混跡同傭販。甘心變姓名。寒依車下草。饑糝鑿中羹。浦鴈先秋到。關雞候旦鳴。蹠穿山更險。船破浪猶橫。疾病年來有。衣裝日漸輕。榮枯心易感。得喪理難平。默坐悲先代。勞歌念一生。買臣將五十。何處謁承明。

詠王處士九日見懷之作

是日驚秋老。相望各一涯。離懷銷濁酒。愁眼見黃花。天地存肝膽。江山閱鬢華。多蒙千里訊。逐客已無家。

送張山人應鼎還江陰

舊京秋色轉霏微。目送毘陵一鴈飛。笑我畏人能久客。嗟君懷土便思歸。風高海氣龍王廟。水落江聲燕子磯。卉布家鄉多已作。此行須換芰荷衣。

陳生芳績兩尊人先後卽世適皆以三月十九日追痛之作詞旨哀惻依韻奉和

一生愁恨集今辰。尙有微軀繫五倫。淚盡宛詩言我日。悲深魯史筆王春。山頭馬鬣封孤子。天上龍髯從二親。畱此一絲忠孝在。三綱終古不曾淪。

帝后登遐一忌辰。天□□□世無倫。那知考妣還同日。從此河山遂不春。宏演納肝猶報主。王哀泣血倍思親。人寰尙有遺民在。大節難隨九鼎淪。

梁書邵陵王綸傳大敵猶強天□未雪

亭林詩集卷之三

元日已下疆
園作壘

晨興自江上。踰嶺走鍾山。肅然至殿門。雙扉護重關。初日照宮闕。隱映城郭間。空山寂無人。獨來拜榛菅。流轉雖不居。咫尺猶天顏。喜會牧馬收。岡巒乍清閒。歲序一更新。陽風動人寰。佇口龍虎氣。得與春光還。復想在宥初。蒼生願重攀。

杜子美詩武德開元際蒼生豈重攀

萊州

海右稱名郡。齊東亦大都。山形當斗入。人質竝魁梧。月主秦祠廢。沙壇漢蹟孤。已無巡狩蹕。尙有戍軍郛。漉海鹽千斛。栽岡棗萬株。蠶梁通日際。蜃市接神區。轉漕新河格。分營絕島迂。三方從廟算。二撫各兵符。天啓初議三方布礮甲初傳造。戈鋌已擊屠。中丞愁餌賊。謝太守痛捐軀。郊壘青燐出。城陴白骨枯。危情隨事往。深慮逐年徂。計士悲疵國。遺民想霸圖。登臨多感槩。莫笑一窮儒。

史記封禪書成山斗入海。又曰八神六日月主祀之萊山。又曰天子乃禱萬里沙。應劭曰萬里沙神祠也在東萊曲成。書大誥天降威知我國有疵。

安平君祠在卽墨縣今廢

太息全齊霸業遺。如君真是一男兒。功成棧道迎王日。志決危城杖錡時。饑鳥尙銜庭下粒。老牛猶飲穴邊池。可憐王建降秦後。千古無人解出奇。

不其山

漢不其縣有康成書院今廢

荒山書院有人耕。不記山名與縣名。爲問黃巾滿天下。可能容得鄭康成。

後漢書鄭元傳自徐州還高密道遇黃巾賊數萬人見元皆拜相約不敢入縣境

勞山歌

勞山拔地九千丈。崔嵬勢壓齊之東。下視大海出日月上。接元氣包鴻濛。幽巖祕洞難具狀。煙霧合杳來千峰。華樓獨收衆山景。一一環立生姿容。上有巨峰最巔劣。數載榛莽無人蹤。重厓複嶺行未極。澗壑窈窕來相通。天高日入不聞語。悄然衆籟如秋冬。奇花名藥絕凡境。世人不識疑天工。云是老子曾過此。後有濟北黃石公。至今號作神人宅。憑高結構留仙宮。吾聞東嶽泰山爲最大。虞帝柴望秦皇封。

其東直走千餘里。山形不絕連虛空。自此一山奠海右。截然世界稱域中。以外島嶼不可計。紛紜出沒多魚龍。八神祠宇在其內。往往碁置生金銅。古言齊國之富臨淄次。卽墨何以滿目皆蒿蓬。捕魚山之旁。伐木山之中。猶見山樵與村童。春日會鼓聲逢逢。此山之高過岱宗。或者其讓雲雨功。宣氣生物理則同。旁薄萬古無終窮。何時結屋依長松。嘯歌山椒一老翁。

說文山宣也。宣氣散生萬物。

張饒州允掄山中彈琴

趙公化去時。一琴遺使君。五年作太守。卻反東臯耘。有時意不愜。來躡勞山雲。臨風發宮商。二氣相細縕。可憐成連意。空山無人聞。我欲從君棲。山厓與海濱。

淮北大雨

秋水橫流下者巢。踰淮百里卽荒郊。已知舉世皆行潦。且復因人賦苦匏。極浦雲垂翔濕鴈。深山雷動起潛蛟。人生只是居家慣。江海曾如水一坳。

國語。匏苦不材。於人共濟而已。

濟南

落日天邊見二峰。平臨湖上出芙蓉。西來水竇緣王屋。南去山根接岱宗。積氣蒼茫含斗宿。餘波滲澗吐魚龍。還思北海亭中客。勝會良時不可逢。
水翳墻崩竹樹疎。廿年重說陷城初。荒涼王府餘山沼。寥落軍營識舊墟。百戰只今愁海岱。一麾猶足定青徐。經生老却成何事。坐擁三冬萬卷書。

賦得秋柳

昔日金枝間白花。只今搖落向天涯。條空不繫長征馬。葉少難藏覓宿鴉。老去桓公重出塞。罷官陶令乍歸家。先皇玉座靈和殿。淚灑西風夕日斜。

隋史宋武帝植蜀柳數株於靈和殿前。唐李商隱詩。賜斷靈和殿先皇玉座空。

誄徐處士元善昔年新城之陷其母死焉故有此作

桓臺風木正蕭辰。傾蓋知心誼獨親。季子已無觀樂地。偉元終是泣詩人。愁看落日燕山夜。畏見荒江郢樹春。來書勸爲昌平承天之行。踏徧天涯更回轡。欲從吾友卜東鄰。

山東名勝志。新城縣東有戲馬臺。相傳齊桓公歇馬於此。

登岱已下著
雍闓茂。

尼父道不行。喟然念泰山。空垂六經文。不覩西周年。七十二君代。乃有封禪壇。書傳多荒忽。誰能信其然。既嘗小天下。復觀邃古前。羲黃與堯舜。蕩滅同雲煙。社首卑附地。徂徠高摩天。下視大海旁。神州自相連。天地有變虧。何人得昇仙。遺弓名烏號。橋山葬衣冠。末世久澆訛。孰探幽明原。三萬六千年。山崩黃河乾。立石既已剋。封松既已殘。太陽不東昇。長夜何漫漫。哀哉一顏淵。獨立瞻吳門。疲精不肯休。計畫無崖垠。復有孟子輿。眷眷明堂言。庶幾大道還。民質如初元。上采黃金成。下塞宣房湍。何時一見之。太息徒潺湲。

易山附于地。史記封禪書。轅大言臣之師曰。黃金可成。而河決可塞。不死之藥可得。仙人可致也。

謁夫子廟

道統三王大。功超二帝優。斯文垂豕繫。吾志在春秋。車服先公制。威儀弟子修。宅聞絲竹響。壁有簡編留。俎豆傳千葉。章逢被九州。獨全兵火代。不藉廟堂謀。老檜當庭發。清洙繞墓流。一來瞻闕里。如得與

從遊。

杜子美宿鑿石浦詩。斯文憂患餘。聖哲垂象繫。

七十二弟子

亂國誰知爾。孤生且辟人。危情嘗過宋。困志亦從陳。籥舞虞庠夕。弦歌闕里春。門人惟季次。未肯作家

臣。一時同人多入官長幕。

史記仲尼弟子傳。公皙哀。字季次。孔子曰。天下無道。多爲家臣。仕於都。唯季次未嘗仕。

謁周公廟

道化千年後。明禋一國中。禮猶先世守。制比百王崇。配食唯元子。烝嘗徧列公。祠田還割魯。氏系獨傳東。有祭田碑。言周公之後。東野氏。今爲東姓。舊史書茅闕。新詩采闕宮。歸然遺殿在。不與漢侯同。

謁孟子廟

古殿依邾邑。高山近孔林。游從齊魏老。功績禹周深。孝弟先王業。耕桑海內心。期應過七百。運豈厄當今。辯說千秋奉。精靈故國歆。四基岡上柏。凝望轉蕭森。

大明一統志。四基山在鄆縣東北三十里。
山頂四石狀類壑基。其西麓卽孟子墓。

鄆平張公子萬斛園上小集各賦一物得桔槔

鑿木前人制。收泉易卦稱。天機無害道。人巧合成能。壤脈涓涓出。川流掇掇升。入晴常作雨。當暑欲生冰。菜甲青塹地。花容赤繞塍。彌令幽興劇。頓使化工增。坐愛平畦廣。行憐曲水澄。灌園今莫笑。此地近於陵。

莊子鑿木爲機。後重前輕。挈水若抽。數如決湯。其名爲槔。易井收勿幕。又曰震爲塹。

張隱君元明於園中寘一小石龕曰仙隱祠徵詩紀之

白日浮雲隔幾重。三山五嶽漫相逢。竭來未得從黃石。老至先思伴赤松。哲士有懷多述酒。英流無事且明農。猶憐末俗愚難寤。故作幽龕小座供。

百尺松陰十畝園。此中人物似桃源。衣冠俎豆猶三代。雞犬桑麻自一村。垣外白榆隨宿列。樹頭青鳥候風翻。坐來髣髴疑仙境。試問先生笑不言。

濟南

湖上荷花歲歲新。客中時序自傷神。名泉出地環巖郭。急雨連山淨火旻。絕代詩題傳子美。近朝文士數于鱗。愁來獨憶辛忠敏。老淚無端痛古人。

自笑

自笑今年未得歸。酒樽詩卷欲何依。呼僮向曉牽長轡。覓嫗先冬綻故衣。黃耳不來江表信。白頭終念故山薇。無因化作隨陽鴈。一逐西風笠澤飛。

詠歸祚明戴笠王仍潘檉章四子韭溪草堂聯句見懷二十韻

異地逢冬節。同人會韭溪。蒼涼悲一別。廓落想孤棲。刻燭初分韻。抽毫亦共題。雪裝吳苑白。雲幕越山低。清醕傳杯緩。哀弦入坐淒。詞堪爭日月。氣欲吐虹霓。寫恨工蘇李。攄幽劇呂嵇。風流知不墜。肝膽幸無睽。掛帙安牛角。擔囊逐馬蹄。飄飄過東楚。浩蕩適三齊。息足零門下。停車汶水西。岱宗臨日觀。梁父躡雲梯。洞壑來仍異。關河去更迷。人看秋逝鴈。客喚早行雞。臥冷王章被。窮餘范叔綈。夢猶經冢宅。愁不到中閨。來詩有親朋愁帶甲。家舍祝添丁之句。問字誰供酒。繙書獨照藜。雅言開竹徑。佳訊發蘭畦。遺鯉情偏切。班荆意各悽。式微君莫賦。春雨正塗泥。

濰縣

人臣遇變時亡。或愈於死。夏祚方中微。靡奔一人爾。二樹有遺跡。當日兵所起。世人不達權。但拜孤山

祀。孤山在昌樂縣東十里。有伯夷廟。

左傳昭二十年。亡愈於死。先諸。

我行適東方。將尋孔北海。此地有遺風。其人已千載。英名動劉備。一爲卻管亥。後此復何人。崎嶇但荒壘。

衡王府

賜履因齊國。分枝自憲宗。能言皆詔子。廣斥盡疏封。地號東秦古。王稱叔父恭。穿池通海氣。起榭出林容。嶽里生秋草。牛山見夕烽。蛇遊宮內道。烏啄殿前松。失國非奔莒。亡王不住共。雍門今有歎。流涕一相逢。

史記齊悼惠王世家。諸民能齊言者。皆予齊王。晉書五行志。臨淄有大蛇。長十餘丈。頁二小蛇入城北門。逕從市入漢城陽景王祠中。已而齊王問敗。

督亢

此地猶天府。當年竟入秦。燕丹不可作。千載自懷神。野燒村中夕。枯桑壠上春。一歸屯占後。墟里少遺民。

京師作

煌煌古燕京。金元遞開搆。初興靖難師。遂駐時巡仗。制掩漢唐閼。德儷商周王。巍峩大明門。如暈峙南向。其陽肇圓丘。列聖凝靈貺。其內廓乾清。至尊儼旒纁。繚以皇城垣。靚深擬天上。其旁列兩街。省寺鬱相望。經營本睿裁。斲削命般匠。鼎從郊鄆卜。宅是成周相。穹然對兩京。自古無與抗。艷宮遜顯敞。未央失宏壯。西來太行條。連天矚崖嶂。東盡巫閭支。界海看滉漾。居中守在支。臨秋國爲防。人物竝浩穰。風流餘慨恍。百貨集廣廡。九金歸府藏。通州船萬艘。便門車千兩。繇延祀四六。三靈哀板蕩。紫塞吟悲笳。黃圖布氍帳。獄囚圻父臣。王洽郊死凶門將。滿桂悲號煤山縊。泣血思陵葬。先皇帝陵今號思陵宗子泊羣臣。鳶岑與黔漲。丁年抱國恥。未獲居一障。垂老入都門。有願無繇償。足穿貧士履。首戴狂生盞。愁同箕子過。悴比湘纍放。縱橫數遺事。太息觀今曩。空懷赤伏書。虛想雲臺仗。不覩舊官儀。惇惇念安傍。復思塞上遊。汗漫誠何當。河西訪竇融。上谷尋耿況。聊爲舊京辭。投毫一吁悵。

史記李廣傳以臨右北平盛秋滑稽傳東郭先生久待詔公車貧困飢寒衣敝履不完行雪中履有上無下足盡踐地後漢書逢萌傳首戴瓦盎哭於市曰新乎新乎

薊州

西。北上漁陽道。陰風倍慘悽。窮魚浮淀白。孽鳥向林低。故壘餘安史。居人半鬻奚。停驂聊一問。幾日到遼

戰國策。鴈從東方來。更羸以虛發而下之。曰。此孽也。註。孽者。謂隱痛於身如孽子也。唐書北狄傳。奚國在京師東北四千餘里。東接契丹。西至突厥。南拒白狼河。北至鬻奚。

玉田道中

我行至北方。所見皆一概。豈有田子春。尙守盧龍塞。驅車且東之。英風宛然在。山中無父老。故宅恐荒穢。漚水久還流。薊州志。漚水在豐潤縣西門外。凡水東流而此獨西。故名曰還鄉河。盤山仍面內。地道無虧崩。天行有蒙昧。騁目一遐觀。浩然發深愴。可憐壯遊人。不遇熙明代。

永平

流落天涯意自如。孤蹤終與世情疎。馮驩元不曾彈鋏。關令安能強著書。榆塞晚花重發後。灤河秋鴈獨飛初。從茲一覽神州去。萬里徜徉興有餘。

謁夷齊廟

言登孤竹山。愾焉思古聖。荒祠寄山椒。過者生恭敬。百里亦足君。未肯滑吾性。遜國全天倫。遠行辟虐政。甘餓首陽岑。不忍臣二姓。可爲百世師。風操一何勁。悲哉尼父窮。每歷邦君聘。楚狂歌鳳衰。荷蕢譏擊磬。自非爲斯人。棲棲無乃佞。我亦客諸侯。猶須善辭命。終懷耿介心。不踐脂韋徑。庶幾保平生。可以垂神聽。

寄弟紆及友人江南

已下屠維大淵獻

仲尼一旅人。棲棲去齊衛。當其在陳時。亦設先人祭。深哉告孟言。緬矣封防制。而我亦何爲。遠遊及三歲。前年北踰汶。頃者東過薊。三世但一身。南瞻每揮涕。未敢廢烝嘗。無由辦羊麋。粟從仁者求。酒向鄰家貰。庶幾儻來歆。精靈眇天際。不知自茲往。吾駕焉所稅。世故多屯遭。曰歸未成計。疾如切中心。沒齒安蔬糲。

家語孔子厄於陳蔡七日不食子貢以所齋貨竊犯圍而出告糴於野人得米一石焉顏回仲由炊之子召顏回曰疇昔子夢見先人豈或啓佑我哉子炊而進飯吾將祭焉北史王慧龍傳自慧龍入國三世一身至瓊始有四子詩疾如疾首

吾家有賜塋。近在尙書浦。前區百畝田。後啓重門堵。子姓儼成行。科名多接武。家風萬石傳。花竹平泉圃。蟬聯二百祀。魂魄猶茲土。一旦閱滄桑。他人代爲主。痛我遊子身。中年遭薄祜。驅車去關河。行行遠豺虎。親朋不可見。何況予同父。碌碌想阿奴。耕田故辛苦。行者歎四方。居者愁門戶。豈爲別離哀。努力念爾祖。

陸士衡贈從兄車騎詩。營魄懷茲土。精爽若飛沈。

自昔遘難初。城邑遭屠割。幾同趙卒坑。獨此一人活。旣偷須臾生。詎敢辭播越。十年四五遷。今復客天末。田園已侵并。書卷亦剽奪。尙虞陷微文。雉羅不自脫。卻喜對山川。壯懷稍開豁。秉心在忠信。持身類迂闊。朋友多相憐。此志貫窮達。雖鄰河伯居。未肯求响沫。出國每徒行。花時猶衣褐。以此報知交。無爲久惻怛。

山海關

芒芒碣石東。此關自天作。粵惟中山王。經營始開拓。東支限重門。幽州截垠堞。前海彌浩漾。後嶺橫崑崙。紫塞爲周垣。蒼山爲鎖鑰。緬思開創初。設險制東索。中葉狃康娛。小有干王略。撫順矢初穿。廣寧旗

已落抱頭化貞逃。束手廷弼卻駸駸。河以西千里屯氈幕。關外修八城。指麾煩內閣。孫承宗楊公昌築二翼。東西立羅郭。時稱節鎮雄。頗折氛祲惡。神京既顛隕。國勢靡所託。啓關元帥降。歃血名王諾。自此來城中。土崩無鬪格。海燕春乳棲。寒鷹曉飛泊。□□竟爲灰。六州難鑄錯。

通鑑羅紹威召朱全忠盡殺魏博牙軍雖去其逼而魏兵自是衰弱紹威悔之謂人曰合六州四十三縣鐵不能爲此錯也注錯鏞也又誤也羅以殺牙軍之誤取鑄錯爲喻

望夫石

威遠臺前春草萋。望夫岡畔夜烏啼。九枝白日扶桑上。萬疊蒼山大海西。國是祇憑三寸舌。老謀終惜一丸泥。愁心欲共秦貞女。目斷天涯路轉迷。

山海經陽谷上有扶桑十日所浴居水中有大木九日居下枝一日居上枝新序楚莊王問於孫叔敖曰寡人未得所以爲國是也孫叔敖曰國之有是衆非之所惡也臣恐王之不能定也晉語鄒叔虎曰既無老謀而又無壯事何以事君

昌黎

彈丸餘小邑。固守作東藩。列郡誰能比。雄關賴此存。霜槎春峇出。風葉夜旗翻。欲問嬰城事。聲吞不敢言。

三屯營

三屯山勢鬱嶢嶸。少保當年此建旌。名似北平臨宿將。制如河上築降城。忠祠日落來山鬼。武庫苔封蝕禁兵。三忠祠在城南山上城。西小門內有神器庫。一望幽燕人物盡。頽垣荒草不勝情。

恭謁天壽山十三陵

成祖昔定都。乃省茲山陽。羣山自天來。勢若蛟龍翔。東趾據盧龍。西脊馳太行。後尻坐黃花。前面臨神京。中有萬年宅。名曰康家莊。可容百萬人。豁然開明堂。維時將作臣。奉旨趨傍傍。盛德比霸杜。宏規軼灑邨。雷電驅元冥。白雲升帝鄉。三光墜榆木。窮北回輻輳。駸駸金粟堆。寂寞橋山藏。右獻左次景。裕茂迤西旁。秦陵在茂西。稍折南維康。永陵在東南。規模特恢張。硯石爲元墀。丹青煥雕梁。昭近九龍池。定依昭左方。其制亦如永。工麗踰孝長。慶居獻西隅。德奠永東岡。環山數十里。松柏參天蒼。列宗每駕朝。百執恆趨跲。一年祭三舉。侍從來班揚。詩追安世歌。典與郊禘光。自傷下土臣。不睹昭代章。天禍降宗國。滅我聖哲王。渴葬池水南。靈宮迫妃殤。上無寶城制。周币唯輒牆。下有中涓墳。陪葬義所當。殿上立三主。竝列田娘娘。問此何代禮。哽咽不可詳。麥飯提一簞。棗棗提一筐。村酒與山蔬。一一自攜將。下階

拜稽首。出涕雙浪浪。主祭非曾孫。降假非宗祊。重上諸陵間。裴回復彷徨。茂陵樹千株。獨立不受戕。門闔尚完具。上頭安御牀。自康以接慶。小樹多榆枋。殿樓盡黃瓦。透迤各相望。康昭二明樓。竝遭劫火亡。定陵毀大殿。以及東西廊。餘陵半無門。累甃仍支床。尚存宰牲亭。暨外諸監房。石人十有二。袍笏兼戎裝。六獸柱則四。制與鍾山亢。跨以七孔橋。峙以白石坊。仁宗所製碑。崑崙當中央。行宮已頽壞。御路徒荒涼。每陵二太監。猶自稱司香。人給地數畝。把耒耕山場。春秋祭碑下。共用一豕羊。皆云牧騎來。斫伐尤披猖。并力與之爭。僅得保界疆。有盜貴妃冢。斬首竿以槍。於時姦宄民。瞿然始懲創。繞陵凡六口。六口各有兵。一陵立一衛。衛設屯與倉。居庸有總兵。昌平有侍郎。一朝盡散迸。無復陵京防。燕山自義義。沙河自湯湯。皇天自高高。后土自芒芒。下痛萬赤子。上呼十□□□□。不聞顓天天無常。幽都躡□伯。九關飛虎俚。日月相蝕虧。列宿爲參商。自古有殞落。劇哉哀姚黃。從臣去鼎湖。二妃沈江湘。倉皇一抔土。十五零秋霜。天□未可億。□心未可量。仲華□西京。崔損修中唐。誰能寄此詩。雅頌同洋洋。

揚雄甘泉賦。崇邱陵之駸駸兮。師古注曰。高大之狀。司馬相如子虛賦。硬石砥注。張揖曰。硬石白者如冰。牛有赤色。公羊傳。不及時而日。渴葬也。注。喻急也。釋名。日月未滿而葬曰渴。唐書德

宗紀。貞元十四年。以左諫議大夫平章事。崔損爲修奉八陵使。先是昭陵寢殿爲火所焚。至是獻昭乾定泰五陵。各造屋三百七十八間。橋陵一百四十間。元陵三十間。惟建陵仍舊。但修葺而已。陵寢

中牀釋帷帳。一事以上帝皆親
自閱視。然後授損送於陵所。

王太監墓

先帝賓天日。諸臣孰扈從。
中涓能一死。大節獨從容。
地切山陵闕。魂扶輦御恭。
遠同高力士。陪葬哭元宗。

唐書高力士傳。力士配流黔中。赦歸。至朗州。聞上皇厭代。北望號
慟。嘔血而卒。代宗以其書宿保護先朝。贈揚州大都督。陪葬泰陵。

劉諫議祠在昌平舊縣今廢

阜囊青史漫傳名。白日黃泉氣未平。
自古國亡緣宦者。可憐身沒尙書生。
荒阡草長妖狐出。舊驛風寒
劣馬行。一自德陵升馭後。山河祠廟總淪傾。

居庸關

居庸突兀倚青天。一澗泉流鳥道懸。
終古戍兵煩下口。□朝陵寢託雄邊。
車穿褊峽鳴禽裏。烽點重岡
落鴈前。燕代經過多感慨。不關遊子思風煙。

魏書常景傳。都督元譚據居庸下口。亦作夏口。北齊書文宣紀。築長城自幽州北夏口。至恆州。九百
餘里。卽今之南口也。水經注。居庸關山岫層深。側道褊峽。林藪險路。才容軌。曉禽暮獸。寒鳴相

和。羈官游子。聆之者。莫不傷思矣。

極目危巒望八荒。浮雲夕日徧山黃。全收朔地當年大。不斷秦城自古長。北狩千官隨土木。西來羣盜失金湯。空山向晚城先閉。寥落居人畏虎狼。

陳江總作魯廣達墓銘。曰。災流淮海。險失金湯。

重登靈巖在長清縣東南九十里。

重來絕巘一攀緣。壞閣崔嵬起暮煙。山靜麕獐棲佛地。堂空龍象散諸天。芟林果熟紅椒後。入定僧歸

白鶴前。寺有雙鶴泉。

莫問江南身世事。殘金兵火一淒然。寺自宋以來最盛。金末侯擊屯兵。張汝楫據守。而寺元墟矣。

秋雨

生無一錐土。常有四海心。流轉三數年。不得歸園林。蹠地每塗淖。闕天久曠陰。尙冀異州賢。山川恣搜尋。秋雨合淮泗。一望無高深。眼中隔泰山。斧柯未能任。車沒斷崖底。路轉崇岡岑。客子何所之。停驂且長吟。夸父念西渴。精衛憐東沈。何以解吾懷。嗣宗有遺音。

後漢書梁鴻傳。冀異州兮尙賢。孔子龜山操。予欲望魯兮龜山蔽之手無斧柯。奈龜山何。

與江南諸子別

絕塞飄零苦著書。竭來行李問何如。雲生岱北天多雨。水決淮壩地上魚。濁酒不忘千載上。荒雞猶唱二更餘。諸公莫效王尼歎。隨處容身足草廬。

杜子美簡王明府詩。行李須相問。史記秦始皇八年。河魚大上。漢書五行志。魚逆流而上也。北史劉豐傳。王思政據長社。民訛言大魚道上行。豐建水攻之策。遇洧水灌城。水長魚鼈皆遊焉。城遂陷。管輅別傳。雞一二更鳴者爲荒雞。晉書王尼傳。尼早喪婦。有一子。無居宅。唯畜露車。有牛一頭。每行輒使御之。暮則共宿車上。嘗歎曰。滄海橫流。處處不安也。

天津

文皇都北平。始建天津衛。內以輔神京。外徹溟海際。南北瀉兩河。吐納百川細。輓漕日夜來。貢賦無留滯。重臣鎮其間。鼎足分宣薊。豈惟念輸將。隱然存大計。孽盜踵巢芝。共主非幽厲。曾無一矢遺。歟啓都城閉。馬嵬止元宗。曹陽宿獻帝。雖云兩日程。乘輿豈能詣。先帝一出宮。洞然知國勢。與其蹈危塗。不若宮中縊。嗚呼事一乖。宇宙遂顛蹶。開府固庸才。奉頭竟南逝。巡撫馮元颺侈言曲突謀。縱有亦奚濟。何人爲史官。直筆掃蕪翳。登陴望九門。臨風灑哀涕。

舊滄洲

落日空城內。停驂問路岐。曾經看百戰。唯有一狡狴。

再謁天壽山陵

已下上章困敦

諸陵何崔嵬。不改蒼然色。下蟠厚地深。上峻青天極。佳氣鬱葱葱。靈長詎可測。云何月遊路。坐見塞塵
偪空勞。牲醴陳微寘。神□食仁言。人所欣。甘言人所惑。小修此陵園。大屑我□□。竭來復仲春。再拜翦
荆棘。臣子分則同。駿奔誰共職。區區犬馬心。媿乏匡扶力。

送王文學麗正歸新安

兩年相遇都門道。只有王生是故人。原廟松楸頻眺望。夾城花萼屢經巡。悲歌絕塞將歸客。學劍空山
未老身。生舊在金侍郎聲幕府 貫得一杯燕市酒。傾來和淚溼車輪。

答徐甥乾學

轉蓬枯質自來輕。繞樹孤棲尙未成。守兔江湄遲夜月。飲牛澗底觸秋聲。孤單苦憶難兄弟。薄劣煩呼
似舅甥。今日燕臺何邂逅。數年心事一班荆。

鮑照擬古詩。南國有儒生。迷方獨
淪誤。伐木清江湄。設置守龜兔。

白下

白下西風落葉侵。重來此地一登臨。清笳皓月秋依壘。野燒寒星夜出林。萬古河山應有主。頻年戈甲苦相尋。從教一掬新亭淚。江水平添十丈深。

重謁孝陵

舊識中官及老僧。相看多怪往來曾。問君何事三千里。春謁長陵秋孝陵。

贈林處士古度

老者人所敬。於今乃賤之。臨財但苟得。不復知廉維。五官既不全。造請無虛時。趙孟語諄諄。煩亂不可治。期頤悲褚淵。耄齒嗟蘇威。以此住人間。動輒爲世嗤。嶷嶷林先生。自小工文辭。彬彬萬歷中。名碩相因依。高會白下亭。卜築清溪湄。同心游岱宗。誼友從湘纍。江山忽改色。草木皆枯萎。受命松柏獨。不改青青姿。今年八十一。小字書新詩。方正旣無詘。聰明矧未衰。吾聞王者興。巡狩名山來。百年且就見。況德爲人師。唯此耆成人。皇天所愍遺。以洗多壽辱。以作邦家基。

漢書東方朔傳。老者人所敬也。南史褚淵傳。齊受禪。拜司徒。賓客滿坐。其兄炤歎曰。彥回少立名。行何意。披猖至此。門戶不幸。復有今日之拜。使彥回作中書郎而死。不當是一名士邪。名德不昌。乃

復有期頤之壽。隋書蘇威傳。大唐秦王平王充。坐於東都闔闔門內。威請謁見。稱老病不能拜起。王遣人數之曰。公隋朝宰輔。政亂不能匡救。遂令品物塗炭。君弑國亡。見李密王充皆拜伏舞蹈。今既老病。無勞相見也。尋歸長安。至朝堂請見。又不許。卒於家。年八十八。莊子受命於地。唯松柏獨也在。冬夏青青。書康誥汝丕遠。惟商耆成人。莊子多壽則多辱。

贈黃職方師正建陽人

黃君濟川才。大器晚成就。一出事君王。牧馬踰嶺岫。元臣舉國降。羽葆蒙塵狩。崎嶇遂奔亡。空山侶猿狖。蕭然冶城側。窮巷一塵儻。數口費經營。索飯兼稗幼。清操獨介然。片言便拂袖。常思驅五丁。一起天柱仆。微誠抱區區。時命乃大謬。南望建陽山。荒阡餘石獸。生違鹿柴居。死欠狐邱首。矢口爲詩文。吐言每奇秀。揚州九月中。煨芋試新酎。猛志雷破山。劇談河放溜。否終當自傾。佇待名賢救。落落□等存。一繩維宇宙。

杭州已下重光赤奮若

宋世都臨安。江山已失據。猶誇天目山。龍翔而鳳翥。重江險足憑。百貨東南聚。於此號行都。六帝鑾輿駐。西輸楚蜀資。北擁淮海戍。湖光映罨。山色連宮樹。兩國罷干戈。君臣日遊豫。襄樊一陷沒。千里無完固。梵唄響殿庭。番僧拍陵墓。天運亦何常。以此思其懼。

浙西錢穀地。不以封宗室。南渡始僑藩。懿親藉丞弼。序非涿郡疎。德則琅邪匹。如何負屢謀。蒼黃止三日。那肱召周軍。北庭王衛律。所以敵國人。盡得我虛實。青絲江上來。朱邸城中出。一代都人士。盡屈旃裘鄰。誰爲斬逆臣。一奮南史筆。

北齊書高阿那肱傳。後主還鄴。侍衛逃散。惟那肱及內官數十騎從行。後主走度太行。令那肱以數千人投濟州關。仍遣覘候。每奏云。周軍未至。且在青州集兵。未須南行。及周將尉遲迥至關。肱遂降。時人皆云。肱表款周武。必仰生致齊主。故不速報兵至。使後主被擒。肱至長安。授大將軍。封郡公。爲隆州刺史。誅。

禹陵

大禹巡南守。相傳此地崩。禮同虞帝陟。神契鼎湖升。窆石形模古。墟宮世代仍。探奇疑是穴。考典或言陵。玉帛千年會。山河一氣憑。御香來敕使。主守付髡僧。樹暗巖雲積。苔深壑雨蒸。鶴鷗呼冢柏。蝙蝠下祠燈。餘烈猶於越。分封竝杞鄆。國詒明德胙。人有霸圖稱。往者三光墜。江干一障乘。投戈降北固。授子守西興。冲主常虛己。謀臣動自矜。普天皆爵祿。無地使賢能。合戰山回霧。窮追海踐冰。蠡城迷白草。鏡沼爛紅菱。樵採岡林徧。弓刀塢壁增。遺文留仆碣。仄徑長荒藤。望古頻搔首。嗟今更撫膺。會稽山色好。悽惻獨攀登。

史記越世家贊越世世爲公侯蓋禹之餘烈也周語有夏雖衰杞鄩猶在左傳授師子焉以伐隨通鑑慕容軌攻慕容仁時海凍孰自昌黎東踐冰而進越絕書防塢者越所以過吳軍也杭塢者句踐杭也二百石長員卒七十人度之會夷

宋六陵

六陵饒荆榛。白日愁春雨。山原互起伏。井邑猶成聚。偃折冬青枝。哀哀叫杜宇。海水再桑田。江頭動金鼓。躡屩一遷遂。淚灑欂宮土。

楚辭九章遷遂次而勿驅兮聊假日以須時洪祖輿補注遷遂猶遂巡行不進貌遂七句反

顏神山中見橘

黃苞綠葉似荆南。立雪凌寒性自甘。但得靈均長結伴。顏神山下卽江潭。

三月十九日有事於欂宮時聞□國之報已下元賦攝提格

此日空階薦一觴。軒臺雲氣久芒芒。時來夏□還□祀。識定凡君自未亡。宿鳥乍歸陵樹穩。春花初放果園香。年年霑灑頻寒食。咫尺龍髯近帝旁。

莊子楚王與凡君坐少焉楚王左右曰凡亡者三凡君曰凡之亡也。不足以喪吾存。則楚之存。不足以存存由是觀之。則凡未始亡。而楚未始存也。三輔黃圖安陵有果園。

古北口

漢家亭障接山南。光祿臺空倚夕嵐。戍卒耕田烽火寂。唯餘城下一茅菴。歲歲飛鴻出口迴。年年採木下川來。川中鹿角都除卻。便似函關日夜開。

白髮黃冠老道流。自言家世小興州。一從移向山南住。吹角孤城二百秋。

永樂初棄大小興州。

霧靈山上雜花生。山下流泉入塞聲。卻恨不逢張少保。磧南猶築受降城。

霧靈山在曹家寨邊外。嘉靖初巡撫王大用欲賂三衛取

其山城之。不果。

五十初度時在昌平

居然濩落念無成。隙駟流萍度此生。遠路不須愁日暮。老年終自望河清。常隨黃鵠翔山影。慣聽青驄別塞聲。舉目陵京猶舊國。可能鐘鼎一揚名。

北嶽廟

曲陽古名邦。今日稱下縣。嶽祠在其中。巍峩奉神殿。禮制匹岱宗。經營自雍汴。鶴駕下層霄。宸香闕深院。睽陽鬼目獰。盤蹙松根轉。白石睇穹文。丹楹仰流綯。肇典在有虞。望秩羣神徧。時巡歲卽暮。歸格牲

斯薦自此沿百王。彬彬著紀傳。恆山跨北極。自古無封禪。賴以鎮華戎。帝王得南面。河朔多疆梁。燕雲屢征戰。赫赫我陽庚。區分入邦甸。告祈無闕事。降福蒙深眷。周封喬嶽柔。禹別高山奠。疆吏少干城。神州□□踐。祠同宋社亡。時嶽祀移渾源州。祭卜□川變。再拜出廟門。□□淚如霰。

左太冲吳都賦忘其所以睽陽失其所以去就李善注說文曰睽視也陽疾視也舊唐書張嘉貞傳爲定州刺史至州於恆嶽廟中立頌自爲文書於石爲碑用白石爲之素質黑文甚爲奇麗今碑在廟中漢書郊祀志周顯王之四十二年宋太邱社亡。

井陘

水折通燕海。山盤上趙陘。權謀存史冊。險絕著圖經。瞰下如臨井。憑高似建瓴。壑水當路白。窯火出林青。頗憶三分國。會觀九地形。秦師踰上黨。齊卒戔焚庭。獨此艱方軌。於今尙固扃。井陘之道春秋戰國用兵未有由之者自王翦韓信伐趙。始開此路。而魏道武伐燕使公孫闡于栗磾帥步騎二萬自太原開井陘關路。襲燕慕容寶於中山。於今遂爲通塗。連恆開晉索指昂逼虞星。乞水投孤。炊藜舍短亭。卻愁時不會。天地一流萍。

左傳襄二十二年齊侯伐晉張武軍於熒庭戊郟邵封少水以報平陰之役定四年命以唐誥而封於夏墟啓以夏政疆以戎索

一鴈度汾河。河邊積雪多。水枯清澗曲。風落介山阿。塞上愁書信。人間畏網羅。覆車方有粟。飲啄意如何。

堯廟

舊俗陶唐後。嚴祠古道邊。土階依玉座。松棟冠平田。霜露空林積。丹青彩筆鮮。垂裳追上理。歷象想遺篇。鳥火頻推革。山龍竟棄捐。汾方風動壑。姑射雪封顛。典冊淪幽草。文章散暮煙。滔天非一族。猶馬已三傳。歲至澆邨酒。人貧闕社錢。相逢華髮老。猶記漢朝年。

符子堯曰。余坐華殿之上。森然而松生於棟。余立樞扉之內。霏然而雲生於牖。詩彼汾一方。

亭林詩集卷之四

元旦已下昭陽單閱

平明遙指五雲看。十九年來一寸丹。合見文公還晉國。應隨蘇武入長安。驅除欲淬新劔。拜舞思彈舊賜冠。更憶堯封千萬里。普天今日望王官。

莊子。今臣之刀十九年矣。所解數千牛矣。而刀刃若新發於硎。

霍山

霍山古帝畿。崔嵬據汾左。東環太行趨。北負恆山坐。幽泉迸雷出。奇峰挾雲墮。百物饒姿容。名花獻千朵。廟食當山阿。重門奠磊砢。像設猶古先。冠裳蒙堀堞。春雪覆松杉。堂基對蓬顆。主守各散亡。空室無一鎖。五鎮稱副嶽。亦能降淫禍。豈忘帝王朝。時陟高山墮。黍稷旣非馨。趨將況云惰。神人一失職。庶事交叢脞。有寺號興唐。近在祠東埗。昔日義旗來。列宿紛旃旆。更念七雄時。晉卿特么麼。茫然二節竹。刻期兆猶果。寶命何邇封。四荒無不可。再拜霍山神。惟神實知我。

舊唐書高祖紀師次靈石隋武牙郎將宋老生屯霍邑以拒義師會霖雨積旬餽運不給有白衣老父詣軍門曰余爲霍山神使謁唐皇帝曰八月雨止路出霍邑東南吾當濟師高祖曰此神不欺趙無卹豈負我哉八月辛巳高祖引師趨霍邑斬宋老生史記趙世家襄子奔晉陽原過從後至於澤見三人自帶以上可見自帶以下不可見與原過竹二節莫通曰爲吾以是遣趙毋卹原過既至以告襄子襄子齋三日親自剖竹有朱書曰趙毋卹余霍泰山山陽侯天使也三月丙戌余將使女反滅知氏女亦立我百邑余將賜女林胡之地襄子既并知氏遂祠三神於百邑使原過主霍泰山祠祀左傳昭九年吾何邇封之有爾雅觚竹北月西王母日下謂之四荒

書女媧廟

吁嗟乎三代以後天傾西北不復補但見悲風淅淅吹終古日月星辰若綴旒赤黃青白交旁午北極偏高南極低四時錯迕乖寒暑城淪洪水海成田六鼈簸蕩中流柱羲和益稷不任事畫州造歷迷堯禹彎弓不射九日落蒼蒼列象生毛羽仁人志士久鬱邑精衛空費西山土排天門蓋地戶見天皇與天姥五色之石空煊爛道旁委棄無人取長人十二來臨洮苻姚劉石相雄豪天竺之書入中國三千弟子多其曹涼州龜茲奏宮廟漢魏雅樂隨波濤花門吐蕃日侵軼天子數出長安逃人似魚鰕隨水落世以東南爲大壑一半乾坤長草萊山南代北虛城郭百年舊跡邈難記遺宮別寢屯狐貉至今趙城之東八里有冢尙崔嵬不見媧皇來制作里人言是古高禰萬世昏姻自此開華渚虹藏河馬去三

皇五帝愁胚胎。奇功異事不可問。汾邊山下餘蘆灰。惟天生民無主乃亂。必有聖人以續周漢。如冬復如春。日月如更旦。剝復相乘除。包犧肇爻象。不見風陵之堆高突兀。沒入河中尋復出。天迴地轉無

列子龍伯之國有大人一鈞而連六豨於是岱與具嶠二山流於北極沈於大海路史古高禘祀女媧唐書五行志天寶十三載虢州闔鄉縣界黃河中女媧墓因大雨晦冥失其所在乾元元年六月一日夜河濱人家忽聞風雨聲曉見其墓湧出上有雙柳樹下有巨石二柳各長丈餘今謂之風陵堆

晉王府

卜維方遷鼎。封唐次翦珪。國分河華北。星主實沈西。攘狄威名重。垂昆敬德躋。寵光延白屋。惠澤普黔黎。別殿俄傳燧。深宮早聽鞞。梯衝臨玉壁。戈旂繞銅鞮。井竭龍池水。梁空燕壘泥。圃花游鹿采。山木化鵲啼。國語春秋志。賢王暇日題。壁上大書楚語靈王爲章華之臺一篇定知慈儉理。得與禹湯齊。玉葉衣冠盡。金刀姓字迷。那堪梁苑草。春日更萋萋。

張衡西京賦左暨河華唐六典元宗所居隆慶坊宅之東有井忽湧爲小池周袤十數丈常有雲氣或黃龍出其中至景龍中潛復出水其沼浸廣里中人悉移居遂鴻洞爲龍池

贈傅處士山

爲問明王夢。何時到傅巖。臨風吹短笛。劇雪荷長鏡。老去肱頻折。愁深口自緘。相逢江上客。有淚溼青

衫。

又酬傅處士次韻

清切頻吹越石笳。窮愁猶駕阮生車。時當漢臘遺臣祭。義激韓讐舊相家。陵闕生哀回夕照。河山垂淚發春花。相將便是天涯侶。不用虛乘犯斗槎。
愁聽關塞徧吹笳。不見中原有戰車。三戶已亡熊繹國。一成猶啓少康家。蒼龍日暮還行雨。老樹春深更著花。待得漢庭明詔近。五湖同覓釣魚槎。

楚辭離騷及少康之未家兮。

陸貢士來復武進人述昔年代許舍人曦草疏攻鄭鄴事

維蜀交爭黨禍深。宵人何意附東林。然犀久荷先皇燭。射隼能忘俠士心。梅福佯狂名字改。子山流落鬢毛侵。愁來忽遇同方友。相對支牀共越吟。

庾信哀江南賦年
始二毛。卽達喪亂。

詠史

永嘉一蒙塵。中原遂翻覆。名弧石勒誅。觸眇苻生戮。哀哉周漢人。離此干戈毒。去去王子年。獨向深巖宿。

李克用墓在代州西八里

唐綱既不振。國姓賜沙陀。遂據晉陽宮。表裏收山河。朱溫一篡弒。發憤橫瑠戈。雖報上源讐。大義良不磨。竟得掃京雒。九廟仍登歌。伶官隕莊宗。愛壻亡從珂。傳祚頗不長。功名誠足多。我來鴈門郡。遺冢高嵯峨。寺中設王像。緋袍熊皮鞞。旁有黃衣人。年少神磊砢。想見三垂岡。百年淚滂沱。敵人亦太息。如此孺子何。千載賜姓人。流汗難重過。

五代史唐本紀存勗克用長子也初克用破孟方立於邢州還軍上黨置酒三垂岡伶人奏百年歌至於衰老之際聲辭甚悲坐上皆悽愴時存勗在側方五歲克用慨然持鬚指而笑曰吾行老矣此奇兒也後二十年其能代我戰於此乎及克用卒存勗即王位梁人圍潞州王乃出兵趨上黨行至三垂岡歎曰此先王置酒處也會天大霧晝暝兵行霧中攻其夾城破之梁軍大敗凱旋告廟

五臺山

東臨真定北雲中。盤薄幽并一氣通。欲得寶符山上是。不須參禮化人宮。

訓李處士因篤

三晉阨河山。登覽苦不暢。我欲西之秦。潛身睨霸王。一朝得李生。詞壇出飛將。攜呵斗極迴。含吐黃河漲。上論周漢初。規模迭開創。以及文章家。流傳各宗匠。道術病分門。交游畏流宕。朋黨據國中。雌黃恣騰謗。吾道貴大公。片言折邪妄。論事如造車。欲決南轅向。觀人如列鼎。欲察神姦狀。稍存兪拂詞。不害千喁唱。君無曲學阿。我弗當仁讓。更讀詩百篇。陡覺神采壯。游五臺山諸作先我入深巖。嶽峯剖重嶂。高披地絡文。下挈竺乾藏。大氣豪山川。雄風被邊障。泚筆作長歌。臨岐爲余貺。自哂同坎壈。難佐北溟浪。惟此區區懷。頗亦師直諒。竊聞關西士。自昔多風尚。豁達貫古今。然諾堅足仗。如君復幾人。可愜平生望。東還再見君。牀頭倒春釀。

雨中送申公子涵光

十載相逢汾一曲。新詩歷落鳴寒玉。懸甕山前百道泉。臺駘祠下千章木。登車衝雨馬頻嘶。似惜連錢錦障泥。并州城外無行客。且共劉琨聽夜雞。

訓史庶常可程

伊尹適有夏。太公之朝歌。吾儕亦此時。將若蒼生何。跨驢入長安。七貴相經過。不敢飾車馬。資用防其

多豈無取諸人。量足如飲河。顧視世間人。夷清而惠和。丈夫各有志。不用相譏訶。君今寓高都。連山阻巍峩。佳詩遠寄將。建安激餘波。想見蕭寺中。抱膝苦吟哦。古人尙訓言。亦期相切磋。願君無受惠。受惠難負荷。願君無倦游。倦游意蹉跎。

書序伊尹去亳適夏既醜有夏復歸於亳黃氏日鈔柳子厚平淮夷雅威命是荷音何注引左傳昭七年弗克負荷平聲按後漢書班超傳贊魏穉康答二郭詩晉潘岳河陽縣作劉琨答盧諶詩並作平聲

汾州祭吳炎潘檉章二節士

露下空林百草殘。臨風有慟奠椒蘭。韭溪二子所居血化幽泉碧。蒿里魂歸白日寒。一代文章亡左馬。千秋仁義在吳潘。巫招虞殯俱零落。欲訪遺書遠道難。

楚辭九辯白露既下百草兮奄離披此梧楸宋書孝義傳王韶之贈潘綜吳達詩仁義伊在惟吳惟潘心積純孝事著艱難投死如歸淑問若蘭左傳哀十一年公孫夏命其徒歌虞殯

寄潘節士之弟耒

筆削千年在。英靈此日淪。猶存太史弟。莫作嗣書人。門戶終還汝。男兒獨重身。裁詩無寄處。掩卷一傷神。

王官谷

士有負盛名。卒以虧大節。咎在見事遲。不能自引決。所以貴知幾。介石稱貞潔。唐至昭宗時。干戈滿天闕。賢人雖發憤。無計匡杌隉。邈矣司空君。保身類明哲。墜笏雒陽墀。歸來臥積雪。視彼六臣流。恥與冠裳列。遺像在山崖。清風動巖穴。堂前一畝深。壁樹千尋絕。不復見斯人。有懷徒鬱切。

蒲州西門外鐵牛唐時所造以繫浮橋者今河西徙十餘里矣

唐代浮梁處遺牛制尙新。一朝移岸谷。千載困風塵。失水龍鼉沒。依城鶴雀鄰。舊有鶴雀樓在城西南黃河中高阜處時有鶴

雀樓其上遂名後爲河流衝沒卽城角樓名之以存其蹟應無丞相問。儻與牧童親。世變形容老。年深戰伐頻。無窮懷古意。舍爾適

西秦

竹書紀年周穆王三十七年伐楚起師至於九江叱鼉鼉以爲梁江淹恨賦方駕鼉鼉以爲梁甯戚飯牛歌吾將舍爾相齊國

潼關

黃河東來日西沒。斬華作城高突兀。關中尙可一丸封。奉詔東征苦倉卒。紫髯豈在青城山。白骨未收穀澗間。至今秦人到關哭。淚隨河水無時還。

陸游姚平仲傳欽宗卽位金人入寇平仲請出死士斫營不利遂乘青驪亡命至青城山上清宮留一日復入大面山乃解縱所乘驪得石穴以居朝廷數下詔物色求之弗得也乾道淳熙間始出至丈人觀道院自言如此年八十餘紫髯鬢然長數尺。

華山

四序乘金氣。三峰壓大河。巨靈雄最嵐。上帝儼巍峩。地劣窺天井。雲深拜斗阿。夕嵐開翠巘。初月上青柯。欲摘星辰墮。還虞虎豹訶。正冠朝殿闔。持杖叱羲和。勢扼雙嶠壯。功從駟伐多。未歸桃塞馬。終負魯陽戈。山鬼知秦帝。蠻王屬趙佗。出關收楚魏。浮水下江沱。老尙思三輔。愁仍續九歌。唯應王景略。歲晚一來過。

華嶽志青柯坪西有峰插天名曰北斗坪蓋毛女拜斗得仙之地也楚辭招魂虎豹九關謝眺和王著作八公山詩二別阻漢坻雙嶠望河漢水經注湖水出桃林塞之夸父山武王伐紂天下既定王及嶽濱放馬華陽散牛桃林卽此處也其中多野馬史記淮陰侯傳漢二年出關收魏河南韓殷王皆降蘇代傳蜀地之甲乘船浮于汶乘夏水而下江五日而至郢漢中之甲乘船出於巴乘夏水而下漢四日而至五清晉書王猛隱於華陰山懷佐世之志希龍顏之主斂翼待時候風雲而後動

驪山行

長安東去是驪山。上有高臺下有泉。前有幽王後秦始。覆車在昔良難紀。華清宮殿又何人。至今流恨

池中水。君不見天道幽且深。敗亡未必皆荒淫。亦有英君御區宇。終日憂勤思下土。賢妃助內詠鷄鳴。節儉躬行邁往古。一朝大運合崩頽。三宮九市橫豺虎。玄宗西幸路仍迷。宜曰東遷事還沮。我來驪山中。嗟咽四顧。徬徨無可語。傷今弔古懷坎軻。嗚呼其奈驪山何。

通鑑唐敬宗紀。上欲幸驪山溫湯。左僕射李絳諫。大夫張仲方等屢諫不聽。拾遺張權輿伏紫宸殿下叩頭諫曰。昔周幽王幸驪山。爲犬戎所殺。秦始皇葬驪山。國亡。玄宗宮驪山。而祿山亂。先帝幸之。凶邪我宜一往。以驗彼言。

長安

東井應天文。西京自炎漢。都城北斗崇。渭水銀河貫。千門舊宮掖。九市新廡閤。雲生百子池。風起飛廉觀。呼韓拜殿前。頡利俘橋畔。武將把雕戈。文人弄柔翰。遺跡俱煙蕪。名流亦星散。愁聞赤眉入。再聽漁陽亂。論都念杜篤。去國悲王粲。積雨乍開霽。淒其秋已半。惆悵遠行人。單衣裁至盦。

史記秦始皇紀。爲復道。自阿房渡渭。屬之咸陽。以象天極。開道絕。漢抵營室也。後漢書杜篤傳。上奏論都賦。

乾陵

代運當中絕。房幃召女戎。誅鋤宗子盡。羅織庶僚空。典祏遷新主。司筵掃故宮。貞符疑改卜。大禮竟升

中。復子仍明兩。登遐獲令終。彌縫由密勿。迴幹賴元功。耐廟尊親竝。因山宅兆同。至今尋史傳。猶想狄梁公。

周禮司几筵。下士二人。陸機漢高帝功臣頌。三靈改卜。

將去關中別中尉存杠於慈恩寺塔下

廓落悲王子。棲遲愛友朋。荒郊紆策馬。獵徑傍講鷹。土室人稀到。衡門客少應。傾壺頻進酒。散帙每挑燈。歎昔當憂患。先人獨戰兢。薄田遺豆麩。童阜剩薪蒸。疾病嗟年老。虔恭尙夙興。芋魁收蜀郡。瓜種送東陵。世業爲奴有。空名任盜憎。幸餘忠厚福。猶見子孫承。渭水徂年赤。岐山一夜崩。低頭從竈養。脫跡溷林僧。毒計哀阮趙。淫刑虐用郢。忠魂依井植。碧血到泉凝。賊陷西安。令弟存柘投井死。困鬣時防罟。驚禽早避矰。

屢捫追駟舌。莫運擊蛇肱。謬忝師資敬。中尉子及甥皆執經于余。多將氣誼憑。深情占復始。積德望高升。子建工詩早。河間好學稱。堂垣逾舊大。國邑與前增。九鼎知猶重。三光信有徵。沈埋隨劍甕。變化待鯤鵬。樹落龍池雪。風懸鴈塔冰。更期他日會。拄杖許同登。

易升大象。地中生木。君子以順德積小以高大。謝靈運和伏武昌登孫權故城。炎靈遺劍甕。

后土祠

有序已下
闕逢執徐

漢孝武所立后土祠。在今榮河縣北十里。地名鄕上。或曰睢上。史所云幸河東祠后土者。蓋屢書焉。其後宣元成三帝。及唐宋二宗。皆嘗親幸。以及國朝。雖不親祀典。而歷代相傳。宮殿之巍。綦像設之莊靜。香火之駢闐。未嘗廢也。歲闕逢執徐。王正五日。予至其下。廟祝云。距此十五年。爲黃河所齧。神宇圯焉。乃徙像於東南二里坡下。今所謂行宮者。而古柏千章。盡伐之。以充改造之用。廟未成而木盡矣。是日大雪。令祝引導。策馬從之。逶迤而登。則坊門墀廡宛然。東有大寧宮。亦存遺址。惟正殿及秋風洗粧二樓。皆已蕩然爲斷崖絕壑。而王文正旦之碑。猶臥雪中。不能洗而讀也。愴然有感。乃作是詩。

漢書武帝紀。元鼎四年十一月甲子。立后土祠於汾陰睢上。師古曰。睢者。以其形高起。如人尻。睢故以名云。一說。此臨汾水之上。地本名鄕。音與葵同。彼鄉人呼葵。音如誰。故轉而爲睢焉耳。

故漢舊儀
云葵上。

靈格移鄕上。洪流圯故宮。事同淪泗鼎。時接墮天弓。古木千章盡。層樓百尺空。地維疑遂絕。皇鑒豈終窮。髣髴神光下。昭回治象通。雄才應有作。灑翰續秋風。

龍門

巨地黃河出。開天此一門。千秋憑大禹。萬里下崑崙。入廟焄蒿接。臨流想像存。無人書壁問。倚馬日將昏。

王逸楚辭天問序仰見圖畫因書其壁呼而問之

自大同至西口四首

舊府荒城內。頽垣只四門。先朝曾駐蹕。當日是雄藩。綵帛連樓滿。笙歌接巷繁。一逢三月火。惟弔國殤魂。

落日林胡夜。南風盛樂春。地當天北極。山是國西鄰。冠帶中原隔。金縉異域親。武靈遺策在。猶可制秦人。

宋白續通典唐振武軍漢定襄郡之盛樂也在陰山之陽黃河之北後魏所都盛樂是也在唐朔州北三百餘里史記趙世家主父欲從雲中九原直南襲秦

駿骨來蕃種。名茶出富陽。年年天馬至。歲歲酪奴忙。蹴地秋雲白。臨壚早酎香。和戎真利國。烽火罷邊防。

禮記月令孟夏天子飲酎注酎之言醇也謂重釀之酒也楚辭大招四酎并執

舊說豐州好於今號板升印鹽和菜滑桐乳入茶凝塞北思脣齒河東問股肱獨餘京雒叟終日戍樓憑。

舊唐書唐休璟傳超拜豐州司馬永淳中突厥圍豐州都督崔智辨戰歿朝議欲罷豐州徙百姓於靈夏休璟以為不可上書曰豐州控河過賊實為襟帶自秦漢以來列為郡縣田疇良美尤宜耕牧以隋季喪亂不能堅守乃遷徙百姓就寧慶二州致使戎羯交侵乃以靈夏為邊界貞觀之末始募人以實之西北一隅方得寧謐今若廢棄則河旁之地復為賊有靈夏等州人不安業非國家之利也

孟秋朔旦有事於櫜宮

秋色上陵峒新松夾殿青草深畱虎迹茂陵寶城內獲二虎山合繞龍形放犢朝登壠司香月掃庭不辭行潦薦

髣髴近惟馨

贈孫徵君奇逢

海內人師少中原世運屯微言垂舊學懿德本先民早歲多良友同時盡諍臣蒼黃悲詔獄慷慨急交親天啓中左光斗魏大中周順昌三君黨錮時方解儒林氣始申明廷來尺一空谷資蒲輪未改幽棲被逮至京君為周旋營救不辟禍患

志。聊存不辱身。名高懸白日。道大屈黃巾。衛國容尼父。燕山住子春。門人持笈滿。郡守式廬頻。竹柏心
彌勁。陶鎔化益醇。登年幾上壽。樂道卽長貧。尙有傳經日。非無拜老辰。伏生終入漢。綺里只辭秦。自媿
材能劣。深承意誼真。惟應從卜築。長與講堂鄰。

訓程工部先貞旃蒙大
荒落

縣上耕山日。青門灌圃時。懷人初有歎。裂素便成辭。一鴈陵秋闊。雙魚入水遲。任城樓突兀。大野澤參
差。物象今來異。天心此際疑。風沙春氣亂。彗孛夜芒垂。見魘當郊舞。聞人叫廟譁。頻翻坤軸動。乍鬪日
輪虧。水竭愁魚鼈。山空困鹿麋。傷心猶賦斂。舉目盡流離。旅計真無奈。朋歡可更追。秋吟詔鮑照。日飲
對袁絲。葢急當軒響。花繁繞砌枝。朱絃彌唱古。白雪每誇奇。劍術人誰學。琴心爾共知。三年嗟契闊。隻
羽倦差池。尙媿劬勞憶。來詩云。看君行邁劬勞甚。還添老大悲。幾闕尼父室。獨近董生帷。相傳德州有董子讀書臺。器忝南金許。
文承繡段詒。清風來彩筆。疎韻落芳卮。西蜀元方草。東周夢未衰。會須陪燕笑。重和鄴中詩。

淮南子。麒麟鬪而日月食。宋鮑照有園中秋散詩。史
記。袁盎傳。盎兄子種。謂盎曰。南方卑溼。君能日飲毋苛。

寄劉處士大來已下柔
兆敦胖。

劉君東魯才。頗能究經傳。時方渾九流。發憤焚筆硯。久客梁宋間。落落無所見。棄家走關中。自結三秦彥。便居公瑾宅。直上高堂宴。館李子德家憶昨出門初。朔風灑冰霰。獨身跨一驢。力比蒼鷹健。崎嶇上太行。彳亍甘重趼。一過信陵君。陳君上年下士色無倦。贈別寶刀裝。賓僚陪祖餞。麾檝渡蒲津。駿馬如奔電。上下五陵間。秦郊與周甸。花殘御宿苑。麥秀含元殿。常過韋杜家。早識嚴徐面。意氣何翩翩。交游良可羨。回首憶故人。久滯臨淄縣。黃塵汙人衣。數舉西風扇。山東不足居。苦爲相知勸。世路況悠悠。窮愁儻能遣。聊裁一幅書。去託雙飛燕。

晉韓延之復劉裕書假令天長喪亂九流渾濁世說庾公在石頭王公在治城坐大風揚塵王以扇拂塵曰元規塵汚人

朱處士彝尊過余於太原東郊贈之

詞賦雕鐫老。河山騁望頻。末流彌宇宙。大雅接斯人。世業推王謝。儒言慕孟荀。書能搜五季。字必準先秦。攬轡長城下。回車晉水濱。秋風吹鴈鷺。夜月臥麒麟。玉盃人間有。珠襦地上新。吞聲同太息。吮筆一酸辛。盜發晉王墓得黃金數百斤與爾皆椎結。於今日釣緝。羈心縈故跡。殊域送良辰。草沒青驄晚。霜浮白墮春。自來賢達士。往往在風塵。

屈山人大均南海人自關中至

弱冠詩名動九州。紉蘭餐菊舊風流。何期絕塞千山外。幸有清樽十日留。獨漉泥深蒼隼沒。五羊天遠白雲秋。誰憐函谷東來後。班馬蕭蕭一敵裘。

重過代州贈李處士因篤在陳君上年署中

鴈門春草碧。且復過淖沱。爲念離羣友。三年愁緒多。魯酒千鍾意不快。龜山蔽日齊都隘。卻來趙國訪廉頗。還到關中尋郭解。陳君心事望諸儔。吾友高才冠雍州。玉軸香浮鈴閣曉。彩毫光照射堂秋。人來楚客三閭後。賦似梁園枚馬遊。句注山邊餘舊壘。五原關下臨河水。青冢哀笳出漢宮。白登奇計還天子。窮愁那得一篇書。幸有心期託後車。又逐天風歸大海。好憑春水寄雙魚。

出鴈門關屈趙二生相送至此有賦

一鴈孤飛日。關河萬里秋。雲橫秦塞白。水入代都流。烽火傳西極。琴樽聚北州。登高欣有賦。今見屈千牛。

趙國佳公子。翩翩又一時。滿壺桑落酒。臨別重相思。路絕花驄汗。情深越鳥枝。賢兄煩鎖鑰。邊塞寄安

危。趙生之兄，爲
鳳門參將。

應州

漫南宮闕盡，一塔挂青天。法象三千界，華戎五百年。空旛搖夜月，孤磬落秋煙。頓覺諸緣滅，臨風獨灑

然。城內木塔，遂
清寧二年建。

魏書：太祖天賜三年六月，發八部五百里內男丁築漫南宮門闕，高十餘丈。太宗泰常五年四月丙寅起漫南宮。

尙憶沙陀事，明宗此郡生。艱難當亂世，太息軫遺氓。鳳彩畱荒井，龍文照古城。焚香祝天願，果得見昇

平。五代史：唐明宗應州人，志云州有
金鳳城，明宗生於此，有金鳳井。

重至大同

頻年落落事孤征，每到窮邊一寄情。馬跡未能追穆后，虎頭空自相班生。風吹白草桑乾岸，月照黃沙

盛樂城。忽見丹青意惆悵，君看曹霸阮才名。代府中尉
俊晰能畫。

得伯常中尉書卻寄并示朱烈王太和二門人

岱雲東浮日西暎，下有畸人事鉛槧。忽來青鳥銜尺書，月入軒櫺燈吐燄。別子三年斷音問，敝裘白髮

空冉冉引領常睇函谷關。停驂尙憶終南廣。瀕行把酒送余去。重來何日當分陝。腐儒衰老豈所望。感此深情刻琬琰。擔簦百舍不自量。可能再上三峰險。君家賢甥與令嗣。舞雩歸詠同曾點。尙論千秋品竝堪。以吾一日年猶忝。期君且復慰離愁。勿向流光悲荏苒。

淮上別王生略

已下疆圍協洽

子高徒抗手。君獨淚沾衣。送我山東去。春空一鴈飛。沂山朝靄合。淮水夜燈微。去去懷知己。愁來不可揮。

孔叢子。子高游趙平原。君客有鄒文李節者。與相友善。及將還魯。諸故人訣。既畢。文節送行。三宿臨別。文節流涕交頤。子高徒抗手而已。

贈蕭文學企昭

漢陽人

生年十五餘。卽與人事接。中更世難嬰。書史但涉獵。率爾好爲文。蔚然富枝葉。終媿康成學。久曠周孔業。日西歲將晏。行事苦不立。禮堂寫六經。庶幾猶可及。俗流好鄭衛。淫詞自親狎。用以扶道真。十無一二合。出門游萬里。踽踽恆負笈。晚得逢蕭君。探蹟窮魯汲。車中服子慎。一見語便洽。上考三傳訛。獨授尼父法。方深得朋喜。豈料歸歟急。黃鶴對青山。翩然鼓江楫。浮雲翳楚天。引領空於邑。何時復相從。問

奇補三篋。惟期夕惕心。不負朋簪盍。

後漢書鄭元傳戒其子益思曰所好擊書率皆腐敝不得於禮堂寫定傳之其人日西方暮其可圖乎漢書劉歆傳薰同門妒道真世說鄭元欲注春秋傳尙未成時行與服子慎過宿客舍先未相識服在外車上與人說已注傳意元聽之良久多與已同乃就車與語曰吾久欲注尙未了聽君向言多與吾同今當盡以所注與君遂爲服氏注

曲周拜路文貞公祠

凌煙當日記形容。閩海風飄未得從。故里尙畱旋馬宅。他鄉遙起若堂封。公葬吳之洞庭山苔生宋璟祠前碣。

雪覆要離墓上松。借問家聲誰可似。只今荀氏有雙龍。

德州過程工部

海上乘槎客。年年八月來。每逢佳節至。長待草堂開。老桂香猶吐。孤鴻影自迴。未論千里事。一見且銜杯。

過蘇祿國王墓有序

永樂十五年九月。蘇祿國東王來朝。歸次德州。病卒。遣官賜祭。命有司營墳。葬以王禮。上親爲文。樹碑墓道。畱其僉從十人守墓。其後子孫依而居焉。余過之。出祝版一通。乃嘉靖年者。宛然

如故其字體今人亦不能及矣。

豐碑遙見炳奎題。尙憶先朝寵日碑。世有國人供灑掃。每勤詞客駐輪蹄。九河冰壯虜狐出。十二城荒白鶴棲。州北有十下馬一爲郟子問。中原雲鳥正淒迷。二連城。

赴東六首有序。已下。著雍涪灘。

萊人姜元衡訐告其主黃培詩獄。株連二三十人。又以吳郡陳濟生忠節錄二帙首官。指爲余所輯。書中有名者三百餘人。余在燕京聞之。亟馳投到。頗繫半年。竟得開釋。因有此作。

人生中古餘。誰能免尤悔。況余庸駑姿。側身涉危殆。窺窾起東嶠。長鯨翻渤海。斯人且魚爛。士類同禽駭。稟性特剛方。臨難詎可改。偉節不西行。大禍何繇解。

後漢書賈彪傳。延熹元年。黨事起。太尉陳蕃爭之。不能得。朝廷寒心。莫敢復言。彪謂同志曰。吾不西行。大禍不解。乃入雒陽。說城門校尉竇武。尙書霍諝等。使訟之。桓帝以此大赦黨人。

行行過瀛莫。前途憩廣川。所遇多親知。搖手不敢言。爾本江海人。去矣足自全。無爲料虎鬚。危機竟不悛。下有清直水。上有蒼浪天。旦起策青驪。夕來至華泉。

詩。河水清且直。猗。古樂府。東門行。上用蒼浪天。故下爲黃口小兒。

苦霧凝平臯。浮雲擁原隰。峰愁不注高。地畏明湖溼。客子從何來。徬徨市邊立。未得訴中情。已就南冠繫。夜半鶴鷓鳴。勢挾風雨急。枯魚問河魴。嗟哉亦何及。

古樂府枯魚過河泣。何時悔復及。作書與魴鱖相教。慎出入。

往苒四五日。乃至攀髯時。夙興正衣冠。稽首向園墀。詩人岸獄中。不忘恭敬辭。所秉獨周禮。顛沛猶在斯。北斗臨軒臺。三辰照九疑。可憐訪重華。未得從湘纍。

羲仲殷東方。伶倫和律管。陰崖見白日。黍谷回春煥。柔艣下流澌。輕車度危棧。草木皆欣欣。不覺韶光晚。大造雖無私。薰蕕不同產。奈此物性何。鳩化猶鷹眼。

天門誅蕩蕩。日月相經過。下閱黃雀微。一旦決網羅。平生所識人。勞苦云無他。騎虎不知危。聞之元彥和。尙念田晝言。此舉豈足多。永言矢一心。不變同山河。

魏書彭城王勰傳。孝文之崩。咸陽王禧謂勰曰。汝非但辛勤。亦危險。至極。勰對曰。兄識高年長。故知有夷險。彥和握蝨騎虎。不覺艱難。宋史田晝傳。鄒浩諫立劉后得罪。竄新州。晝迎諸塗。浩出涕。晝正色貴曰。使志完隱。默官京師。遇寒疾。不汗五日死矣。豈獨嶺海之外能死人哉。願君毋以此舉自滿。士所當爲者。未止此也。

子德李子聞余在難。特走燕中告急。諸友人復馳至濟南省視於其行也。作詩贈之。

急難良朋節。扶危烈士情。平居高獨行。此去爲同盟。撫劍來燕市。揚鞭走易京。黃埃隨馬漲。黑水繫船橫。救宋裳初裹。囚梁獄未成。盈庭多首鼠。中路復怔營。已涉平原里。遄驅歷下城。雲浮泉氣活。日麗嶽林明。夜樹蟬初引。晨巢鵲亟鳴。喜猶存卞璞。幸不蹈秦坑。勞苦詞難畢。悲歡事忽并。橐籥勤問遣。寢息共論評。發憤皆公正。媵修自幼清。君賢關羽弟。我媿季心兄。將伯呼朝士。同人召友生。詩書仍燼溺。禹稷竟冠纓。頗憶過從數。深嗟歲序更。川巖句注險。池館薊邱平。每竝登山屐。常隨泛月觥。詩從歌伎采。辯使坐賓驚。祿位揚雄小。囊錢趙壹輕。與君俱好遯。於世本無爭。史論悲鉤黨。儒流薄近名。材能尊選。慳。仁義忱孤婢。自得忘年老。聊存處困貞。不才偏累友。有膽尙談兵。坎窞何當出。虞機詎可撓。殷勤申別款。落莫感精誠。禽海填應滿。鼇山抃豈傾。相期非早暮。渭釣與莘耕。

墨子公輸般爲楚設機械以攻宋。墨子聞之。自魯往。裂裳裹足。日夜不休。十日十夜。而至于郢。後漢書鄧騭傳。惶窘怔營。史記伯夷傳。非公正不發憤。楚辭招魂。朕幼清以廉潔兮。史記季布傳。布弟季心。氣蓋關中。爲任俠。長事袁絲。弟畜灌。大籍。福之屬。漢書揚雄傳。凡人賤近而貴遠。親見揚子雲。祿位容貌不能動人。故輕其書。後漢書趙壹傳。文籍雖滿腹。不如一囊錢。楚辭天問。鼇戴山抃。張衡思元賦。鼇雖抃而不傾。

樓桑廟已下屠維作噩

大雪閉河山。停驂阻燕界。日出見平岡。廟制頗宏大。昭烈南面尊。其旁兩侯配。陰森宮前木。蕪沒畦首菜。遺像纏風塵。荒碑委榛蒯。痛惟初平時。中原已橫潰。跳身向荆益。歷險誠不悔。終焉嗣漢業。上帝居禋類。獨此幽并區。頻在衣冠外。不得比南陽。何由望豐沛。尙想舊宅桑。童童狀車蓋。黃屋旣飄颻。霓旌亦杳靄。惟有異代臣。過瞻常再拜。不及二將軍。提戈當一隊。

三月十二日有事於櫓宮同李處士因篤

餘生猶拜謁。吾友復同來。筋力愁初減。天顏佇一迴。巖雲隨馭下。寢仗夾車開。未得長陪從。辭行涕泗哀。

贈李貢士嘉故城人時年八十

居然漢代表。遺民猶向甘陵說。黨人久矣泥塗嗟。絳縣不妨漁釣老河濱。花香元亮籬前酒。雨墊林宗野外巾。此日蒼英誰得似。飲和先作一方春。

淮南子不言而能飲人以和

邯鄲

趙國地生毛。叢臺野火燒。平原與馬服。纍纍葬枯蒿。饑鳥啄冬雪。獨鴈號寒郊。有策無所用。拂拭千金刀。豈聞蕭王來。北發漁陽豪。晝臥溫明殿。蒼生正磬磬。太息復何言。此身隨所遭。

史記趙世家。民譌言曰。趙爲號。秦爲笑。以爲不信。視地之生毛。漢書五行志。高后元年五月丙申。趙叢臺災。

邢州

太行從西來。勢如常山蛇。邢洺在其間。控壓連九河。唐人守昭義。桀鷲不敢過。憑此制山東。腹心實非他。事已遡悲風。茫然吹黃沙。乞食向野人。從之問桑麻。

舊唐書。李抱真傳。爲昭義軍節度使。時田悅。朱滔。王武俊。相繼反叛。及上幸梁州。抱真獨於擾攘傾潰之中。以山東三州。外抗羣賊。內輯軍士。羣賊深憚之。

自大名至保定子德已先一月西行賦寄

念爾西歸日。嗟余望路岐。殊方頻邂逅。千里各差池。木落燕臺早。霜封華掌遲。秦郊須置驛。莫後鄭當時。

亡友潘節士之弟耒遠來受學兼有投詩答之

生平不擬託諸侯。吾道仍須歷九州。落落關河蓬轉後。蕭蕭行李鴈飛秋。爲秦百姓皆黔首。待漢儒林

已白頭。何意故人來負笈。艱難千里媿從游。

十年離別未言還。楚水楓林極望間。野雀暮歸吳季廟。寒濤秋擁伍胥山。人琴已逝增哀涕。笠屨相看失壯顏。獨有士龍年最少。一朝詞筆動江關。

述古

已下上章閣茂

微言既以絕。一變爲從橫。下以游俠權。上以刑名衡。六國固蚩蚩。漢興亦攘攘。不有董夫子。大道何由明。孝武尊六經。其功冠百王。節義生人材。流風被東京。世儒昧治本。一槩而相量。於乎三代還。此人安可忘。

楚辭九章懷沙同糅玉石兮一槩而相量

六經之所傳。訓詁爲之祖。仲尼貴多聞。漢人猶近古。禮器與聲容。習之疑可睹。大哉鄭康成。探賾靡不舉。六藝既該通。百家亦兼取。至今三禮存。其學非小補。後代尙清談。土苴斥鄒魯。哆口論性道。捫籥同朦瞖。

蘇子瞻日喻生而眇者不識日或告之曰日之光如燭捫燭而得其形他日揣籥以爲日也

五國竝時亡。世道當一變。掃地而更新。三王功可見。鼓琴歌有虞。釣者知其善。區區山澤間。道足開南面。天步未回旋。九州待龍戰。空有濟世心。生不逢堯禪。何必會風雲。弟子皆英彥。俗史不知人。寥落儒林傳。

文中子書。五國竝時而亡。蓋傷先王之道盡墜。故君子大其言。極其敗。於是乎掃地而求更新也。子游汾亭上鼓琴。有釣者曰。美哉琴心也。傷而和。怨而靜。在山澤而有廊廟之志。子驟而歌南風。釣者曰。嘻。非今日事也。道能利生民。功足濟天下。其有虞氏之心乎。不如舜自鼓也。聲存而操變矣。

德州講易畢奉柬諸君

在昔尼父聖。韋編尙三絕。況於章句儒。未曉八卦列。相看五十餘。行事無一達。坐見悔吝叢。舉足防蹉跌。日昃乃研思。猶幸非大耋。微言詎可尋。斯理庶不滅。寡過殊未能。豈厭丁寧說。是時秋雨開。涼風起天末。蟋蟀吟堂階。疎林延夕月。草木得堅成。吾人珍晚節。亮哉歲寒心。不變霜與雪。憂患自古然。守之俟來哲。

輓殷公子岳

憶昔過從日。偏承藻鑑殊。堂中延太守。門外揖王符。木葉空郊晚。魚鱗大澤枯。邈如人世隔。無復問黃

壇。

八俊名空大。千秋事已違。嶺雲緣旆下。溪鳥夾棺飛。薏苡當含貝。枕榔待復衣。寂寥漳水上。猶望楚魂歸。

寄張文學昭時淮上有築堤之役

已下重光大淵獻

冬來寒更劇。淮堰比何如。遙憶張平子。孤燈正勘書。江山雙鬢老。文字六朝餘。得所寄瘞愁絕無同調。

蓬飄久索居。

南史康絢傳天監十四年築浮山堰是冬寒甚淮泗盡凍士卒死者十七八

雙鴈

雙鴈東北飛。飛飛向城闕。聲含海上颺。影帶吳山月。有客從南來。遺我一書札。上寫召旻詩。如彼泉池竭。下列周鼎文。食人象饕餮。書成重密緘。一字一泣血。傳之與貴人。相視莫敢發。所計一身肥。豈望天下活。

呂氏春秋周鼎著饕餮有首無身食人未咽害及其身

夏日

首夏多恆風。塵霾蔽昏旦。舞雩告山川。白紙催州縣。未省答天心。且望除民患。黍苗不作歌。碩鼠徒興歎。仗馬適一鳴。身名已塗炭。貝玉方盈朝。此曹何所憚。博士有正先。實趣秦時亂。

漢書京房傳昔秦時趙高用事有正先者非刺高而死高威自此成故秦之亂正先趣之

末俗無恆心。疾貧而好勇。不能事田園。何況談周孔。出門持尺刀。鑄錢兼掘冢。矧此大東謠。齊民半流冗。不見瓜寧男。死猶被天寵。鳴弓宿鳥驚。躍馬浮埃動。顧謂同行人。王侯寧有種。

漢書王莽傳上谷儲夏自請願說瓜田儀葬以為中郎使出儀儀文降未出而死莽求其尸葬之為起冢祠室諡曰瓜寧殤男幾以招來

秋風行

白露早下秋風涼。誰家置酒開華堂。秦國丞相南面坐。三川郡守趨奉觴。燕娥趙女調清瑟。六博彈棋費白日。致富應多文信金。論功詎足穰侯匹。莫欺張耳鬢如絲。及見夷門大會時。車中公子常虛左。上客侯生衣弊衣。人生富貴駒過隙。唯有榮名壽金石。嗟嗟此曲難重陳。柱摧絃斷長愁人。

史記李斯傳長男由為三川守告歸咸陽李斯置酒於家百官長皆前為壽門廷車騎以千數張耳傳張耳者大梁人也其少時及魏公子無忌為客古詩奄忽隨物化榮名以為寶

靜樂

危。邑枕汾川首。城分并塞支。馬牛遺牧地。材木剩山陴。互澤魚空後。腥風虎下時。樓煩雖善射。不救漢王

太原寄王高士錫闡

游子一去家。十年愁不見。愁如汾水東。不到吳江岸。異地各榮衰。何繇共言宴。忽睹子綱書。欣然一稱善。王君尺牘多作篆書。知交盡四海。豈必無英彥。貴此金石情。出處同一貫。太行冰雪積。沙塞飛蓬轉。何能久不老。坐看人間換。惟有方寸心。不與元鬢變。

三國志注。張紘字子綱。好文學。又善楷篆。與孔融書。皆自書。融報紘曰。前勞手筆。多篆書。每舉篇見字。欣然獨笑。如復覩其人也。

孟縣北有藏山云是程嬰公孫杵臼藏趙孤處

空山三尺雪。匹馬向荒榛。窈洞看冰柱。危峰遲日輪。水邊寒啄鶴。松下晚樵人。恐有孤兒在。尋幽一問津。

讀李處士口襄城紀事有贈有序。已下元默。困敦。

處士之父可從。崇禎十五年。以壯士隸督師汪公喬年麾下。以五千人勦賊。至襄城。死之。處士年十六。貧甚。與其母彭氏并日而食。力學有聞。越二十九年。始得走襄城。爲汪公及其父設祭。招魂以歸。余與處士交。爲之作詩。

躑躅荒郊。酌一樽。白楊青火。近黃昏。終天不返。收嶠骨。異代仍招復。楚魂。滿阪愁雲。隨獨鴈。穎橋哀水。助啼猿。五千國士。皆忠鬼。孰似南山孝子門。

左傳襄十六年。楚公子格帥師。及晉師戰於湛阪。

寄楊高士瑀

廿載江南意。愁來更渺茫。友朋嗟日損。雞犬覺年荒。水歷書池淨。山連學舍長。但聞楊伯起。弦誦夜琅琅。

齊祭器行

歲重光大淵獻。臨淄發地得古祭器數十事。監司攬而有之。

太公封齊廿八世。春禘秋嘗。長有事。猶從三代識遺聲。每見九夷朝祭器。器歷商周制度工。相傳丁癸及桓公。花紋不似萊人物。法象仍疑兩敦同。牛山下涕何悲苦。歲久光華方出土。夏后璜偏入向魑。魯

宮寶又歸陽虎。歷下秋風動夕螢。古來神物亦飄零。誰知柏寢千年器。異日還陳漢武庭。

禮記樂記。齊者三代之遺聲也。齊人識之。故謂之齊。左傳襄六年。陳無宇獻萊宗器于襄宮。禮記明堂位。有虞氏之兩敦。左傳哀十四年。向魋出於衛地。公文氏攻之。求夏后氏之璜焉。與之他玉而奔齊。史記封禪書。少君見上。上有故銅器。問少君。少君曰。此器齊桓公十年。陳於柏寢。已而案其刻。果齊桓公器。

題李先生矩亭有序

德州東二十五里矩亭。故鄉舉思伯李君誠明讀書處。天啓中。權奄柄國。聞君通陰陽象緯之學。遣使徵之。辭疾不就。潔志以終。其子源修是亭以表遺蹟。余爲之詩。

董生祠畔子雲亭。澗雨巖虹望獨扃。門外曉寒縈帶草。林端秋散照書螢。長留直道扶千載。自見遺文表六經。今日似君還肯構。應知家學本趨庭。

瓠

瓠實向秋侵。嗚然繫夕林。不材畱苦葉。槁死亦甘心。偶伴嘉蔬植。還依舊圃尋。削瓜輸上俎。剝棗遜清斟。衛女河梁迥。涇師野渡深。未須驚五石。應信直千金。作器疑無用。隨流諒不沈。試充君子佩。聊比國風吟。

左傳襄十四年諸侯之大夫從晉侯伐秦及涇不濟叔向見
叔孫穆子穆子賦匏有苦葉叔向退而具舟魯人莒人先濟

土門旅宿

在獲鹿縣西南十里

歲歲征驂詎有期。棲棲周道欲安之。尼公匪咒窮何病。尚父維鷹老未衰。市酒薄驅冬宿冷。山甍輕壓曉行饑。從知宇宙今來闊。不似園林獨臥時。

漢書平帝紀追諡孔子曰襄城宣尼公

燕中贈錢編修秉鐙

已下昭陽赤奮若

一別秦淮將廿載。天涯垂老看猶在。斷煙愁竹泣蒼梧。秃筆悽文來漲海。燕市鷄鳴動客輪。九門馳道足黃塵。相逢不見金臺侶。但說荆軻是酒人。

先妣忌日

風木凋零已過時。一經猶得備人師。聞絲欲下劉鵬泣。執卷方知孟母慈。秋雨秀連中野蔚。夕陽光起北園葵。無窮明發千年慨。豈獨杯棬忘日思。

顏氏家訓荒亂以來雖寒畯之子能讀孝經論語者尚爲人師雖奕葉冠冕不曉書記者莫不耕田養馬南齊書劉鵬傳母沒十餘年每聞絲竹之聲未嘗不歎歔流涕晉陸機園葵詩種葵北園

中癸生
鬱萋萋

自章邱回至德州則程工部逝已三日矣

高秋立馬鮑山旁。旅鴈初飛木葉黃。十載故人泉下別。交情多媿邳君章。時張文學昭自燕
中來視其舍斂

後漢書獨行傳范式字巨卿與汝南張劭為友劭字元伯後元伯寢疾同郡邳君章殷子徵晨夜省
視元伯臨盡歎曰恨不見吾死友子徵曰吾與君章盡心於子是非死友復欲誰求元伯曰若二子
者吾生友耳山陽范巨卿所謂死友也元伯尋卒式往奔喪未及到而喪已發引柩不肯進
停柩移時見有素車白馬號泣而來其母望之曰是必范巨卿也式執紼引柩於是乃前

有歎

少小事荀卿。佔畢更寒暑。慨然青雲志。一旦從羈旅。西游到咸陽。上書將英主。門庭正翕集。車騎來千
數。復有金石辭。粲爛垂千古。如何壯士懷。但慕倉中鼠。

家世二千石。結髮常自修。譬如寡婦心。本慕共姜儔。不幸汙盜賊。遂忘淫佚羞。念彼巨先語。撫心悼遷
流。如登千仞岡。失足竟不收。勉哉堅自持。無遺朋友憂。

漢書游俠傳原涉字巨先或譏涉曰子本結髮自修以行喪推財禮讓為名正復讐取仇猶不失仁
義何故遂自放縱為輕俠之徒乎涉應曰子獨不見家人寡婦邪始自約敕之時意迺慕宋伯姬及
陳孝婦不幸壹為盜賊所汙遂行淫佚知其非禮然
不能自還吾猶此矣後漢書馬援傳居高堅自持

哭歸高士

弱冠始同遊。文章相砥厲。中年共墨衰。出入三江汭。悲深宗社墟。勇畫澄清計。不獲聘良圖。斯人竟云逝。峻節冠吾儕。危言驚世俗。常爲扣角歌。不作窮途哭。生耽一壺酒。沒無半間屋。惟存孤竹心。庶比黔婁躅。太僕經鏗鏗。君曾祖諱有光字熙甫世稱震川先生三吳推學者。安貧稱待詔。君叔祖諱子慕字季思清風播林野。及君復多材。儒流嗣弓冶。已矣文獻亡。蕭條玉山下。酈生雖酒狂。亦能下齊軍。發憤吐忠義。下筆驅風雲。平生慕魯連。一矢解世紛。碧雞竟長鳴。悲哉君不聞。

禮記儒行近文章砥厲廉隅後漢書儒林傳說鏗鏗揚子行左傳文十八年卜楚邱占之曰齊侯不及期非疾也君亦不聞

亭林詩集卷之五

廣昌道中已下闕逢攝提格

匹馬去燕南。易京大如礪。五廻春雪深。凍上孤城閉。行行入飛狐。夕駕靡遑稅。融冰見晁流。老樹陵寒霧。啄鵲馴不驚。臥犬安無吠。問客何方來。幽都近如沸。出車日嶙嶙。戈矛接江裔。此地幸無兵。山田隨樹藝。且偷須臾閒。未敢謀卒歲。

後漢書公孫瓚傳前此有童謠曰燕南垂趙北際中央不合大如礪水經注代郡廣昌縣東南有大嶺世謂之廣昌嶺嶺高四十餘里二十里中委折五回方得達其上嶺故嶺有五回之名左傳昭元年趙孟曰吾兄弟比以安也趙孟曰吾兄弟

久客燕代間。遂與關山老。流連王霸亭。躑躅劉琨道。枯莢春至遲。落木秋來早。獨往茲愴然。同遊昔誰好。三楚正干戈。沅湘彌浩浩。世乏劉荊州。託身焉所保。縱有登樓篇。何能盪懷抱。思因塞北風。一寄南

飛鳥。昔年與李子德同宿此縣。

後漢書王霸傳將弛刑徒六千餘人與杜茂治飛狐道堆石布土築起亭障自代至平城三百餘里晉書劉琨傳率衆赴段匹碑從飛狐入薊

寄問傅處士土堂山中

向平嘗讀易，亦復愛名山。早跨青牛出，昏騎白鹿還。太行之西一遺老，楚國兩龔秦。四皓春來洞口見，桃花儻許相隨拾芝草。

晉書陶淡結廬於長沙臨湘山中，養一白鹿以自偶，親故有候之者，輒移澗水，莫得近之。

與胡處士庭訪北齊碑

春靄亂青山，卉木苞未吐。繞郭號荒雞，中田散野鼠。策杖向郊坰，幽人在巖戶。未達隱者心，聊進蒼生語。一自永嘉來，神州久無主。十姓迭興亡，高光竟何許。棲棲世事迫，草草朋儕聚。相與讀殘碑，含愁弔今古。

詠史

王良旣策馬，天弧亦直狼。中夜視北辰，九野何茫茫。秦政滅六國，自謂過帝皇。豈知漁陽卒，狐鳴叢祠旁。誰爲刑名家，至今怨商鞅。

史記天官書：王良策馬，車騎滿野。宋史天文志：弧矢九星，在狼星東南。天弓也。矢不直，狼爲多盜。鹽鐵論商鞅峭法，長利，秦人不聊生，相與哭孝公。

商紂爲黎蒐。遂啓東夷叛。楚靈一會申。俄召乾谿患。甲兵豈不多。人人欲從亂。惟民國所依。疾乃盈其貫。皇矣監四方。得民天所贊。

路光祿書來敍江東同好諸友一時徂謝感歎成篇

削迹行吟久不歸。修門舊館露先晞。中年早已傷哀樂。死日方能定是非。彩筆夏枯湘水竹。清風春盡首山薇。斯文萬古將誰屬。共爾衰遲老布衣。

楚辭招魂。魂兮歸來。入修門些。晉書王羲之傳。謝安嘗謂羲之曰。中年傷於哀樂。與親友別。輒作數日惡。太史公執任少卿書。要之死日。然後是非乃定。

過矩亭拜李先生墓下

人生無賢愚。大節本所共。蹉跎一失身。豈不負弦誦。卓哉李先生。九流稱博綜。心鄙馬季長。不作西第頌。屏居向郊坰。食淡常屢空。清修比范丹。聰記如應奉。力學不求聞。終焉老家術。同時程中丞。一疏亦驚衆。玉璽安足陳。亟進名臣用。中丞名紹。德州左衛人。巡撫河南時。漳河旁得玉璽。上疏言秦璽不足珍。國家以賢爲寶。薦黨籍諸臣十餘人。不納。遂謝病歸。黨論正紛挐。中朝竝歸訟。世推山東豪。三李尤放縱。祠奄與哭典。後先相伯仲。名並見欽定逆案。初踰士類閑。竟折邦家棟。悲哉五十年。風塵尙瀕洞。我來拜遺阡。增此儒林重。雖無警咳接。猶有風流送。自非隨武賢。九原

誰與從。

後漢書馬融傳爲梁冀作大將軍四第頌以此頗爲正直所羞應奉傳少聰明自爲童兒及長凡所經履莫不暗記讀書五行竝下漢司隸校尉魯峻碑休神家衡

潘生次耕南歸寄示

知君心似玉壺清。未肯緇塵久雒京。若到吳閭尋舊跡。五噫東去一梁生。

子房

天道有盈虛。智者乘時作。取果半青黃。不如待自落。始皇方侈時。十字日開拓。海上標東門。長城繞北郭。欲傳無窮世。更乞長生藥。子房天下才。是時無所託。東見倉海君。用計亦疎略。狙擊竟何爲。煩彼十日索。譬之虎負嵎。矜氣徒手搏。歸來遇赤精。奮戈起榛薄。嶢關一戰破。藍田再壓却。嘖嘖軹道旁。共看秦王縛。旣已報韓仇。此志誠不作。遂赴赤松要。無負圮橋諾。

通鑑慕容農言於慕容垂曰夫取果於未熟與自落不過早晚旬日之間然其難易美惡相去遠矣南史陸法和傳侯景之圍臺城也或問之曰事將何如法和曰凡人取果宜待熟時不豫自落

刈禾長白山下

載來來東國。年年一往還。禾垂墟照晚。果落野禽閒。食力終全節。依人尙厚顏。黃巾城下路。獨有鄭公

山。

齊乘北齊以黃巾城立章邱縣其東有鬻山鄭康成注書其上。

歲莫

平生慕古人。立志固難滿。自覺分寸長。用之終已短。良友日零落。悽悽獨無伴。流離三十年。苟且圖飽煖。壯歲尙無聞。及今益樽散。治蜀想武侯。匡周歎微管。願一整頽風。俗人謂迂緩。孤燈照遺經。雪深坐空館。

一歲倏逾盡。我行復何如。何爲窮巷中。悄然日閒居。未敢聽輪扁。且讀堂上書。糟粕雖已陳。致治良有餘。典謨化刀筆。衣冠等猿狙。孰令六代後。一變貞觀初。四海皆農桑。弦歌徧井閭。我亦返山中。耦耕伴長沮。

莊子今取猿狙而衣以周公之服。彼必齷齪挽裂。盡去而後慊。

兄子洪善北來言及近年吳中有開淞江之役書此示之

已下旃蒙單闕。

淞江東流水波緩。王莽之際尤枯旱。平野雲深二陸山。荒陂草沒吳王館。五十年來蕘芋魁。頓令澤國

生蒿萊。豈無循吏西門豹。停車下視終徘徊。少時來往江東岸。人代更移年紀換。卽今海水變桑田。況於爾等皆童叟。乍看舂鍤共歡呼。便向汚邪祝一壺。豈知太平之世飴甘茶。川流不盈澤得瀦。風雨時順通祈雩。春祭三江。秋祭五湖。衣冠濟濟郊壇趨。歲輸百萬供神都。江頭擔酒肴。江上吹笙竽。吏無敲扑民無逋。嗟余已老何時見。久客中原望鄉縣。那聞父老復愁兵。秦關楚塞方酣戰。忽憶秋風千里蕞。淞江亭畔坐垂綸。還歸被褐出負薪。相逢絕少平生親。怪此僮夫是何人。

漢書翟方進傳。汝南有鴻郤陂。王莽末常枯旱。易水流而不盈。越絕書春祭三江。秋祭五湖。因以其時爲之立祠。

閏五月十日

重逢閏五日。澶漫客山東。郡國戈鋌裏。園陵灌莽中。草穿新壘綠。花隔舊京紅。更憶王符老。飄淪恨不

同。王微君演。昔日同詣孝陵行香。今年七十七矣。

杜子美詩。澶漫山東一百州。

春秋書魯月。猶是謂文王。舊國還豐鎬。遺民自夏商。神遊弓劍遠。天與卦爻長。此日追休烈。於戲不可忘。

公羊傳。隱公元年。春。王正月。王者孰謂。謂文王也。

過張貢士爾岐

緇帷白室。觀風標。爲歎斯人久寂寥。濟水夏寒清見底。石田春潤晚生苗。長期六籍傳無絕。能使羣言
意自消。竊喜得逢黃叔度。頻來聽講不辭遙。

莊子。孔子遊乎緇帷之林。休坐乎杏壇之上。又曰。瞻彼閼者。虛室生白。

送程工部葬

文獻已淪亡。長者復云徂。一往歸重泉。百年若須臾。寥寥揚子宅。惻惻黃公壚。揮涕送故人。執手存遺
孤。末俗雖衰漓。風教猶未渝。願與此邦賢。修古敦厥初。

路舍人客居太湖東山三十年寄此代柬

翡翠年深伴侶稀。清霜憔悴減毛衣。自從一上南枝宿。更不回身向北飛。

孫徵君以孟冬葬於夏峰時僑寓太原不獲執紼適吳中有傳示同社名氏者感觸之意遂見乎
辭

老不越疆弔。吾衰況疎慵。遙憑太行雲。迢遞過夏峰。泉源日清泚。上有百尺松。憶叨忘年契。一紀秋徂冬。常思依蜀莊。有懷追楚龔。不得拜靈輒。限此關山重。會葬近千人。來觀馬鬣封。儻有徐孺子。隻鷄遠奔從。一時諸生間。得無少茅容。俗流鶩聲華。考實皆凡庸。淄澠竟誰知。管華稱一龍。我無人倫鑒。焉敢希林宗。惟願師伯夷。寧隘毋不恭。嗟此衰世意。往往纏心胷。回首視秋山。肅矣霜露濃。

禮記檀弓下。五十無車者。不越疆而吊人。揚子法言。蜀莊沈冥。呂氏春秋孔子曰。淄澠之水合。易牙嘗而知之。

漢三君詩

已下柔兆執徐。

父老苦秦法。願見除殘兇。三章布國門。企踵咸樂從。雖非三王仁。寬大亦與同。傳祚歷四百。令名垂無窮。

右高祖

文叔能讀書。折節如儒生。一戰摧大敵。頓使海寓平。改化名節崇。磨鈍人才清。區區黨錮賢。猶足支危傾。

右光武

卓矣劉豫州。雄姿類高帝。一身寄曹孫。未得飛騰勢。立志感神人。風雲應時至。翻然遂翱翔。二豪安得制。

右昭烈

楚僧元瑛談湖南三十年來事作四絕句

共對禪燈說楚辭。國殤山鬼不勝悲。心傷衡嶽祠前道。如見唐臣望哭時。

宋史朱昂傳。父葆光。當梁氏篡唐。與唐舊臣顏荊。李潛輩。挈家南渡。寓潭州。每正旦冬至。必序立南嶽祠前。北望號慟。殆二十年。

孤墳一徑楚山尖。鐵石心肝老孝廉。流落他方餘惠遠。撫琴無語憶陶潛。先兄同年友長沙陶君汝霖。

督師公子竟頭陀。詩筆崢嶸浩氣多。兩世心情知不遂。待誰更奮魯陽戈。武陵楊公子山松。

夢到江頭橘柚林。衲衣桑下愜同心。不知今日滄浪叟。鼓枻江潭何處深。

賦得簷下雀

力小不成巢。翮飛無定止。所謀但一枝。傍徨靡可恃。曾窺王謝堂。不作銜泥壘。雖依簷下宿。無異深林裏。豈不慕高明。其奈驚丸餌。唯應罷官時。殷勤數來此。

漢書揚雄傳。高明之家。鬼瞰其室。鄭當時傳。先是下邳翟公爲廷尉。賓客填門。及廢。門外可設爵羅。

薊門送子德歸關中

與子窮年長作客。子非朱顏我頭白。燕山一別八年餘。再裹行旆來九陌。君才如海不可量。奇正縱橫勢莫當。彈箏叩缶坐太息。豈可日月無弦望。望字作平聲。用阮籍詩。是時鵝火中。日月正相望。爲我一曲歌伊涼。挈十一州歸

大唐。奇材劍客今豈絕。奈此舉目都茫茫。薊門朝士多狐鼠。舊日鬚眉化兒女。生女須教出塞粧。生男要學鮮卑語。常把漢書掛牛角。獨出郊原更誰與。自從烽火照桑乾。不敢宮前問禾黍。子行西還渡蒲津。正喜秋氣高嶙峋。華山有地堪作屋。相與結伴除荆榛。

李陵與蘇武詩。安知非日月。弦望自有時。唐書大中五年。沙州人張義潮以瓜沙伊肅鄯甘河西蘭岷廓十一州歸於有司。顏氏家訓。齊朝一士夫嘗謂吾曰。我有一兒。年已十七。頗曉書疏。教其鮮卑語。及彈琵琶。稍欲通解。以此伏事公卿。無不寵愛。吾時俛而不答。

李生符自南中歸。橋李三年矣。追惟壯遊兼示舊作。

一卷別南中。孤帆白歸去。文飛鶴拓雲。墨染且蘭樹。丈夫行萬里。投分各有遇。明發著菜衣。未肯朱門住。相送驛路旁。落英連古戍。儻有舊遊人。北望懷徐庶。

二月十日有事於櫜宮

已下疆圍
大荒落

青陽回軒邱。白日麗蒼野。封如禹穴平。木類湘山赭。不忍寢園荒。復來奠樽罍。彷彿見威神。雲旗導風馬。當年國步蹙。實歎謀臣寡。空勞宵旰心。拜戎常不暇。賊馬與邊烽。相將潰中夏。頽陽不東升。節士長暗啞。及今擐甲兵。無復圖宗社。飛章奏天庭。謇謇焉能舍。華陰有王生。法伏哭神牀下。亮矣忠懇情。咨嗟傳宦者。遺臣日以希。有願同誰寫。

左傳昭十五年。王靈不及。拜戎不暇。楚辭。離騷。余固知謇謇之爲患兮。忍而不能舍也。

贈獻陵司香貫太監宗

蕭瑟昌平路。行來十九年。清霜封殿瓦。野火逼山阡。鎬邑風流盡。邙陵歲月遷。空堂論往事。猶有舊中涓。

陵下人言上年冬祭時有聲自寶城出至祿恩殿食頃止人皆異之

昌平木落高山出。仰視神宮何崒嶭。昭陵石馬向天嘶。誰同李令心如日。有聲隆隆來隧中。駿奔執爵皆改容。萋宏自信先君力。獨拜秋原御路東。

李商隱復京詩天教李令心如日。可要昭陵石馬來。漢書五行志成帝河平二年正月沛郡鐵官鑄鐵。鐵不下。隆隆如雷聲。左傳昭二十三年南宮極震。葛宏謂劉文公曰。君其勉之。先君之力可濟也。僖三十二年晉文公卒。將殯於曲沃。出絳。柩有聲如牛。卜偃使大夫拜。

過郭林宗墓

路畔纍纍墓石多。中郎遺愧定如何。應憐此日知名士。到死猶穿吉莫鞞。

北齊書恩倖傳有開府薛榮宗。常自云能使鬼帝信之。經古冢。榮宗問舍人元行恭是誰冢。行恭戲之曰。林宗冢。復問林宗是誰。行恭曰。郭元貞父。榮宗因前奏曰。向見郭林宗從冢出。著大帽。吉莫鞞。操馬鞭。問臣我家阿貞來否。

介休

淡靄生巖際。奔泉下石間。龍蛇方起陸。雀鼠尙爭山。縣西南三十里有雀鼠谷。雨靜前村市。秋凋故國顏。介君祠廟在。風義負難攀。

靈石縣東北三十五里神林晉介之推祠

古人有至心。不在狷與忍。國祿既弗加。吾身可以隱。去矣適其時。耕此荒山畛。更與賢母偕。邱壑情同允。卓哉鸞鳳姿。飄飄高自引。嚮使屬戎行。豈其遜枝軫。出處何必齊。此心期各盡。末世多浮談。有類激

小忿割股固荒唐。焚山事可哂。微哉仲子廉。立操同蚯蚓。遺祠君故鄉。父老事惟謹。牡丹異凡花。春深洗鉛粉。況此黃蘆林。晚送秋風緊。厲彼頑鈍徒。英名代無隕。

賈誼弔屈原賦。風漂漂其高逝兮。夫固自引而遠去。

霍北道中懷關西諸君

苦雨淹秋節。屯雲擁霍州。蟲依危石響。水出斷崖流。驛路愁難進。山亭悵獨留。遙知關令待。計日盼青牛。

河上作

龍門下雷首。自古稱西河。入自積石來。出塞復逶迤。呂梁懸百仞。孟門高峩峩。遠矣大禹功。山澤得所宜。靈跡表華巖。金行鎮西垂。黃虞日已遠。曩怒尋干戈。去年方鬪爭。掘壕守朝那。車騎如星流。衣裝兼棗駝。狼弧動箭鏃。參伐揚旂麾。嗟此河上軍。來往何時罷。今年暫寢兵。邏卒猶譏訶。手持一尺符。予錢方得過。追惟狄泉陷。地底生蒼鷲。窺窾來攫人。遶路橫長蛇。寰區恣刀俎。飛走窮網羅。萬類不足飽。螻蟻其奈何。仰希神明眷。下戢陽侯波。行將朝白帝。一訴斯民罹。猿鳥既長吟。窮人亦悲歌。歌止天聽回。

勿厭辭煩多。

水經注晉永嘉元年。雒陽東北步廣里地陷。有二鷲出。蒼色者。飛翔冲天。白色者止焉。後五年。劉曜王彌入雒。帝居平陽。

雨中至華下宿王山史家

重尋荒徑一衝泥。谷口牆東路不迷。萬里河山落落。三秦兵甲雨淒淒。松陰舊翠長浮院。菊蕊初黃欲照畦。自笑漂萍垂老客。獨騎羸馬上關西。

過李子德

憶昔論交日。星霜一紀更。及門初拜母。讓齒忝爲兄。樹引流泉細。山依出月明。居在月山下。相看仍慰藉。均不負平生。

積雨秋方漲。相迎到華陰。水驚龍鬪駛。泥怯馬蹄深。尙阻東軒佇。多煩瀨口尋。白雲清渭色。聊足比君心。

晉陶淵明停雲詩。靄靄停雲。濛濛時雨。八表同昏。平路伊阻。靜寄東軒。春醪獨撫。良朋悠遊。搔首延佇。文選。任彥升有詩云。贈郭桐廬出谿口見候。余既未至。郭仍進村。

拜跪煩兒女。追陪有弟兄。令弟迪篤。雲開王翦廟。風起魏公原。俠氣凌三輔。哀思叫九關。向來多感激。不覺

倒清罇。

擬卜南山宅。先尋北道鄰。關河愁徧徧。縞紵竟誰親。郭君傳芳時異國逢矜式。爲富平令同人待隱淪。李處士便思來嶽頂。揮手謝風塵。

阜帽

阜帽冬常著。青山老自看。鳥憐池樹靜。雲近嶽天寒。淡食隨人給。藜牀任地安。閒來過道院。不爲訪金丹。

采芝

采芝來谷底。汲水到池坳。不礙風塵際。常觀氣化交。晨光明虎跡。夕霧隱鳶巢。昔日幽人住。攀厓此結茅。

寄李生雲霑時寓曲周僧舍課子衍生

歲晚漳河朔。雪霏僕夫持。得尺書歸。三冬文史常堆案。一室弦歌自掩扉。古廟薪殘燒粥冷。荒陂水少食魚稀。何如長白山中寺。莫使匡時雅志違。

春雨已下著雍敦牂

平生好修辭。著集逾十卷。本無鄭衛音。不入時人選。年老更迂疏。制行復剛褊。東京耆舊盡。羸瘵留餘喘。放跡江湖間。猶思理墳典。朝來閱徵書。處士多章顯。何來南郡生。心期在軒冕。幸得比申屠。超然竟獨免。春雨對空山。流泉傍清畎。枕石且看雲。悠然得所遣。未敢慕巢由。徒誇一身善。窮經待後□。到死終黽勉。

顏氏家訓。吾家世文章。甚為典正。不從流俗。梁孝元在藩邸時。撰西府新文。史記。無一篇見錄者。亦以不偶於世。無鄭衛之音故也。後漢書。申屠蟠傳。黃瓊卒。歸葬江夏。四方名豪會帳下者六七千人。互相談論。莫有及蟠者。唯南郡一生與相對。既別。執蟠手曰。君非聘則徵。如是相見於上京矣。蟠勃然作色曰。始吾以子為可與言也。何意乃相狗效。樂賞之徒邪。因振手而去。不復與言。又曰。黨錮之禍。唯蟠超然免於評論。唐錢起詩。初服傍清畎。

寄同時二三處士被薦者

關塞逾千里。交遊更幾人。金蘭情不二。猿鶴意相親。鄴下黃塵晚。商顏綠草春。與君成少別。知復念蘇純。

後漢書。蘇純字桓公。性切直。士友咸憚之。至乃相謂曰。見蘇桓公。患其教貴人。久不見。又思之。

井中心史歌

崇禎十一年冬。蘇州府城中承天寺。以久旱浚井。得一函。其外曰大宋鐵函經。鋼之再重。中有書一卷。名曰心史。稱大宋孤臣鄭思肖百拜封。思肖號所南宋之遺民。有聞於志乘者。其藏書之日。爲德祐九年。宋已亡矣。而猶日夜望陳丞相。張少保統兵外來。以復土宇。至於痛哭流涕而禱之天地。盟之大神。謂氣化轉移。□□一日。於是郡中之人見者。無不稽首驚詫。而巡撫都院張公國維刻之以傳。又爲所南立祠堂。藏其函祠中。未幾而遭國難。一如德祐末年之事。嗚呼悲矣。其書傳至北方者少。而變故之後。又多諱而不出。不見此書者三十餘年。而今復睹之。富平朱氏。昔此書初出。太倉守錢君肅樂賦詩二章。崑山歸生莊和之八章。及浙東之陷。張公走歸東陽。赴池中死。錢君遜之海外。卒於瑯琦山。歸生更名祚明。爲人尤慷慨激烈。亦終窮餓以沒。獨余不才。浮沈於世。悲年運之日往。值禁罔之逾密。而見賢□□□□不懼。故作此歌。以發揮其事云爾。

有宋遺臣鄭思肖。痛哭元人移九廟。獨力難將漢鼎扶。孤忠欲向湘纍弔。著書一卷稱心史。萬古此心

心此理千尋幽井置鐵函百拜丹心今未死厄運應知無百年得逢聖祖再開天黃河已清人不待沈
沈水府留光彩忽見奇書出世間又驚牧□滿江山天知世道將反覆故出此書示臣鵠三十餘年再
見之□心□調復同時陸公已向厓門死信國捐軀赴燕市昔日吟詩弔古人幽篁落木愁山鬼嗚呼
蒲黃之輩何其多宋末蒲壽庚黃萬石所南見此當如何

禮記射義爲人
臣者以爲臣鵠

夏日

渴日出林表炎風下高山火旻雲去微谷井泉來慳晨露薄不濡夕氛橫空般百卉變其姿蕉萃倅榛
菅深居廢寢興無計離人寰而況蚩蚩氓謀食良已艱眷此負耒勤羨彼濯流還素月方東生易忍桑
榆間乃悟處亂規無營心自閒詎如觸熱人未老毛髮斑坐須爽節至一尊散襟顏

淮南子聖人之處亂世若夏暴
而待暮桑榆之間逾易忍也

梓潼篇贈李中孚

後漢書獨行專李業字巨游廣漢梓潼人也元始中舉明經除爲郎去官杜門不應州郡之命
王莽以業爲酒士病不之官遂隱藏山谷絕匿名迹終莽之世及公孫述僭號素聞業賢徵之

欲以爲博士。業固疾不起。數年。述羞不致之。乃使其大鴻臚尹融持毒酒奉詔命。以劫業。若起則受公侯之位。不起。賜之以藥。融譬旨勸之。業乃歎曰。危國不入。亂國不居。親於其身。爲不善者。義所不從。君子見危授命。何乃誘以高位重餌哉。融見業辭志不屈。復曰。宜呼室家計之。業曰。丈夫斷之於心久矣。何妻子之爲。遂飲毒而死。迷聞大驚。又恥有殺賢之名。乃遣使弔祠。贈百匹。業子暈逃。辭不受。蜀平。光武下詔表其閭。益部紀載其高節。圖畫形像。

益部尋圖像。先褒李巨游。讀書通大義。立志冠清流。憶自黃皇臘。經今白帝秋。井蛙分駭浪。嵎虎拒巖幽。譬旨鴻臚切。徵官博士優。里人榮使節。山鳥避車驕。篤論尊尼父。清裁企仲由。當追君子躅。不與室家謀。獨行長千古。高眠自一邱。聞孫多好學。師古接姱修。忽下弓旌召。難爲澗壑留。從容懷白刃。決絕卻華輈。介節誠無奪。微言或可投。風回猿岫敞。霧卷鶴書收。隱痛方童丱。嚴親赴國仇。尸饜常并日。廢蓼擬填溝。歲逐糟糠老。雲遺富貴浮。幸看兒息大。敢有宦名求。相對銜雙涕。終身困百憂。一聞稱史傳。白露滿梧秋。

和王山史寄來燕中對菊詩

雪滿河橋歸轡遲。十行書札寄相思。楚臣終是餐英客。愁見燕臺落葉時。

關中雜詩

文史生涯拙。關河歲月勞。幽情便水竹。逸韻老蓬蒿。獨鴈飛常迅。寒雞宿愈高。一闕西華頂。天下小秋毫。

皇漢山樊久。與唐洞壑餘。空嗟衣劍滅。但識水煙疎。寥落三都賦。棲遲萬卷書。西京多健作。儻有似相

如。時寓富平朱文學樹滋齋中藏書甚多

宋王僧達和瑯邪王依古詩。隆周爲蔽澤。皇漢成山樊。梁江淹從建平王游紀南城詩。年積衣劍滅。漢書揚雄傳。有蘆雄文似相如者。

阿。谷口耕畬少。金門待詔多。時情尊筆札。吾道失弦歌。夜月辭雞樹。秋風下雀羅。尙留園綺跡。終古重山

漢書王貢兩龔鮑傳。谷口鄭子真不誦其志。耕於巖石之下。名震于京師。樓護傳。與谷水俱爲五侯上客。長安號曰谷子雲。筆札樓君卿。唇舌三國志注引世語。劉放孫資共典機任。夏侯獻曹肇心內不平。殿中有雞樓樹。二人相謂曰。此亦久矣。其能復幾。

徂謝良朋盡。雕傷節士空。延陵虛寶劍。中散絕絲桐。名譽菘蘭竝。文章日月同。今宵開敝篋。猶是舊華

風。與李生雲霑次第亡友遺詩

史記屈原傳。推此志也。難與日月爭光可也。

緬憶梁鴻隱。孤高閱歲華。門西吳會郭。橋下伯通家。異地情相似。前期道每賒。請從關尹住。不必向流

沙。山史新構小齋將延予住。

過朝邑王處士建常

賁鵠山川意。相隨萬里翔。誰能三十載。龜殼但支牀。

史記龜策傳。南方老人用龜支牀。足行二十餘歲。老人死。移牀。龜尚生不死。龜能行氣導引。唐王維詩。鳩形將刻杖。龜殼用支牀。

寄子嚴弟紆字。已下屠維協洽。

二紀違眷令。撫心悲如何。惟爾幼孤榮。十畝安江沱。不幸喪厥明。猶能保天和。今年已六十。與吾亦肩差。里人推祭酒。品行無譏訶。昔年遣兒來。省我桑乾河。兒言家頗溫。歲得數困禾。廚中列酒漿。籬下羣雞鵝。常時比鄰叟。農談一相過。亦有賦役憂。未妨藝桑麻。頃報得兩孫。青蔥滿庭柯。媿我半生來。飄泊隨干戈。偶至渭水濱。垂釣臨洪波。春雲開三峯。秀出千丈荷。行止雖聽天。懷土情則那。反躬計所獲。孰與吾仲多。顧此暮年心。尙未甘蹉跎。寄爾詩一篇。當使兒子歌。

寄次耕時被薦在燕中

昨接尺素書。言近在吳興。沈耳茗水濱。叩舷歌採菱。何圖志不遂。策蹇還就徵。辛苦路三千。裹糧復羸。騰夜驅燕市月。曉踏盧溝冰。京雒多文人。一貫同淄澠。分題賦淫麗。角句爭飛騰。關西有二士。立志粗可稱。雖赴翹車招。猶知畏友朋。儻及雨露濡。相將上諸陵。定有南冠思。悲哉不可勝。轉盼復秋風。當隨張季鷹。歸詠白華詩。膳羞與晨增。嗟我性難馴。窮老彌剛棱。孤跡似鴻冥。心尙防弋矰。或有金馬客。問余可共登。爲言顧彥先。惟辦刀與繩。

郭璞江賦。詠採菱以叩舷。揚子法言。辭人之賦。麗以淫。晉書。顧榮傳。與州里楊彥明書曰。吾爲齊王主簿。恆慮禍及。見刀與繩。每欲自殺。

次耕書來言時貴有求觀余所著書者答示

年來行止類浮萍。雖有留書未殺青。世事粗諳身已老。古音方奏客誰聽。兒從死父傳楹語。帝遣生徒受壁經。投筆听然成一笑。春風綠草滿階庭。

晏子春秋。晏子病將死。鑿楹納書焉。謂其妻曰。楹語也。子壯而示之。梁吳均邊城將詩。畱書應鑿楹。傳功須勒社。

雲臺觀尋希夷先生遺跡

舊是唐朝士。身更五代餘。每懷淳古意。聊卜華山居。月落巖阿寂。雲來洞口虛。果哉非荷蕢。獨識太平

初。

畫墁錄：希夷先生陳搏。後唐長興中進士也。既而棄科舉。之武當山。又止房陵。年七十餘。至華山。葺雲臺廢觀。居之。

硤石驛東二十里有西鵝路。繇趙保白楊樹二百五十里。至臨汝。以譏察之嚴。築垣封閉。過此有

題

行人愁向汝州來。前月西鵝禁不開。弔古莫言秦法峻。雞鳴曾放孟嘗回。

雒陽

澗水成周宅。邙山漢代京。三川通地絡。鶉火叶星精。文軌同王朔。蒐畋會卜征。東門迎九鼎。北闕望璣衡。象魏雲常紫。龍池水自清。尊師延國老。聽講集諸生。金谷荒煙合。銅駝蔓草縈。曲多羌笛韻。縣有陸渾名。鶴望將焉屬。鯨吞未息爭。詎忘修禮樂。何計偃戈兵。赤伏看猶在。蒼鷺起莫驚。停驂觀雒汭。微禹動深情。

後漢書：魏囂傳：斷截地絡。郡國志：雒陽東城門名鼎門。帝王世紀曰：九鼎所從入。次北曰閭闔門。漢曰上西門。上有銅璇璣玉衡。以齊七政。東京賦：建象魏之兩觀。雒陽伽藍記：九龍殿前有九龍吐水。成一海。左傳：僖二十二年：秦晉遷陸渾之戎于伊川。注：允姓之戎居陸渾。在秦晉西北。二國誘而徙之伊川。遂從戎。魏至今為陸渾縣也。三國志：張飛傳：思漢之士。延頸鶴

望

三月十九日行次嵩山會善寺

獨抱遺弓望玉京。白頭荒野淚霑纓。霜姿尙似嵩山柏。舊日聞呼萬歲聲。

少林寺

峩峩五乳峰。奕奕少林寺。海內昔橫流。立功自隋季。宏構類宸居。天衣照金織。清梵切雲霄。禪燈晃蒼翠。頗聞經律餘。多亦諳武藝。疆場有艱虞。遣之扞王事。今者何寂寥。闕矣成蕪穢。壞壁出游蜂。空庭唯荒雉。答言新令嚴。括田任污吏。增科及寺莊。不問前朝賜。山僧闕殮粥。住守無一二。百物有盛衰。回旋儻天意。豈無材傑人。發憤起頽廢。寄語惠瑒流。勉待秦王至。

唐武德四年太宗以陝東道行臺雍州牧秦王率諸軍攻王世充寺僧惠瑒曇宗等

執世充姪仁則來歸賜地四十頃水碾一具

嵩山

位宅中央正。高疑上界鄰。蓄波含潁汝。吐氣接星辰。二室雲長擁。三呼響自臻。淳風傳至德。孤隱祕靈真。世敵將還古。人愁願質神。石開重出啓。嶽降再生申。老柏搖新翠。幽花茁晚春。豈知巢許窟。多有濟

時人。

白虎通中央之嶽獨加高者何中央居四方之中可高故曰嵩高山害李林甫嵩陽觀頌抱汝含穎風交雨會後漢書文苑傳多士響臻中庸質諸鬼神而無疑

測景臺在登封縣東南三十里故告成縣

公。象器先王作靈臺太室東陰陽求日至風雨會天中考極三辰正封畿萬國同吾衰今已甚猶一夢周公。

卓太傅祠在密縣東三十里大隗鎮

春。拱木環遺寢空山走部民循良思舊德執節表淳臣几杖中興禮丹青御座親至今傳俎豆長接大隗

後漢書卓茂傳光武詔曰前密令卓茂束身自修執節淳固今以茂爲太傅封褒德侯食邑二千戶賜几杖車馬衣一襲絮五百斤朱祐傳永平中圖畫二十八將于南宮雲臺其外又有王常李通竇融卓茂共三十二人

梁園

梁園詞賦想遺音雕績風流遂至今縱使鄒枚仍接踵不過貪得孝王金。

海上

海上雪深時。長空無一鴈。平生李少卿。持酒來相勸。

五嶽

五嶽何時徧。行游二十春。誰知禽子夏。昔是去官人。

漢書王貢兩龔鮑傳。北海禽
慶子夏。儒生去官。不仕於莽。

贈張力臣

張君二徐流。篆分特精妙。獨坐淮水濱。臨池伴魚釣。京口躡寒蕪。彭城寧荒藿。扁舟浮漢江。一攬關山要。西上定軍山。咨嗟武侯廟。旋車下秦棧。絕谷隨奔峭。昭陵圖駿骨。漢闕悲殘照。石鼓在燕山。望諸可憑弔。還登尼父堂。禮器存遺詔。囊中金石文。一室供長嘯。諸子竝多材。筆畫皆克肖。削杼追宜官。俗書嗤逸少。尤工蒼雅學。深鄙庸儒剽。卻思舊游國。轉瞬分疆徼。古堠出夕烽。平林延野燒。惟此數卷書。鳴琴對言笑。持以勗兒曹。四海有同調。莫浪逐王孫。但從諸母漂。

蜀志。諸葛亮傳。葬漢中定軍山。景耀六年。詔爲立廟。集古錄。有後漢修孔子廟禮器碑。晉衛恆書勢師宜官甚矜其能。或時不持錢。詣酒家飲。因書其壁。雇觀者。以鬻酒。討錢足而滅之。每書輒削。

而焚其柙。梁鵠乃益爲版而飲之。酉。候其醉而竊其柙。韓退之石鼓歌。羲之俗書趁姿媚。

子德自燕中西歸省我于汾州天寧寺

一載燕臺別。頻承注問書。天空烏鳥去。秋到鴈行初。共識班衣重。偏憐卓帽疎。輕身騎款段。一徑訪樵漁。

寄次耕

入雒乘軒車。中宵心有愠。儻呼黃耳來。更得遼東問。

易夬九三。若濡有愠。

六鼇成簸蕩。夜宿看星河。相對愁珠桂。流民輦下多。霄披秋興篇。欲作東臯計。聞有二毛人。年纔三十二。

歲暮西還時。李生雲密方讀鹽鐵論

積雪凍關河。我行復千里。忽聞弦誦聲。遠出衡門裏。在漢方盛時。言利宏羊始。桓生書一編。恢卓有深旨。發憤刺公卿。嗜利無廉恥。片言折斗筭。篤論垂青史。矧乃衰亂仍。征斂橫無紀。轉餉七盤山。骨滿秦

川底太息問朝紳。食粟斯已矣。幸哉荀卿門。尙有苞邱子。

鹽鐵論引春秋曰。其政恢卓。恢卓可以爲卿相。其政察察。察察可以爲匹夫。又曰。李斯與苞邱子俱事荀卿。苞邱子飯麻蓬藜。修道白屋之下。

送康文學乃心歸邵陽

已下上章潛灘

子夏看書室。臨河四望開。山從雷首去。浪拂禹門迴。大道疑將廢。遺經重可哀。非君真好古。誰爲埽莓苔。

水經注。徐水東南逕子夏陵。北東入河。又曰。東南北有二石室。臨側河崖。名子夏室。

友人來坐中口占二絕

不材聊得保天年。便可長棲一壑邊。寄語故人多自愛。但辭青紫卽神仙。
昨過河東望首陽。空山煙靄尙蒼蒼。傳聞高士燕中返。料理牀頭卓莢囊。

隋書五行志。梁末童謠云。黃塵汚人衣。卓莢相料理。

送李生南歸寄戴笠王錫闌二高士

華山五粒松。寄向江東去。白雲滿江天。高士今何處。憶昔過湖濱。行吟兩故人。潛龍猶在水。別鶴已來

秦。江海多翻覆。林泉異棲宿。驚聞東市琴。涕隕堂前筑。去去逐征蓬。隨風西復東。風吹蘭蕙色。一夜落
關中。五陵生蔓草。愁絕咸陽道。平生四海心。竟作終南老。送子出函關。南山望北山。洞庭多桂樹。折取
一枝還。

訓族子涓

二紀心如昨。詩來覺道同。微禽難入海。基本久生風。谷口青門外。沙頭白蜺東。不知蒼舊里。何處有龐
公。

郭璞游仙詩。淮海變微禽。吾生獨不化。史記正義。三
江在蘇州東南三十里。一江東南上七十里白蜺湖。

朱處士鶴齡寄尙書碑傳

昔我適濟南。曾過伏生祠。青山對虛楹。零露寒高枝。精靈竟何往。再拜空階墀。迫怵秦火焚。豈意逢漢
時。此書立博士。天下亦一治。嗟彼九十翁。俟河未爲遲。不厭文字譎。百王賴著龜。後人失其傳。巧文患
多師。忽見吾友書。一編遠來貽。緬想江上村。弦歌類齊淄。白首窮六經。夢寐親臯伊。百家紛綸說。爬羅
殆無遺。論及禹貢篇。九州若列眉。上愁法令煩。下慨淳風衰。君今未大耋。正可持綱維。煙艇隔吳門。臨

風苦相思爲招陽鳥來寄此懷人辭。

哭李侍御灌谿先生模

故國悲遺老。南邦憶羽儀。巡方先帝日。射策德陵時。落照辭烏府。秋風散赤墀。

君以崇禎十四年左遷南京國子監典籍南渡

復官稱病不出

行年逾八十。當世歷興衰。廉里居龔勝。緜山隱介推。清操侔白璧。直道叶朱絲。函杖天涯遠。杓

衡歲序移。無繇承問訊。祇益歎差池。水沒延州宅。山頽伍相祠。傳家唯疏草。累德有銘碑。灑涕瞻鄉社。論心切舊知。空餘歲寒誼。不敢負交期。

漢書龔勝傳勝居彭城廉里周禮大祝作六
辭六曰誅注誅謂積累生時德行以賜之命

華下有懷顧推官

秋風動喬嶽。黃葉辭中林。策杖且行游。息此空亭陰。伊昔吾宗英。賦詩一登臨。爾來閱三紀。斯人成古今。邈矣越石叻。悲哉嵇生琴。鐘呂久不鳴。乾坤盡聾喑。爲我呼蓐收。虎爪持霜金。起我九原豪。獮彼田中禽。下見采薇子。舊盟猶可尋。神理儻不昧。久要終此心。

晉語。魏公夢在廟有神人面白毛虎爪執鉞立於西河召史醫占之對曰如君之言則蓐收也天之刑神也易師六五田有禽利執言

華陰古蹟二首

平舒道

何處平舒道。西風卷夕雲。空留一片壁。爲遺瀉池君。

回谿

回谿非故隘。九虎失西東。惟有黃金匱。依然又省中。

悼亡上章
清灘

獨坐寒牕望墓砧。宜言借老記初心。誰知游子天涯別。一任閨蕪日夜深。

江淹悼亡詩。聽塵歲
時阻閨蕪日夜深。

北府曾縫戰士衣。酒漿賓從各無違。虛堂一夕琴先斷。華表千年鶴未歸。
廿年作客向邊陲。坐歎蘭枯柳亦衰。傳說故園荆棘長。此生能得首邱時。
貞姑馬鬣在江村。送汝黃泉六歲孫。地下相煩告公姥。遺民猶有一人存。
摩天黃鶴自常饑。但惜流光不可追。他日樂羊來舊里。何人更與斷機絲。

冬至寓汾州之陽城里中尉敏浮家祭畢而飲有作

歲時常祭祀。朝夕自饗殮。尙是先人祚。誰非故國恩。枯畦殘宿雪。凍樹出初暾。奠醢求何所。鄰家借小園。

流離踰二紀。愴悅歷三都。墮甑煤還拾。承槽酒旋沽。荒庭依老檜。空谷遺生芻。白髮借宗叟。相看道不孤。

呂氏春秋。顏回對曰。嚮者煤室入甑中。棄食不祥。回攫而飯之。劉伶酒德頌。於是方捧甕承槽。

王孫猶自給。一頃豆萁田。今日還相飯。千秋共爾憐。青門餘地窄。白社舊交偏。傳與兒曹記。無忘漢臘年。

寄題貞孝墓後四柿重光作詠

四柿先人種。旁臨一畝池。霜彫萱草色。日映女貞枝。舊業從飄蕩。非材得憇遺。清陰常不散。勿使衆禽窺。

爾雅翼。柿有七絕。一壽。二多陰。三無鳥巢。四無蟲蠹。五霜葉可玩。六嘉實。七落葉肥火。

贈衛處士蒿

拘疾來河東。息此澮水旁。寒禽繞疎枝。百卉沾微霜。幸逢同方友。典墳共相將。逢萌旣解冠。范丹亦絕糧。弦歌足自遣。感慨論百王。王粲遂頓首。孝獻封山陽。一身殉社稷。自古無先皇。與君同歲生。中年歷興亡。衰遲數儔輩。落落晨星行。旅懷正鬱邑。矧乃多病妨。著書陳治本。庶以回穹蒼。遙遙千載心。眷眷桑榆光。

誄李子德二十四韻

重光作噩

戴雪來青鳥。開雲見素書。故人心不忘。旅叟計何如。上國嘗環轍。浮家未卜居。康成嗟耄矣。尼父念歸與。忽枉佳篇贈。能令積思摠。柴門晴旭下。松徑谷風舒。記昔方傾蓋。相逢便執祛。自言安款段。何意辱干旃。適楚懷陳軫。游燕弔望諸。詎驚新寵大。肯與舊交疎。不磷誠師孔。知非已類蘧。老當爲圃日。業是下帷初。達夜抽經笥。行春奉板輿。誅茅成土室。闢地得新畬。水躍穿冰鯉。山榮向日蔬。已衰晚學問。將隱悔名譽。客舍輕彈鋏。王門薄曳裾。一身長瓠落。四海竟淪胥。契闊頭雙白。蹉跎歲又除。空山清澗曲。喬木絳郊餘。不出風威滅。無營日景徐。但看堯典續。莫畏禹陰虛。地闊分津版。天長接草廬。一從聽七

發。欲起命巾車。

贈毛錦銜

來時冬雁飛。去日春風度。浮雲戀故山。翔鳥懷高樹。一別遂西東。各言難久駐。去去慎所之。長安有岐路。

亭林詩集校補

亭林先生詩集。毓修見一鈔本。題蔣山傭詩集。與刻本異同甚多。且多詩十數首。乃知刻本多爲潘次耕竄改。亦當時有所避忌故也。惟刻本五卷。而鈔止四卷。尙非足本。故叢刊中仍以刻本印行。今以鈔本校其異同。附於卷後。刻本有闕字。填以方圍者。又乾隆中禁書事起。削去。初印本不爾也。今亦補之。亭林之詩。至是始可讀矣。壬戌八月。無錫孫毓修。

蔣山傭詩集卷一 刊本亭林詩集卷一

一葉十行祕識□有仍□ 十七行六軍□一埽□定神□

二葉三行城中屠各虜。陵邊屯牧馬。殿上左闕下駐。十三行神京□ 十四行匈奴出塞時□原

望捷時 十五行月支□□ 十八行帝京京闕 十九行洪武江甸 大明舊京 二十行名三

毫疏封闕號二京映口明

四葉十一行天下想中興。灑掃及冬蒸

五葉十行虞裝北去

六葉七行虞兵牧騎 十三行李定自延平歸齋至御扎延平使至 十四行御□ 十五行天□

十六行綸言□□京□翠華□□ 十九行鶴鳥真仙

七葉一行遙聞一下親征詔樓船見說軍容盛夢想左次 四行小注入海□□

八葉十一行天子□□ 十二行洗中□□

十葉二十二行冬虞北邊小注手詔曰朕甚感楊廷樞之占卦□□□□天□

十一葉一行御□ 四行小注凌駟駟原作駟 六行帝□ 七行小注君甥衛向向原作尙

十二葉二行京師□□ 三行奉□ 四行帝□談笑冬虞空督磨白羽扇 五行疏□猾麇□_{一作旃}

漢□ 六行帥□大事□□ 十五行京□

十三葉一行虞牧表□屋京_{一作行朝}勅□ 二行詔□將□反正□□ 三行不中反□□□ 七行

恥汗東支刀恥爲南冠囚 九行小注無尙字 十四行山傭炎武 十五行山傭炎武

十四葉五行天□ 十七行君□ 十八行國□

十五葉十四行壽□ 十五行中原神□□□陸沉□□ 十八行傳檄□□掃十八□□□ 十九行陵□

十八葉五行穀室 七行況此虞寇深況多鋒鏑驚 十七行小注顯□顯□ 十八行大唐中興頌

歌活溪碑歌 十九行道下無活溪字有經祁陽三字 二十一行歷世三四下有家業已析墓下

之田且嚮之異姓而十四字 二十二行歲上有山傭字作疆下有山傭之南京五字爲册下無工

人字有信工人之能遂以付之乃十字

十九葉一行不可讀下有歸而尤之則曰請七字 二行重裝下有已字三年下有面字 三行一旦

下有楊字爲下無余字五行屬之下有其字 十八行虞騎牧騎

二十葉七行遠行下無作字有時猶全越四字 八行大海東溟 十五行千里郡儲陸海 十六行

浙福二名閩浙壯屏 十八行嗟因

二十一葉二行兀朮牧騎帝□ 六行洪□ 九行正神□□ 十一行兵□ 十二行將□ 二十

行寒衡

二十二葉二行小注琰□

亭林詩集卷二

一葉二十二行剪髮流轉

二葉五行山澤關梁

三葉一行鄧禹□□ 七行異□

四葉九行噓譟 十一十二行昔在天朝時共剖河山符何圖貳師貴卒受冬虞屠我爲□朝將爾作

燕山俘俱推凶門駁各剖河山符嗟公何不死死在淮東郭

五葉十六行天子□□帝三山□□□ 十七行蹕□ 十九行事□ 天子□□

六葉三行恭惟上中興國步方艱危 四行先臣□□

七葉五行西□ 六行行幸□□ 七行吳河國□ 九行東武二年八月上出狩未知所之其先霽

陽卽位於肇慶改元梗錫時太子太師吏部尙書武英殿大學士臣路振微在廈元造東武四先大

統錫用文光閣印頒行之九年正月臣蔣山傭從振微子中書舍人臣路澤溥見此有作原刻作路舍人家見

東武四先□
原作曆□
十二行蒙塵七閩□□□□
十三行廈□
十四行曆□
十六行朔存未信□

□□□
二十二行禁嶺隈□□□

八葉一行彤□
六行在於
八行髯鬚
十六行新今
十九行攻虔□□
二十行一軍□□

九葉十三行起義不克□□□□
起一作倡
十四行今下有年字
十五行無有贈二字有悲歌不能已於言

也八字
二十一行匡□

十葉十八行臣山測於重光大荒落原刻作重光單闕

十一葉九行傳之下有臣山傭稽首頓首謹書九字
十三行百人石人

十二葉十九行得治諸東羌得以威遐荒
二十行三光下有上天厭支德神祇願馨香上追洪武中

遣祀明綸將二十字無追惟定鼎初遣祀明綸將十字
二十一行乏主□□
二十二行尙無依

□□□高□

十三葉一行何時洗妖氛何當挽天河逐滌不祥□□
七行賄師水軍皇□
九行張子房□□□

十行十年□□不見□□王旅□□燕□
十一行子胥□□
況茲蠢逆虞已是天亡秋祖生

奮擊楫肯效南冠囚 十二行袍乘時□□□

十四葉十七行黃屋黃□

十五葉五行伐荻□□ 十六行錢翁□示所輯方書小注肅潤之父原刻作錢生肅潤之父出示所輯方書

十六葉八行曆□ 十行續續 十五行上贈 十六行已下下無數首字 十八行告余通閩中事

陷余重案 十九行訟之下有官以二千金賂府推官無郡行千金四字 二十二行不行下有遂

遣刺客伺余六字而余下無有戒心三字

十七葉四行奸豪莽蜂 二十行無芳績二字

十八葉十五行左氏起翦

十九葉八行京□ 九行支□ 十四行湖遡 十八行王□

二十葉七行謁詣 九行隴陽 二十二行兩宮宮車日逐塞馬

二十一葉十行雲昏奔渾

二十二葉十一行黃□ 十二行可量□□

二十四葉三行 讎國恥□□□ 五行人間若不生之子五岳奔頽九鼎淪人寰尙有遺民在大節雖
隨九鼎淪

亭林詩集卷三

一葉六行期□

六葉四行學人英流自且

七葉一行遍適

八葉三行嗚呼煌煌 十四行小注夔蕭上我先皇帝陵號曰思梁先皇陵今號思陵宗子一聯上
有中華竟崩淪燔瘞久虛曠十字十七行太息觀今曩下有農眠苦誅求甲卒疲轉饜且調入沅兵
更造浮海舫索盜窮琅當追亡敝築杖太陰掩心中兩日相摩盪火運有轉移虞天亂無象白水燄
未然綠林煙已煬六十字二祖興舊官儀

十一葉九行胡塞七廟□□

十三葉十四行四皇哭帝帝□□□□□ 十五行土□ 十七行運□天□ 十八行復□

十四葉十一行本□

十六葉八行宮闕旁月遊路獯東塞塵 九行豈□盜甘 十行社稷□□ 十一行乃其誰共

十八葉二行扶日月摘起旄頭宿驅五丁一起天柱仆 三行神州旣陸沉微誠抱區區 六行我□

十六行穹廡旃裘

十九葉二十行緬□ 二十一行后□重□

二十一葉三行恣奔□□ 四行伊□嗚呼□□

亭林詩集卷四

一葉二行十九年元旦元旦

二葉十七行多日原刻脫

四葉一行依附半何意附 五行聞湖州詠史 六行胡弧 十五行千載二句鈔本無

五葉六行于千 八行胡竺 九行僧乾

八葉十六行橋邊拜單于闕下俘可汗呼韓拜殿前頡利俘橋畔

十葉二行本國 三行韻靜

十一葉十六行橫宮上有先皇帝三字

十二葉十行凌陵

十五葉十三行琰□

二十四葉十三行顯□

亭林詩集卷五

十一葉十八行小注顯□

十二葉十四行王□

十三葉八行必有□□ 十九行思齊獨立□□□□

十四葉三行騎□ 四行同□ 五行同□

補遺據鈔本蔣山備詩集

千官卷一大行後

武帝求仙一上天。茂陵遺事只虛傳。千官白服皆臣子。孰似蘇生北海邊。
一旦傳烽到法宮。罷朝辭廟亦匆匆。御衣卽有丹書字。不是當年嵇侍中。

感事刻本卷一 祇載六首

傳聞阿骨打。今已入燕山。毳幕諸陵下。狼煙六郡間。邊軍嚴不發。驛使去空還。一上江樓望。黃河是玉關。

聞嘯嘯作詔

聞道今天子。中興自福州。二京皆望幸。四海願同仇。滅虜須名將。尊王仗列侯。支方傳尺一。不覺淚頻流。

上吳侍郎陽

已下柔兆闍茂

烽火臨瓜步。鑾輿去石頭。蕃文來督府。降表送蘇州。殺戮神人哭。腥汙郡邑愁。依山成斗寨。保水得環洲。國士推司馬。戎韜冠列侯。師從黃鉞陳。計用白衣舟。曹沫提刀日。田單伏鍤秋。春旗吳苑出。夜火越江浮。作氣須先鼓。爭雄必上遊。軍聲天外落。地勢掌中收。征虜投壺暇。東山賭墅優。莫輕言一戰。上客

有良謀。

元日

一身不自若。竟爾墮虞塵。旦起肅衣冠。如見天顏親。天顏不可見。臣意無由申。伏念五年來。王塗正崩淪。東支擾天紀。反以晦爲元。我今一正之。乃見天王春。正朔雖未同。變支有一人。歲盡積陰閉。玄雲結重垠。是日始開朗。日出如車輪。天造不假支。支行亂三辰。人時不受支。支德違兆民。留此三始朝。歸我中麻君。願言御六師。一掃開青旻。南郊答天意。九廟恭明禋。大雅歌文王。舊邦命維新。小臣亦何思。我皇祖仁。卜年尙未逾。眷言待曾孫。

歲九月夔令伐我墓柏二株

老柏生崇岡。本是蒼虬種。何年徙靈根。幸託先臣壟。長持後彫節。久荷君王寵。歲月駸駸不相待。漢時秦宮一朝改。剝中流涕要名材。乍擬相將赴東海。發丘中郎來。符牒百道聲如雷。斫白書其處。須臾工匠來。斤鋸持鋸截此柏。柏樹東西摧。卻顧別丘壟。辛苦行不辭。君不見秦山之廟柏如鐵。赤眉斫之嘗出血。我今此去去爲船。海風四面吹青天。秉性長端正。不敢作怪妖。東流到扶桑。日月相遊遨。去爲天

上榆留作丘中櫝。傳與松楸莫歎傷。漢家雨露彌天下。

贈于副將元凱已下卷二

嘗笑蘇季子。未足稱英俊。雒陽二頃田。不佩六國印。當世多賢豪。斯言豈足信。于君太學髦。文才冠諸生。悵然感時危。遂被曼胡纓。乍領射聲兵。南都已淪傾。芒鞋走浙東。千山萬水裏。飢從猛虎食。暮向鷺巢止。召對越王宮。虞沙四面起。問道復西來。潛身入吳市。崎嶇赭山渡。迫阨三江壘。七月出雲間。蒼茫東海灣。孤帆依北斗。幾日到舟山。海水鹹如汁。海濤觸舟急。日夜白浪翻。蛟龍爲君泣。瀕死達關中。關中事不同。平虞奉降表。虞兵入行宮。途窮復下海。兩月愁艤。七閩盡左衽。一身安所容。攀崖更北走。滿地皆山戎。歸家二載餘。闊絕無音書。故人久相念。命駕問何如。君家本華胄。高門偏朱紫。困倉禾百廩。趨走僮千指。侍妾裁羅紈。中廚膾魴鯉。更有龍山園。池亭風景繁。水聲穿北戶。花色蔭南軒。有琴復有書。足以安丘壑。身有處士名。不失素封樂。何用輕此生。久試波濤惡。不辭風波惡。不避干戈患。敝屣棄田園。孤遊凌汗漫。乃知鴻鵠懷。燕雀安能伴。君看張子房。不愛萬金家。身爲王者師。名與天壤俱。所貴烈士心。曠然自超卓。是道何足臧。願君大其學。異日封侯貴。黃金爲帶時。知君心不疑。無使魯連疑。

江上刻本祇載一首

江上傳夕烽。直徹燕南垂。皆言陽師來。行人又奔馳。一鼓下南徐。遂拔都門籬。黃旗□隼張。戈船亦魚麗。幾令白鷺洲。化作昆明池。于湖擔壺漿。九江候旌麾。宋義但高會。不知兵用奇。頓甲堅城下。覆亡固其宜。何當整六師。勢如常山蛇。一舉定中原。焉用尺寸爲。天運何時開。干戈良可哀。願言隨飛龍。一上先于臺。

六言

出郭初投飯店。入城復到茶菴。秦客王稽至此。待我三亭之南。相逢問我名姓。資中故王大夫。此時不用便了。只須自出提醅。

昔年盟誓告三辰。欲爲生人植大倫。祭禰不從王氏臘。朝正猶用漢家春。阡原處處關心苦。几杖年年入夢親。一上蔣山東極目。南湖煙水自清淪。

漫落人寰七十年。年來三見海成田。生當虞夏神農後。夢在壺丘列子前。性定自能潛福地。機忘真已入寥天。因思千古同昏旦。几席羹牆尙宛然。

順時誼日卜靈氛。寶炬名香手自焚。樹雉未能觴后帝。薨魚聊可事山君。尋常伏臘人間共。曠代宗祧上界分。遂有精誠通要眇。儼如飛鳥下青雲。

九尺身長鬢正蒼。兒孫森立已成行。才過冰泮烹魚饌。未到秋深摘果嘗。繞院竹光浮茗椀。透簾花氣入書牀。只應潔疾猶難化。莫學當時費長房。
門前有客跨青牛。倒屣相迎入便留。不覺人間非甲子。已知天外是神洲。宣尼願在終浮海。屈子文成合遠遊。笑指八仙皆上座。從君今日老糟丘。

陽慶引卷三

今年祖龍死。乃至明年亡。佛狸死卯年。却待辰年戕。歷數推遷小嬴縮。天行有餘或不足。東支跳梁歷三世。四十五年稱僞壽。牂牁越嶲入輿圖。兩戒山河歸宰制。佳兵不祥。天道好還。爲賊自賊。爲殘自殘。我國金甌本無缺。亂之初生自支孽。徵兵以願州。加餉以願州。士司一反西蜀憂。妖民一唱山東愁。以至神州半流賊。誰其嚆矢繇支尤。四入郊圻躪魯齊。破屠邑城不可數。剝腹絕腸。折頸摺頤。以澤量屍。幸而得囚。去乃爲支。支口呀呀。鑿齒鋸牙。建蚩旗。乘莽車。視干城之流血。擁豔女兮如花。嗚呼支德之

殘如此。而謂天欲與之國家。然則蒼蒼者其果無知也耶。或曰。完顏氏之興。不亦然與。中國之弱。蓋自五代。宋與契丹。爲兄與弟。上告之神明。下傳之子孫。一旦與其屬支。攻其主人。是以禍成于道君。而天下遂以中分。然而天監無私。餘殃莫贖。海水雲昏。幽蘭景促。彼守緒之遺骸。至臨安而埋獄。子不見夫五星之麗天。或進或退。或留或疾。大運之來。固不終日。盈而罰之。天將棄蔡。以壅楚。如欲取而固與。力盡敵五材。火中退寒暑。湯降文生。自不遲。吾將翹足而待之。

元日已下重光赤奮若

霧雪晦支辰。麗日開華始。窮陰畢餘節。復旦臨初紀。支歷元日先大統一日行宮刊木間。華路山林裏。雲氣誰得窺。真龍自今起。天王未還京。流離況臣子。奔走六七年。率埜歌虎兕。行行適吳會。三徑荒不理。鵬翼候扶搖。鯤鬢望春水。頽齡尙未衰。長策無中止。

爲丁貢士亡考衢州君生日作

記曰。君子有終身之喪。忌日之謂也。世俗乃又以父母之生日設祭。而謂之生忌。禮乎。考之自梁以後。始有生日宴樂之事。而父母之存。固已嘗爲之矣。則于其既亡。而事之如生禮。雖先王

未之有。可以義起也。丁君雄飛。乃追數其考之年。及其生日。而曰。吾父存。今八十矣。乃陳其酒脯。設其裳衣。如其存之時。而求詩於友人。其亦孝思之所推與。爲賦近體四韻。

傷今已抱終天恨。追往猶爲愛日歡。儼若戶前聞歎息。儼如堂上坐衣冠。馴烏止樹生多子。慈竹緣池長百竿。所居石城門內有池有竹欲向舊京傳孝友。當時誰得似丁蘭。